

## Tagarāda u Manyan ma Asuki

### *Ukukpa u kadyanshi*

Luka uza da korongi tagarāda u Luka, aya dem u korongi tagarāda u Manyan ma Asuki u na vi. Ciga da wa ciga u dana ili i'ya i gitai n ama a da a ka tono Yesu. Tagarāda u Manyan ma Asuki vi u gita ta alabari a ne a asu u da tagarāda u Luka u shangbai.

Tagarāda u Manyan ma Asuki u yan ta kadyanshi ka ili i'ya i gitai n ama a da a ka tono Yesu cina u kuwa de. U yan ta kadyanshi ka tyoku da a kyawunsai n a yanki ama kadyanshi a kaci ka Yesu, u yain kpam kadyanshi ka tyoku da ama yi a tsu yan a pana baci kadyanshi ki. Kulu Keri ku tsu kangu ta kpam ku banga ama a na yi. A kagita, ama a da a'ari kaletsu ka te alya a yankai kadyanshi ka na ki koshi; wata, aza a Yahuda. Ko a asuvu a aza a Yahuda yi, aza roku a wushuku n ili i'ya a danai wa, kpam a wuna ta aza roku a asuvu a Atoni yi adama a ili i'ya a ka dansa a kaci ka Yesu. Ubana de, pini a asuvu a tagarāda vi, Kashila ka yan ta kadyanshi n Atoni yi a yanka aza da bawu a'ari a kaletsu ka aza a Yahuda kadyanshi a kaci ka Yesu.

Tagarāda u Manyan ma Asuki u yan ta alabari a tyoku da akani a Atoni a tamburai hal a wurai ubongu u Isara'ila. U yan ta alabari a tyoku da Bituru yain n Bulus, n ama ushani. U yan ta kadyanshi ka tyoku da aza da a kpatalai usavu,

n tyoku ɗa a ɓangamɓanaɪ pini a kaɓon ka le n tyoku ɗa a sukusuki kune ubana a asu u Atoni a ɗa a'ari a asu u roku. Nala a'uwa a Atoni a ɗa tsu revei gogo-na vi a gitai.

*Ili i'ya i'ari a tagarada u na vi*

A yan ta Kadyanshi ka Shinga a Urishelima (1:1–8:3)

A yan ta Kadyanshi ka Shinga a Yahuda n Samariya (8:4–12:25)

Bulus yain nwalu tsara u dansa Kadyanshi ka Shinga (13:1–14:28)

Uyawunsa u shinga a Urishelima (15:1-35)

Bulus doku u yain nwalu tsara u dansa Kadyanshi ka Shinga (15:36–18:22)

Bulus doku u yain nwalu n tatsu tsara u dansa Kadyanshi ka Shinga (18:23–21:16)

A kanaɪ Bulus a Urishelima (21:17–23:22)

A bankai Bulus a Kasariya (23:23–26:32)

A bankai Bulus a Roma (27:1–28:31)

*Kazuwamɓani ka utuwa u Kulu Keri*

<sup>1</sup> Uzapige Tiyofilu:

An n koronku vu caupa vi, n korongu ta gba ili i'ya Yesu yansaɪ kpam u wenishikei, ili i'ya i bidyai a'ayin a ɗa u gitai manyan ma ne <sup>2-3</sup> hal ubana kain ka a canga yi ubana a zuba.

An u 'yangai a ukpa, u wenishike ta kaci ka ne a asu u asuki a ne a ɗa u dangasai hal a'ayin amangare. U yansa ta ili ushani i'ya i wenikei an wari n uma mayun. An a'ayin a ɗa a ka canga yi ubana a zuba a yain evu, u dansa ta n ele ukuna u tsugono tsu Kashila u tonusuko le kpam ili i'ya

a ka yan. Gbā ili i na yi u yansa t̄a i'ya a asuvu a ucira u Kulu Keri.

<sup>4</sup> Kain ka te an w̄ari kaḅolo n ele a asu u ulya ilikulya, u tonuko le, “Kotsu i laza pini a Urishe-  
lima wa hal she Tata u sukunku ḁa kune ku u zuwamgbanaɪ vi. M̄ari n tonuko ḁa ḁe ukuna u na vi caupa. <sup>5</sup> Yahaya lyuḅugusu t̄a ama n mini, shegai ubana a kapala kenu, a ka lyuḅugu ḁa t̄a n Kulu Keri.”

### *A cangai Yesu ubana a zuba*

<sup>6</sup> Kain ka te, an asuki yi a ḅolomgbonoi a asu u te kaḅolo n Yesu, a wece yi, “Asheku, a'ayin a ḁa va gonuko aza a Isara'ila tsugono tsu le a ḁa na vi?”

<sup>7</sup> U tonuko le, “Tata ḁa koshi w̄ari n ucira u ḁa wa reve a'ayin a ḁa u foḅusoi vi, eḁa ya reve wa. <sup>8</sup> Shegai ya wusha t̄a ucira a'ayin a ḁa Kulu Keri ku cipai asuvu a ḁe. Ya woko t̄a aza ḁa ya shamkpa mu a Urishelima, n gbā a asuvu a Yahuda. I tonuko kpm aza a Samariya hal ubana a asuvu a likimba gbā.”

<sup>9</sup> An u kotsoi kadyanshi ka na ki, ele n a wundi yi, aku a canga yi a mere ma le ubana a zuba. Pini nala, kalishi ka kimba yi, a doku a wene yi kpm wa.

<sup>10</sup> A'ayin a ḁa a'ari pini a uwundya zuba vi, kute-kute ama a re u'uki n aminya a eri a shamgbai evu n ele. <sup>11</sup> A tonuko le, “Aza a Galili, ndya i zuwai i'ari kushani ya wundya zuba? Yesu ḁa i wenei a cangai ubana a zuba na vi, nala kpm wa gono.”

### *A dangasai kasuki ka savu*

<sup>12</sup> Aku asuki yi a lazai pini a Masasa ma Zayitum mi a gonoi a Urishelima, kpm nte masasa mi

mari pini evu n Urishelima vi; wata, kagbidi ka mel u te.\* <sup>13</sup> An a rawai a ilyuci yi, aku a yuwai a kunukuzuba a asu u da a tsu cipa. Ama da a'ari pini vi alya; Bituru, n Yahaya, n Yakubu. Andurawu, n Filibu, n Toma a'a ta dem pini. Aza da a'ari pini a bolomgbono ta dem n Batalamawu, n Matiyu, n Yakubu maku ma Halfa, n Simo uza da a ka isa Ziloti, n Yahuza maku ma Yakubu. <sup>14</sup> A tsu bolomgbono ta kpam a nakai kaci ka le adama a kvasu n katakasuvu ka te. Aka roku a da dem pini hal n Meri mma u Yesu n a'angu a Yesu yi.

<sup>15</sup> A'ayin a nala yi, kakuma ka ama ka ka rawai ama amangatawun n kamanga (120) aza da a pityanangi ka ka bolomgbonoi. Pini nala, Bituru shamgbai a mere ma le u danai, <sup>16</sup> “Ama a va, u kana ta a shadangu udani u Kashila u da Kulu Keri ku danai caupa a unu u Dawuda a kaci ka Yahuza, uza da u tonoi n aza da a kana Yesu. <sup>17</sup> Kpaci caupa uza u te u da a asuvu a tsunu, kpam a naka yi ta kapashi ka manyan ka ne a asuvu a manyan ma na mi.”

<sup>18</sup> (U tsila ta uyamba n ikebe i'ya u tsari a asu u manyan ma cingi mi. Pini nala, u rukpai kaci uvari, aku katsuma ka ne ka tasi, ucanga u katsuma vi u tsalai a iyamba. <sup>19</sup> Gba aza da a'ari a Urishelima a pana ta ukuna u na vi, aku a nekei asu vi kala, Akaladama n kaletsu ka le; wata, “Uyamba u Mpasu.”)

---

\* **1:12** Kaletsu ka aza a Yahuda ka da, mbari mi “Nwalu n kain ka Ashibi n da koshi.” Mele ma aza a Yahuda ma wushuku uza u yain nwalu n da n wurai kilomita u te, ko kpam kagbidi ka mel u te n kain ka Ashibi wa. N da ma wura la vi nwalu n minti kupa ko kpam udeshe azu a tatsu wa.

<sup>20</sup> Bituru lyai kapala n kadyanshi, “Kpaci wā ta ukorongi a asuvu a Tagarāda u Ishipa,† ‘Asakā kuwa ku ne ku woko uvarangi, kpam kotsu uza u dusuku pini wa.’

“Kpam a dana tā,  
‘Kapashi ka manyan ka ne ki uza roku u bidya ka.’



<sup>21</sup> “Adama a nala u kanā tā a dangasa uza roku a asuvu a ama a na yi, uza da wari kabolo n atsu caupa a'ayin a da Yesu Asheku wari n atsu. <sup>22</sup> U kanā tā vuma vi u woko uza da u rongoi n atsu tun a'ayin a da Yahaya lyuḅugi Yesu hal ubana a'ayin a da a canga yi ubana a zuba. U kanā tā vuma vi u bolomgbono kaci n atsu, u woko uza da wa tonuko ama ukuna u u'yangā u ne a ukpa.”

<sup>23</sup> Pini nala, a wutukpai ama a re, Isuhu Barasaba uza da a ka isa Yusutu, n Mataya. <sup>24</sup> Asuki yi a yain kavasu a danai, “Asheku, ya dem vu reve tā katakasuvu ka ne. Wenike tsu uza da vu dangasai a asuvu a ama a re a na yi, <sup>25</sup> u woko kasuki. U bidya manyan ma Yahuza kasuki u asakai kpaci u bana de asu u da u yain dere n eyi.” <sup>26</sup> A varangi uruta, aku u rukpai a kaci ka Mataya, pini nala, a zuwa yi u woko kasuki kabolo n kupa n u te vi.

## 2

### *Utuwa u Kulu Keri*

◇ **1:20** Ishp. 69:25; Ishp. 1:20b; Ishp. 109:8.

<sup>1</sup> An kain ka Abiki a Kain ka Amangarenkupa†\* ka yain, gba Atoni yi a bolomgbonoi a asu u te. <sup>2</sup> Kute-kute a panai mawura ma uwule u pige u da u wuta i a zuba u shadangi kuwa ka a'ari pini ndishi vi. <sup>3</sup> Aku a wenei ili i roku yavu aletsu a akina a ka pecenishe n a cipusi a zuba u a'aci a le. <sup>4</sup> A shadangu le n Kulu Keri, aku a gitai kadyanshi n aletsu a roku kau-kau tyoku da Kulu Keri ki ku tonoi n ele.

<sup>5</sup> A'ayin a nala yi, aza a Yahuda a roku aza da a ka tonon Kashila a wuta i iyamba i likimba gba ya dem n kaletsu ka ne a tuwai pini a Urishelima vi na ndishi. <sup>6</sup> An a panai mawura ma uwule mi, aku kakuma ka ama ka sumai ka banai tsara a wene ili i'ya ya gita. Aku a yain majiyan kpaci gba le ya dem pana ta kaletsu ka ne a asu u Atoni yi a ka dansa ka. <sup>7</sup> A yain majiyan cika, hal a ka wecishike, "Aza da a ka dansa na vi tsa wundya gba le aza a Galili a da vi? <sup>8</sup> Nida kpam gba tsunu tsu pana ka le a ka dansa aletsu a tsunu? <sup>9</sup> A tsa tani na tsu wuta ta iyamba kau-kau, aza a roku aza a Paratiya a da, n aza a Madaya, n aza a Elam. Tsa ta dem n aza a Masopotamiya, n aza a Yahuda, n aza a Kapadosiya, n aza a Pontu, n aza a Asiya asuvu a tsunu. <sup>10</sup> Aza a Firijiya, n aza a Bamafiliya n aza a Masar a da dem pini. Hal n aza a kaƙon ka kapashi ka Libiya evu n Sirani, n amoci a uyamba u Roma aza da a'ari aza a Yahuda n aza da a uwai utono u adini a aza a Yahuda. <sup>11</sup> A tsa tani na aza a Kiriti

---

\* **2:1** Abiki a Kain ka Amangarenkupa a da a ka isa "Pentekos," kpam kala ka abiki a ukapa u ilya ka. A tsu yan ta a da a kotso baci Abiki a Upasamgbana n a'ayin amangarenkupa. Kain ka amangare n kuci ka la vi an Yesu 'yangai a ukpa.

n aza a Arabi, gb̄a tsa pan̄aka le a ka dansa ukuna u manyan ma pige ma Kashil̄a ka yain n aletsu a tsunu.”

<sup>12</sup> Gb̄a le a yain majiyan, hal a lap̄an̄ai a ka wecemgbene, a da, “Ndyā kalen ka ukuna u naha vi?”

<sup>13</sup> Shegai aza roku a ka yanka le majari, a danai, “Mini ma cinwi ma a soi hal a gutukpai.”

*Bituru yankai kakum̄a ka ama kuḅari*

<sup>14</sup> Bituru 'yānḡai kushani kaḅolo n asuki kupa n uza u te vi, u danai, “Aza a va, aza a Yahuda n aza ḁa a'ari ndishi a Urishelima, panai na, kpam i kirana n ili i'ya ma tonuko ḁa. <sup>15</sup> Ama a na yi, so ḁa a soi tyoku ḁa i'ari uyawunsa wa. U yan t̄a usana cika, ama a tsu so a gutukpa n ulapa u uwule u kuci n usana u de naha wa. <sup>16</sup> Ili i na yi, ili i'ya Juwelu matsumate u danai i'ya:

<sup>17</sup> 'Kashil̄a ka danai,

A'ayin a makorishi a rawa baci, ma n̄ak̄a t̄a ya dem  
Kulu Keri.

Mmuku n ḁe aka n a'ali a ka yan t̄a kadyanshi ka  
ili i'ya ya tuw̄a.

Alobo a ka wene t̄a kuwene.

Nkoshi kpam ma lavutansa t̄a.

<sup>18</sup> A'ayin a nala yi ma n̄ak̄a t̄a agbashi a va aka n  
a'ali Kulu Keri,

kpam a ka dansa t̄a kadyanshi ka va.

<sup>19</sup> Ma wenike t̄a ikunesavu a zuba u alishi,  
n iryoci i savu a likimba;

wata, mpasa n akina,

n k̄anḡa ka alishi.

<sup>20</sup> Kaara ka woko t̄a karimbi,

uwoto kpam u woko san yavu mpasa.

Ili i na yi ya gitā tā kahu kain ka tsupige n ka ucira ka Magono ma Zuba ka tuwā.

<sup>21</sup> A'ayin a nala yi, uza dā baci dem u yain kvasu a asuvu a kala ka Magono ma Zuba wa tsarā tā iwauwi.' ◇

<sup>22</sup> Edā aza a Isara'ila panai na! An Yesu uza u Nazara u yansai gbā iryoci n ikunesavu yi, i wenike tā an Kashilā ka ka suki yi mayun, kpam gbā dē i reve tā nala i'ari. <sup>23</sup> Caupa Kashilā ka reve tā ili i'ya ya gitā, kpam i'ya u fobusoi vi i gitā tā an a nekei Yesu arā dē. I wandamgbana yi tā a mawandamgbani, i wuna yi a akere a aza a unyushi u cingi. <sup>24</sup> Shegai Kashilā ka wutukpā yi tā a asuvu a ucira u ukpā, kpaci ukpā wā n ucira u dā wā kanā yi wa. <sup>25</sup> Dawuda Magono u yan tā kadyanshī ka na a kaci ka Yesu, u danai, 'Magono ma Zuba mā tā nā mpa kain dem, ili i'ā la ya ne mu uwonvo wa, kpaci wā tā a kukere ku ulyaki ku vā.

<sup>26</sup> Adama a nala katakasuvu ka vā ka shadangu tā n mazangā,

unā u vā wa sala tā icikpali i ne, kpam ikyamba i vā ya rongo tā n uzuwa u uma.

<sup>27</sup> Kpaci vā asakā uma u vā a asuvu a kasaun wa, kpam vā asakā ikyamba i Uza u Uwulukpi u vunu i shama wa.

<sup>28</sup> Vu wenike mu tā tyoku dā ma tsarā uma, kpam vu shadangu mu tā n mazangā kpaci vā rongo tā kabolo nā mpa.' ◇

<sup>29</sup> "Ama a vā aza a Isara'ila, ma fudā tā ma dansa ukuna u akaya a tsunu Dawuda n adā bawu malalā. U kuwā dē, a cidangu yi, kpam kasaun ka



ne ka pini hal n ara. <sup>30</sup> Eyi matsumate ma, k<sub>p</sub>am Kashilā ka yanka yi t<sub>a</sub> kazuwamgbani, u da wa zuwa t<sub>a</sub> uza roku a asuvu a kagali ka ne u woko magono, tyoku d<sub>a</sub> u zuwa yi u woko magono.

<sup>31</sup> An Dawuda wenei nala, aku u yain kadyanshi ka ukuna u u'yang<sub>a</sub> u ukp<sub>a</sub> u Kawauwi, u da, 'A ka asans<sub>a</sub> n ikyamba i ne a kasaun wa, k<sub>p</sub>am i'ya ya shama wa.'

<sup>32</sup> "Kashilā ka 'yangas<sub>a</sub> t<sub>a</sub> Yesu u na vi a ukp<sub>a</sub>, k<sub>p</sub>am atsu dem tsu wene t<sub>a</sub> ukuna vi.

<sup>33</sup> "Gogo-na aya pini ndishi a ulyaki u Kashilā a asu u tsupige, k<sub>p</sub>am Kashilā Tata u ne u nak<sub>a</sub> yi t<sub>a</sub> Kulu Keri tyoku d<sub>a</sub> u zuwamgbanai. Gogo-na Yesu vi u tsunku tsu d<sub>e</sub> ka a a'aci a tsunu, aya u tukoi ili i'ya tsu wenei k<sub>p</sub>am tsa pana na vi. <sup>34</sup> Dawuda d<sub>a</sub> yuwai a zuba wa, shegai eyi n kaci ka ne u dana t<sub>a</sub>, 'Magono ma Zuba ma tonukoi Asheku a va, dusuku a ulyaki u va,

<sup>35</sup> hal n zuwa vu tadanku atokulalu a vunu a a'ene.'

<sup>36</sup> "Adama a nala, ed<sub>a</sub> aza a Isara'ila she i reve an Yesu d<sub>a</sub> i wandamgbanai nala vi, Kashilā ka gonuko yi d<sub>e</sub> Asheku n Kawauwi."

<sup>37</sup> An a panai nala, aku kadyanshi ki ka sawa le atakasuvu cika, a wecei Bituru n asuki a d<sub>a</sub> a'ari pini vi, "Atoku a tsunu, ndya tsa yan?"

<sup>38</sup> Bituru wushunku le, "U kan<sub>a</sub> t<sub>a</sub> i asaka tsicingi tsu d<sub>e</sub> i kpatala ubana a asu u Kashilā. A lyubugu d<sub>a</sub> a asuvu a kala ka Yesu Kirisiti, kotsu Kashilā ka cimbusuk<sub>a</sub> d<sub>a</sub> unyushi u cingi u d<sub>e</sub>, tsar<sub>a</sub> i tsar<sub>a</sub> kune ku Kulu Keri. <sup>39</sup> Kazuwamgbani ka Kashilā ka na ki adama a d<sub>e</sub> a d<sub>a</sub> na mmuku n

◇ 2:35 Ishp. 110:1; Luk. 20:42.

de hal gbam n aza da a'ari a mbari: aza da Magono ma Zuba Kashila ka tsunu ka isa ubana ara ne.”

<sup>40</sup> Bituru lyai kapala n u yanki le kuɓari cika, n u dansi, “Wauwai kaci ka de a upana u ikyamba u da wa tuwa a kaci ka ama a cingi a a'ayin a na yi.” <sup>41</sup> Ama ushani a wushuku ta n kadyanshi ka ne, aku a lyubugu le. Ama yi a raɓansa ta ama azu a tatsu (3,000) aza da a bolomgbonoi n atoni kain ki.

### *Tyoku da Atoni yi a rongoi*

<sup>42</sup> A gonukoi ugboji u le a asu u uwenishike u asuki vi, n a rongi kaɓolo, n a lyayi ilikulya, n a yanyi kvasu. <sup>43</sup> Aku ya dem panai uwonvo n majiyan, adama a iryoci n ikunesavu i'ya Kashila ka yansa a akere a asuki. <sup>44</sup> Gba Atoni yi a bolomgbonoi a asu u te, n a yanyi manyan n ili i'ya a tsarai kaɓolo. <sup>45</sup> A dengishei utsari u le aku a neshei ama da bawu a'ari n ili dere tyoku da a ka ciga. <sup>46</sup> Kain dem a tsu gbashika ta Kashila a Kuwa ku Kashila, a gawunsusa a a'uwa a le a lyai ilikulya kaɓolo n katakasuvu ka te. <sup>47</sup> N a cikpali Kashila kain dem, kpam gba ama yi a ka naka le ta tsupige. Kain dem Asheku a dokusu le ta ama ushani aza da a ka tsarasa iwauwi.

## 3

### *A tanasai kawunu*

<sup>1</sup> Kain ka te, Bituru n Yahaya a ka bana a Kuwa ku Kashila a'ayin a uyan kvasu, n ulapa u uwule u tatsu u kuvuli. <sup>2</sup> A utsutsu u da a ka isa Utsutsu u Shinga, vuma roku da pini uza da a matsai kawunu. Kain dem a tsu canga yi ta ubana a

utsutsu u Kuwa ku Kashilā vi tsarā u foli kune a asu u aza da a ka uwusa pini. <sup>3</sup> An u wenei Bituru n Yahaya a ka uwa a Kuwa ki, u folo le kune. <sup>4</sup> Bituru n Yahaya a webele yi, aku Bituru tonuko yi, “Kondono tsu.” <sup>5</sup> Kawunu ki ka zuwa ta uma u ne a ara le n u wundi wa tsarā kune.

<sup>6</sup> Bituru tonuko yi, “Ma n ikebe wa, shegai ili i'ya mari n i'ya, i'ya ma naka vu. A asuvu a kala ka Yesu Kawauwi, uza u Nazara, 'yanga vu wala.” <sup>7</sup> Pini nala, u kana yi kukere ku ulyaki u radagba yi, aku a'ene n a'esha'ene a ne a gbamai. <sup>8</sup> Kute-kute, u zadagbai u 'yangai kushani u gitai nwalu, u uwai a Kuwa ku Kashilā ki kabolo n ele, wa wala hal n u imkpusi n u cikpali Kashilā. <sup>9</sup> Gba ama yi a wene yi n u wali n u cikpali Kashilā. <sup>10</sup> A wene ta ukuna u pige a yain kpam majiyan ma ili i'ya i gitai n eyi, kpaci a reve ta an aya wari u tsu dusukusu a Utsutsu u Shinga u Kuwa ku Kashilā n u foli vi.

### *Kubari ku Bituru a Kuwa ku Kashilā*

<sup>11</sup> Cina vuma vi buwai kabolo n Bituru n Yahaya, ama a wuranasai n ilyadi a tuwai pini a kafalaka ka Kuwa ku Kashilā ka a ka isa Kafalaka ka Solomo n a yanyi majiyan a kaci ka vuma vi. <sup>12</sup> An Bituru wenei nala, u tonukoi ama yi, “Aza a Isara'ila, ndya i zuwai ya yan majiyan ma ili i na yi? Ndyai zuwai ya wundya tsu yavu n ucira u kaci u tsunu, ko kpam adama a utono u Kashilā u tsunu u da i zuwai vuma na vi u walai? <sup>13</sup> Kashilā ka Ibrahi, n Kashilā ka Ishaku, n Kashilā ka Yakubu, Kashilā ka akaya a tsunu ka ka radagbai kagbashi ka ne Yesu. Aya uza da i nekei, kpam i 'yuwan yi a kapala ka Bilatu gomuna, gba n uciga u da Bilatu wari wa

ciga u asaka yi. <sup>14</sup> Shegai i 'yuwain Uza u Shinga vi, uza da wari bawu unyushi, i foloi a asanka da uza da u wunai ama. <sup>15</sup> I wunai uza da wari kami ka uma, shegai Kashila ka 'yangasa yi a ukpa. Atsu tsu wene ta ukuna u nala vi. <sup>16</sup> Kawunu ka na ki ka тана та adama a da u pityanangi n Yesu. Vuma da gai na vi kpam i reve yi ta! U тана та gba gba an u wushuki n Yesu, gba de i wene ta tyoku da ukuna u na vi u gitai.

<sup>17</sup> "Ama a va, n reve ta a asuvu a unamba u ureve u da i yain ili i nala yi, tyoku da aza da a ka tono n ada dem a yain. <sup>18</sup> Kpam nala Kashila ka shadangi ili i'ya u danai a una u ntsumate, 'Kirisiti u ne wa pana ta ikyamba.' <sup>19</sup> Adama a nala kpatalai i asaka unyushi u cingi u de, i gono a asu u Kashila, tsara a cimbusuka da unyushi u cingi u de gba, Magono ma Zuba kpam ma naka ta atakasuvu a de uwunvuga. <sup>20</sup> Wa sukunku da ta Kirisiti Kawauwi ka u dangasai caupa; wata, Yesu. <sup>21</sup> U kan ta Yesu rongu a zuba, hal ubana a'ayin a da a ka gonuko ili dem i woko i savu, tyoku da Kashila ka danai caupa a una u ntsumate n shinga. <sup>22</sup> Kpaci Musa dana ta, 'Magono ma Zuba Kashila ka de, ma sukunku da ta matsumate a asuvu a aza a de tyoku u va. U kan ta i pana ili i'ya wa tonuko da.' ◇ <sup>23</sup> Kpam, 'Wa kan ta gba uza da u kpada upanaka matsumate ma nala mi, a ka pece yi ta n ama a ne gba a wacinsa yi.' ◇

<sup>24</sup> "Mayun, gba ntsumate n da n yain kadyanshi ki, ili i'ya i kan tun Sama'ila hal ubana, a yan ta kadyanshi ka a'ayin a na yi. <sup>25</sup> Eda mmuku ma

ntsumate mi, eḏa kpam ya lya agadu a kazuwamgbani ka Kashila ka yankai akaya a ḏe, an u tonukoi Ibirahi, ‘A asu u mmuku n vunu n ḏa a ka zuwuka gba agali a likimba unā u shinga.’ ◇ <sup>26</sup> An Kashila ka ḏangasai kagbashi ka ne, u gita ta u suku yi ara ḏe tsara u zuwuka ḏa unā u shinga, u zuwa ya dem a asuvu a ḏe u asaka tsicingi tsu ne.”

## 4

### *A kana Bituru n Yahaya*

<sup>1</sup> A'ayin a ḏa Bituru n Yahaya a'ari uyanka ama kadyanshi, aku adarakpi n azapige, n uzapige u adagari a Kuwa ku Kashila, n aza a Sadusi\* a tuwai ara le. <sup>2</sup> A yain upan kpaci asuki yi a ka wenishike ta ama, a danai akushe a ka 'yanga ta a ukpa tyoku ḏa Yesu 'yangai. <sup>3</sup> A kana le a gbagirya le hal kain ka wansai, kpaci n kuvuli ka. <sup>4</sup> Shegai ama ushani aza ḏa a panai kubari ki a pityanangu ta, pini nala, kakuma aza ḏa a pityanangi vi ka doki ushani hal ka rawai ama azu a tawun (5,000) a'ali.†

<sup>5</sup> An kain ka wansai, aku azapige a aza a Yahuda yi, na nkoshi n le, n awenishiki a Mele a bolomgbonoi a Urishelima. <sup>6</sup> Hanana Magono ma Adarakpi wa ta kabolo n Kayafa n Yahaya n Alizanda n gba aza ḏa a'ari kumaci ku te n Magono ma Adarakpi mi. <sup>7</sup> A zuwai Bituru n Yahaya a mere ma le, a wece le, “N ucira u eni u ḏa ko kpam n kala ka eni ka i yain ili i na yi?”

---

◇ **3:25** Kag. 22:18. \* **4:1** Aza a Sadusi yi, azapige a aza a Yahuda a ḏa aza ḏa bawu a wushuki n u'yanga u ukpa. † **4:4** A kece aka na mmuku aza ḏa a'ari atoni wa.

<sup>8</sup> Shegai Bituru an wari ushadangi n Kulu Keri u tonuko le, “Eda azapige na nkoshi ma ama, <sup>9</sup> wece da ya wece tsu ara a kaci ka ukuna u shinga u da a yankai vuma na vi, kpam ya ciga i reve uza da u tanasa yi vi? <sup>10</sup> Tsa ciga ta gba de i reve hal n aza a Isara'ila dem, a asuvu a kala ka Yesu uza u Nazara uza da i wandamgbanai kpam Kashila ka 'yangasa yi a ukpa vi, a asuvu a kala ka nala ka vuma na wari kushani n alafiya a kapala ka de. <sup>11</sup> Tagarada u Kashila u dana ta aya

“Katali ka aza a kuma a 'yuwain

ka ka lakai kalen cika a asu u kuma.’ ◇

<sup>12</sup> “Yesu nala vi da koshi wari n ucira u wauwa uma. Gba a asuvu a likimba, kala ka ne ka koshi ama a ka fuda a isa aku a tsara iwauwi.”

<sup>13</sup> Azapige yi a yain majiyan cika an a wenei Bituru n Yahaya bawu a panai uwonvo u kadyan-shi, kpaci a reve ta ama a na yi a'a n ureve u roku wa. Kpam a reve le ta a'ayin a da a'ari kaɓolo n Yesu. <sup>14</sup> An kpam azapige yi a wenei vuma da a tanasai vi kaɓolo n asuki yi, aku a nambai ili i'ya a ka dana. <sup>15</sup> A tonukoi asuki yi a wuta pini a asu u Asheshi a Pige yi, ele kpam a sheshei.

<sup>16</sup> A danai, “Ndy a tsa yan n ama a na yi? Kpaci gba aza da a ka rongo a Urishelima a reve ta an a yain iryoci i pige a akere a ama a na yi, tsa tani n tyoku da tsa dana nala wari wa. <sup>17</sup> Shegai tsara kotsu ukuna vi u tambura a asuvu a ama wa, asaka tsu barana le a doku a tonuko uza ukuna a asuvu a kala ka nala ki wa.”

◇ 4:11 Ishp. 118:22; Mak. 12:10; Luk. 20:17.

18 Pini nala, a isaï asuki yi, a ɓarana le kotsu a doku a tonuko uza ukuna ko a wenishike a asuvu a kala ka Yesu wa.

19 Shegai Bituru n Yahaya a wushunku le, “Mai ɗa wa wari a asu u Kashilā tsu lai upana kadyanshi ka ɗe n ka ka Kashilā? Kondoï ve i wene. 20 Kpaci ātsu gai tsa fuda tsa pada bini a kaci ka ili i'ya tsu panai kpam tsu wenei wa.”

21 An a doki a ɓarana le, aku a asakā le. A nambai tyoku ɗa a ka yan a yan le mavura, kpaci gbā ama a ka cikpala tā Kashilā adama a ili i'ya i gitai.

22 Vuma ɗa a matsai kawunu ki kpam a tānāsā yi n ukunosavu vi, ayen a ne a la tā amangare.

### *Atoni yi a yain kvasu*

23 An a asakaī Bituru n Yahaya, a banai a asu u aza a le, a yanka le alabari a ili i'ya adarakpi a pige n azapige yi a tonuko le. 24 Ele kpam an a panai nala aku a 'yangāsaī alāgats̄u a le ubana a asu u Kashilā n katakasuvu ka te a danai, “Ashekapige, uza ɗa u yain zuba n likimba n kushivā n gbā ili i'ya i'ari a asuvu a le. 25 A asu u Kulu Keri, vu yain kadyanshi n kagbashi ka vunu; wata, akaya a tsunu Dawuda, vu da, ‘Nɗya i zuwai Awulawa a yain upan?

Nɗya i zuwai ama a ka yansa afōbi a gbani?

26 Ngono n likimba kpam a fōbusoi kushulu, aza ɗa a ka tono n ama kpam dem a ɓolomgbonoi a'aci a le,

a ka yan tsilala n Magono ma Zuba n Kawauwi ka u suki.’ ◊

27 “Mayun ɗa ili i na yi i gitā tā pini na a Urishelima. Hiridu† magono n Bontu Bilatu a

◊ 4:26 Ishp. 2:1-2.

6olomgbono t̄a kaci n Awulawa n aza a Isara'ila n a yangi tsilala n kagbashi ka vunu Yesu Uza u Uwulukpi, uza ɗa vu gonukoi Kawauwi. <sup>28</sup> A 6olomgbonoi tsar̄a a yain ili i'ya vu fobusoi ya git̄a a asuvu a ucira u vunu n tyoku ɗa va ciga. <sup>29</sup> Gogo-na Magono ma Zuba, kondo ve tyoku ɗa a ka ciga a ɓishinka tsu manyan. Atsu agbashi a vunu a ɗa, ne tsu ucira u ɗa tsa yan kadyanshi ka vunu bawu uwonvo. <sup>30</sup> Rongo usukusu kukere ku ut̄an̄asa, vu yansa iryoci n ikunesavu a asuvu a kala ka kagbashi ka vunu Yesu Uza u Uwulukpi.”

<sup>31</sup> An a kotsoi kvasu, aku asu u ɗa a 6olomgbonoi vi u gb̄ad̄ai. A shadangu le n Kulu Keri, a rongoi udansa kadyanshi ka Kashil̄a bawu uwonvo.

### *Atoni a nemgbenei ucanga u le*

<sup>32</sup> Gb̄a ka6olo ka atoni ki katakasuvu ka te ka le, uyawunsa u ɗa le dem u te, uza w̄a la u danai ili i'ya w̄ari n i'ya vi i ne i'ya koshi wa, shegai i gb̄a le. <sup>33</sup> N ucira u pige u ɗa asuki yi a danai ukuna u u'yanḡa u Yesu Asheku a ukpa. Ukuna u shinga u Kashil̄a ushani w̄a t̄a a kaci ka ya dem a asuvu a le. <sup>34</sup> Kpam uza w̄a la u nambai ili a asuvu a le wa, kpaci gb̄a aza a uyamba ko a'uwa a rongo t̄a udengishe n a tukusi ikebe yi, <sup>35</sup> a ka zuwusa a kapala ka asuki yi. Kpam a ka pecishike i'ya ko ya wa tyoku ɗa m̄b̄al̄a n le m̄ari.

<sup>36</sup> Nala uza roku uza u kala Isuhu yain, eyi uza u Levi u ɗa, kumaci ku uyamba u Sayipuru, uza ɗa asuki yi a tsu is̄a Bar̄anaba; (wata, Uza ɗa wa Gbamatangu Asuvu.) <sup>37</sup> U denge t̄a uyamba u ne u roku, u tukoi ikebe yi a kapala ka asuki yi.



## 5

*Ananiya n Sahiratu*

<sup>1</sup> Vuma roku da pini uza u kala Ananiya n uka u ne Sahiratu, u dengei uyamba u ne u roku. <sup>2</sup> Aku u sokongi ikebe i roku n ureve u uka u ne, u tukoi i'ya i buwai vi u zuwai a kapala ka asuki u da i'ya gai la vi gba.

<sup>3</sup> Bituru wece yi, “Ananiya, nida vu asakai Kanangasi\* ka uwai a katakasuvu ka vunu? Vu yankai Kulu Keri kaɓan, kpam vu sokongi ikebe i roku a asuvu a i'ya vu dengei uyamba vi? <sup>4</sup> Uyamba vi u vunu u da ko vu dengei ko bawu vu dengei. Vu denge baci, va fuda ta va yanka ikebe yi tyoku da va ciga. Nida vu yawunsai vu yain ucun u ukuna u naha? Atsa vu yankai kaɓan wa, Kashila ka vu yankai.”

<sup>5</sup> N u pani kadyanshi ki, aku u rukpai u kuwai. Ama da kpam a panai ukuna vi uwonvo u kana le cika. <sup>6</sup> Aloba a roku a cacai yi ikyamba yi n aminya a eri a wutukpa yi a kunu ki, a ba a cidangu yi.

<sup>7</sup> An ulapa u uwule u tatsu u wurai, aku uka u ne uwai, shegai u reve ili i'ya i gitai wa. <sup>8</sup> Aku Bituru wece yi, “Utyoku u ikebe i'ya i dengei uyamba u de i'ya na vi?”

U danai, “Utyoku u da gai la vi.”

<sup>9</sup> Bituru wece yi, “Nida i bolomgbonoi unā tsara i kondo Kulu Keri ku Magono ma Zuba? Pana nwalu ma aza da a cidangi vali u vunu a utsutsu, kpam a ka canga vu ta dem a wutukpa vu.”

---

\* **5:3** Kanangasi; wata, “Shetan” kala ka dem ka Kalapansi.

<sup>10</sup> Kute-kute u rukpai a kapala ka Bituru u kuwai. An alobu yi a uwai, a cina yi cina u kuwa dem de. Aku a canga yi a ba a cidangi evu n vali u ne. <sup>11</sup> Atoni yi n ama da a panai alabari a ukuna vi a panai uwonvo cika.

*Asuki a tanaasai ama ushani*

<sup>12</sup> Asuki yi a yain iryoci n ikunesavu i roku ushani a asu u ama. Atoni yi a tsu bolomgbono ta a Kafalaka ka Solomo a Kuwa ku Kashila. <sup>13</sup> Shegai a asuvu a ama da a buwai, uza wa la u fudai u gbamai asuvu u bolomgbonoi kaci n ele wa. Gba n nala, ama a ka nakasa le ta tsupige.

<sup>14</sup> Gba n nala aka n a'ali ushani a ka wushukusu n Asheku. <sup>15</sup> Hal gbam ama a'ari a uwutukpusa aza a mballa a ure n a zuwusi le a zuba u ivamkpatsu n ajiba tsara Bituru wa wura baci kulu ku ne ku sawa le. <sup>16</sup> Ama ushani a ilyuci i'ya i'ari evu n Urishelima a'ari utukuso aza a mballa n aza da ityoni i cingi ya yan le mavura, kpm gba le a tana ta.

*A ukai asuki a kuwa ku a'ali*

<sup>17</sup> Magono ma Adarakpi n aza da a'ari n eyi; wata, aza a Sadusi a yain malyon cika. <sup>18</sup> Pini nala, a kana asuki yi a ukai a kuwa ku a'ali. <sup>19</sup> Shegai an kayin ka yain, aku katsumate ka Magono ma Zuba ka kukpusai itsutsu yi u wutukpa le, ka danai, <sup>20</sup> "Banai i shamgba a ulanga u Kuwa ku Kashila i tonuko ama gba ukuna u uma u savu."

<sup>21</sup> N a pani nala, aku a uwai a Kuwa ku Kashila ki n usana u de a gitai uwenishike.

A'ayin a da Magono ma Adarakpi n aza da a'ari kabolo n eyi a bolomgbonoi, a isai Asheshi a Pige†

nā nkoshi n pige m aza a Isara'ila gba, aku a sukunki aza a kuwa ku a'ali ki a tuko asuki yi.

<sup>22</sup> Shegai an adagari a Kuwa ku Kashilā ki a banai pini a kuwa ku a'ali ki a cina le pini wa, a gonoi a yain alabari a danai, <sup>23</sup> “Tsu cina tā kuwa ku a'ali ki ugbagiri, aza da kpam a ka wundya kuwa ki alya pini a itsutsu, shegai an tsu giduwai tsu cina pini uza wa.”

<sup>24</sup> An uzapige u adagari a Kuwa ku Kashilā ki n adarakpi a pige yi a panai nala, aku a dambulai cika n a yanyi kacoco ka ili i'ya ukuna u na wa tuko.

<sup>25</sup> Uza roku u tuwai u tonuko le, “Wundyai, ama da i ukai a kuwa ku a'ali ki, alya pini kushani a Kuwa ku Kashilā a ka wenishike ama.” <sup>26</sup> Uzapige u adagari vi n aza da a ka tono yi vi a ba a tukoi asuki yi, shegai n ucira wa, kpaci a ka pana tā uwonvo u ama kotsu a varasa le n atali wa.

<sup>27</sup> An a tuwai n ele, aku a shamkpa le a kapala ka Asheshi a Pige, Magono ma Adarakpi ma tonuko le, <sup>28</sup> “Tsu tonuko da tā, kotsu i doku i wenishike a asuvu a kala ka nala ki wa, shegai i kyawan de Urishelima n uwenishike u de hal gbam ya ciga i takpa tsu ukpa u ne.”

<sup>29</sup> Bituru n asuki yi a wushunku le, “U gan tā tsu gorimuko udani u Kashilā kapala n u vuma. <sup>30</sup> Kashilā ka akaya a tsunu u 'yangasa tā Yesu uza da i wandamgbanai a mawandamgbani. <sup>31</sup> Aya Kashilā ka zuwai a ulyaki u ne, u woko Uzapige n Kawauwi tsara u kukpunka aza a Isara'ila ure u u'asaka tsicingi tsu le, kpam a tsara ucimbusa u unyushi u cingi u le. <sup>32</sup> Atsa tsu wenei ukuna vi, nala kpam dem Kulu Keri ku tonukoi ama ukuna

u na vi mayun ɗa. Kashila ka suku ta Kulu Keri ku ne a asu u aza ɗa a gorimuko yi.”

<sup>33</sup> An a panai nala, aku a panai upan cika hal a ka ciga a wuna le. <sup>34</sup> Shegai a asuvu a Asheshi a Pige yi, Kafarishi ka roku ka pini a ka isa Gamaliya. Kawenishiki ka Mele ka uza ɗa ama a ka naka tsupige. U 'yangai u danai a wutukpa le ve a ulanga. <sup>35</sup> Pini nala, u tonukoi Asheshi a Pige yi, “Atoku a va aza a Isara'ila, kiranai n ili i'ya ya ciga i yanka ama a na yi. <sup>36</sup> Ayen a ɗa a wurai, a yan ta vuma roku uza u kala Tuda uza ɗa u bidyai kaci ka ne n kalen cika. Ama amangatawanishi (400) a ɗa a bolomgbonoi kaci n eyi. Shegai a wuna yi. Aza ɗa kpam a ka tono yi vi a wacuwai, ko i te ukuna u nala u lekeɗe wa. <sup>37</sup> An u ne u kotsoi, vuma roku kpam uza u kala Yahuza uza u Galili u wutai a'ayin a ɗa a ka yan makeci. Eyi dem tsarai ama ɗa a tono yi ushani. Shegai eyi dem a wuna yi, atoni a ne a wacuwai. <sup>38</sup> Gogo-na adooki a va a ɗa na a kaci ka ama a na yi, tsu asaka le shiriri. Manyan ma a ka yan na vi n ucira u kaci u le u ɗa baci a ka yan ma, a ka barakpa wa a ka kpaɗa ta ma. <sup>39</sup> N ucira u Kashila u ɗa baci kpam, ya fuda ya bishinka le wa, shegai i boluko kaci ka de ukuna n Kashila gbani.”

<sup>40</sup> A wushuki n adooki a ne, a isa asuki yi a bawan le. Aku a bara le kotsu a doku a yain kadyanshi n kala ka Yesu wa. Pini nala, a asaka le a laza.

<sup>41</sup> An asuki yi a laza pini a kapala ka Asheshi a Pige yi, aku a gitai mazanga, kpaci a wene ta a rawai a yan le mavura adama a kala ka Yesu.

<sup>42</sup> Kain dem a tsu bana ta a Kuwa ku Kashila n a

wenishiki ama n a dansi Yesu aya Kawauwi, hal n a toni a'uwa a'uwa a ama.

## 6

### *Udangasa u ama a shindere*

<sup>1</sup> A a'ayin a nala yi an kakuma ka Atoni kari a udoku, aku aza a kaletsu ka Tsiheline a ka yan tsali a kaci ka aza a kaletsu ka Tsiyahuda, an a kpaɗai ukirana na nranan le a asu u unakasa le ilikulya ushani kain dem tyoku u aza da a buwai. <sup>2</sup> Asuki kupa n ama a re yi a bolongi gba Atoni yi asu u te a danai, “U gan tsu asaka kuɓari ku kadyanshi ka Kashila tsu uwa kapeci ka ilikulya wa. <sup>3</sup> Adama a nala atoku, dangasai ama a shindere asuvu a de aza da a'ari n ahali a shinga, ushadangi n Kulu Keri n ugboji, kotsu tsu naka le manyan mi. <sup>4</sup> Atsu tani tsu tsara kabala ka kvasu n uwenishike u kadyanshi ka Kashila.”

<sup>5</sup> Ama yi gba a panai kayanyan ka ili i'ya a danai. A dangasai Isitifanu vuma da u pityanangi cika kpm ushadangi n Kulu Keri, n Filibu, n Burukoro. A dangasa ta dem Nikana, n Timan, n Baramina, n Nikala vuma u Antakiya uza da u uwai utono u adini a aza a Yahuda. <sup>6</sup> Ama a na a da a bankai a asu u asuki yi, aku a yain kvasu a tafanku le akere.

<sup>7</sup> Kadyanshi ka Kashila ka tamburai, kakuma ka Atoni a uyamba u Urishelima ka doki cika, kpm adarakpi ushani a pityanangi.

### *A kanai Isitifanu*

<sup>8</sup> Isitifanu ushadangi n kune ku ukuna u shinga u Kashila n ucira, u yain iryoci n ikunesav a mere ma ama. <sup>9</sup> Aku aza a kagata ka Kashila ka a ka isa

Kagata ka U'asaka Agbashi, a gitai kananamgbani n Isitifanu. Ama a na yi aza a Yahuda a da a wutai a Sirani n Alizandariya nala dem n aza a kaƙon ka Kilikiya n Asiya. <sup>10</sup> Shegai adama a ureve u kadyanshi ka ne kaƙolo n Kulu Keri a fuda a nanamgbana n eyi wa.

<sup>11</sup> A leshei ama roku usokongi tsara a yain kaƙan, a dana, "Tsu panaƙa yi ta n u wishisi Musa n u yanki Kashila kadyanshi ka cingi."

<sup>12</sup> Nala a 'yangaƙai atakasuvu a ama n azapige n awenishiki a Mele, aku ele tani a kanaɗi Isitifanu a banka yi a kapala ka Asheshi a Pige. <sup>13</sup> Aku aza a kaƙan yi a tonukoi Asheshi a Pige yi, a danai, "Vuma na kain dem da wa yansa kadyanshi ka gbani a kaci ka asu u uwulukpi u na n Mele ma Musa. <sup>14</sup> Tsu panaƙa yi ta n u dansi, Yesu uza u Nazara nala vi wa wasa ta asu vi aku u savaɗa gba agadu a da Musa asanka tsu."

<sup>15</sup> Gba ama da a'ari pini ndishi a asu u usheshe vi a zuwuka yi a'eshi, aku a wenei upetiwa'eshi u ne u wokoi tyoku u katsumate ka zuba.

## 7

### *Isitifanu dansai a kapala ka Asheshi a Pige*

<sup>1</sup> Magono ma Adaraƙpi ma wece yi, "Ikuna i na yi mayun da i'ari?"

<sup>2</sup> Aku Isitifanu danai, "Eɗa atoku a va n azapige, panaƙa numu, Kashila uza u tsupige u wenike ta kaci ka ne a asu u akaya a tsunu Ibrahi, a'ayin a da wari a uyamba u Masopotamiya kahu u ba u dusuku a Haran. <sup>3</sup> U tonuko yi, "Yanga a uyamba u de, vu asaka atoku a vunu, vu bana a uyamba u

da ma wenike vu.’ <sup>4</sup> Aku u 'yangai a uyamba u aza a Kaldiya u ba u dusuki a uyamba u Haran.

“An tata u ne u kuwai da Kashila ka tuko yi a uyamba u da i'ari ndishi gogo-na vi. <sup>5</sup> Shegai u naka yi agadu a uyamba vi ko udeshe u te wa. U yan ta kazuwamgbani n eyi wa naka yi u da, eyi na mmuku n tsikaya n da ma tuwa a kucina ku ne, ko an u wokoi bawu wari n maku a'ayin yi. <sup>6</sup> Kashila ka tonuko yi kpm, 'Kagali ka vunu ka gbasha ta a uyamba u tsumoci. Aza a uyamba vi kpm a ka foro le ta cika hal ayen amangatawanishi (400). <sup>7</sup> Ma yanka ta aza a uyamba u da a gbashikai vi mavura. Nala u wura baci, aku a tuwa a gbashika mu a asu u na vi.’ <sup>8</sup>

<sup>8</sup> “Kashila ka naka yi kazuwamgbani a ukuna u ukida u kacombi. An Ibrahi matsai Ishaku, aku u kida yi kacombi eyi n a'ayin kulla. Ukuna vi u lya ta kelime an Ishaku matsai Yakubu, kpm an Yakubu matsai isheku i tsunu aza da a wokoi aletsu kupa n a re.

<sup>9</sup> “Shegai an mmuku n Yakubu mi ma takuma vangu u le Isuhu upan, aku a denge yi ubana a uyamba u Masar. Shegai Kashila ka ta n eyi, <sup>10</sup> kpm u wutukpa yi a asuvu a upana u ikyamba. Kashila ka naka yi ugboji, kpm u naka yi mapasa ma shinga ara Firi'auna† magono ma aza a Masar. U zuwa yi u lyai tsugono tsu Masar, u zuwa yi kpm u kirana n kuwa ku tsugono.

<sup>11</sup> “Kambulu ka cipai a uyamba u Masar n Ka'ana ka6olo n upana u ikyamba u pige, hal isheku i tsunu a nambai ilikulya. <sup>12</sup> An Yakubu panai a da ilya i'ya pini a Masar, aku u suki isheku

◇ 7:3 Kag. 12:1. ◇ 7:7 Kag. 15:13-14.

i tsunu ɗe, nwalu n kagita n ɗa la vi. <sup>13</sup> Nwalu n le n ire n ɗa Isuhu toɗugboi kaci ka ne ara le, u wenike le kpam ara Firi'auna.

<sup>14</sup> “Aku Isuhu sukunki tata u ne Yakubu u tuwa, n atoku a ne gba ama amangatatsunkupa n ama a tawun. <sup>15</sup> Yakubu gonoi a Masar, nte u kuwai ɗe n isheku i tsunu. <sup>16</sup> Aku a purai ikyamba i le a gonuko le a Shekem, a zuwa le a kasaun ka Ibirahi tsilai n ikebe i azurufa\* a asu u mmuku n Hamo pini a Shekem vi.

<sup>17</sup> “An a'ayin a yain evu a ɗa Kashila ka shadangu kazuwamgbani ka ne ara Ibirahi, aku kakuma ka ama a tsunu ka doki cika a uyamba u Masar, <sup>18</sup> hal a yain magono ma roku uza ɗa bawu u revei Isuhu. <sup>19</sup> Magono ma nala mi ma ryafa ta isheku i tsunu aku u zuwa le a panai ikyamba, hal gbam u zuwai a varangusi mmuku n shili tsara a yain uma wa.

<sup>20</sup> “A a'ayin a nala yi a ɗa a matsai Musa, aya la tsulobo tsu de, aku a wo yi a kuwa ku tata u ne uwoto u tatsu. <sup>21</sup> U kana ta a wutukpa yi pini a kuwa ki, pini nala, makere ma kuwa ku Firi'auna ma tsara yi u wo yi yavu maku ma ne hal u gbonguroi. <sup>22</sup> A wenishike yi gba ugboji u aza a Masar, eyi tani vuma ɗa uza u ucira a asu u kadyanshi n manyan ma ne.

<sup>23</sup> “An Musa yain ayen amangare, aku u da asaka ve u ba u kondo ama a ne aza a Isara'ila. <sup>24</sup> An u wenei vuma u Masar u roku wa lapa vuma u ne uza u Isara'ila, aku u ba u banga yi u wunai vuma

---

\* **7:16** Kondo “Ikebe i azurufa” a kaci ka idani ka “Ikebe” a Idani i U6anga.



vi. <sup>25</sup> N u dani atoku a ne a ka reve an ara ne da Kashila ka wutukpa le, shegai a reve wa.

<sup>26</sup> “An kain ka wansai, u wenei ama a re aza a Isara'ila a ka shilakana, aku u tuwai tsara u wansa le, u danai, ‘Eda ama a na, uza n utoku u da i'ari, nida ya shilakana?’

<sup>27</sup> “Uza da u gitai n kushulu ki u gamai Musa, u danai, ‘Ya zuwa vu vu woko uzapige n uza u afada a tsunu?’ <sup>28</sup> Wata, wuna da va ciga vu wuna mu tyoku da vu wunai vuma u Masar nala nayain vi?’ ◊ <sup>29</sup> An Musa panai nala, u sumai u gonoi a uyamba u tsumoci a Midiya, nte u matsai pini de mmuku ma a'ali n re.

<sup>30</sup> “An ayen amangare a wurai, aku katsu-mate ka zuba ka wenikei kaci ka ne ara Musa a kakamba evu n Masasa ma Sinai. U wenei katsumate ki a asuvu a katyashi ka akina a asuvu a madanga ma kenu. <sup>31</sup> An u wenei ili i nala yi, uwonvo u kana yi cika, aku u rabai evu tsara u wene i'ya mai. Aku u panai kalagatsu ka Magono ma Zuba ka tonuko yi, <sup>32</sup> ‘Mpa Kashila ka isheku i vunu, Kashila ka Ibirahi, n Kashila ka Ishaku, n Kashila ka Yakubu.’ Aku ikyamba i Musa i gitai uje, u fuda gbam kpam u webele wa.

<sup>33</sup> “Magono ma Zuba ma tonuko yi, ‘Fodo akpata a vunu, kpaci asu u da vari na vi wa ta uwulukpi.

<sup>34</sup> Mayun n wene ta mavura ma a ka yanka ama a va a da a'ari a Masar, n pana ta ma'ika ma le, kpam n tuwa ta tsara n wauwa le. Tuwa gogo n suku vu a Masar.’ ◊

<sup>35</sup> “Musa da a 'yuwain vi, hal a danai, ‘Ya zuwa vu vu woko uzapige n uza u afada a tsunu vi?’

Aya Kashilā ka suki u woko uzapige n kawauwi n ubāngā u katsumate ka zuba ka ka wenikei kaci ka ne ara ne a maḍanga mi. <sup>36</sup> U wutukpā le a asuvu a Masar, u yain kpam iryoci n ikunesavu a uyamba u Masar a Mala ma Shili† hal ayen a amangare a kakamba.

<sup>37</sup> “Musa na vi ḍa u tonukoi aza a Isara'ila, ‘Kashilā ka ḍangasaka ḍa tā matsumate a asuvu a ama a ḍe tyoku u va.’ ◇ <sup>38</sup> U ḍolomgbonoi ama yi a kakamba. U rongoi ḍe kaḍolo n isheku i tsunu n katsumate ka zuba ka ka yanka yi kadyanshi a Masasa ma Sinai† mi. Aya kpam u naḱa yi kadyanshi ka unāḱa uma a asu u Kashilā, aku u tonuko tsu.

<sup>39</sup> “Shegai isheku i tsunu a 'yuwan yi upanāka, a 'yuwan yi. A'ari uyan maluwa a gono a Masar. <sup>40</sup> A tonukoi Haruna, ‘Yanka tsu ameli a ḍa a ka tono n aṭsu. Kpaci Musa ḍa wutaṭi n aṭsu a Masar vi tsu reve ili i'ya i gitai n eyi ḍe wa.’ ◇ <sup>41</sup> A'ayin a nala yi a ḍa a yain kameli ka ka rotsoi madyondyom. A yanka yi uḍarāḱpa, a'ari uyan mazāngā a adama a ili i'ya a yain n akere a le. <sup>42</sup> Adama a nala, Kashilā ka kpatalāka le kucina, u aṣaka le a gbashika atala, tyoku ḍa wari ukorongi a asuvu a itagarāḍa i Ntsumate,

‘Eḍa aza a Isara'ila, i kiḍaga mu nnama kpam i yanka mu uḍarāḱpa a a'ayin a ḍa i rongoi a kakamba ayen amangare wa.

<sup>43</sup> I naḱai asu u ḍa a ka gbashika Meleki kameli tsupige, hal n kameli ka katala ka ḍe Rafani.

◇ 7:37 U.Ml. 18:15. ◇ 7:40 Uwt. 32:1.

I yain ameli a nala yi i gbashika le. Adama a nala ma tutsuku dā tā de a kucina ka uyamba u Babila.’  $\diamond$

44 “Caupa isheku i tsunu a'ari tā n Katani ka Kavasū ka iryoci a kakamba. A yan tā ka tyoku dā Kashilā ka tonukoi Musa yain ka. 45 An ayen ushani a wurai, aku Joshuwa† tonoi n kuvon n iyamba i Awulawa, uyamba u dā Kashilā ka loko le. A cangai Katani ka Kavasū† ki ubana a uyamba u savu vi. Nte kāri pini hal utuwā a'ayin a Dawuda magono. 46 Kashilā ka pana tā kayanyan ka Dawuda. Aku Dawuda folo yi u maka Kashilā ka Yakubu Kuwa ku Kashilā, 47 shegai Solomo dā mai ka.

48 “Gbā n nala, Kashilā Uza u Ucira Gbā u dusuku a kuwa ka ama a mai wa. Tyoku dā matsumate ma danai, an u yain kadyanshi ka Magono ma Zuba, 49 ‘Zuba dā karatsu ka tsugono tsu vā, likimba kpam a asu u dā a'ene a vā a ka wunvuga. Iacun i kuma ku eni ka kpam ya maka mu? Ko kpam nte a asu u uwunvuga u vā?

50 Mpa n yain ili i na yi gbā n akere a vā wa?’  $\diamond$

51 “Edā aryagbaji, aza dā bawu i'ari n upanaka kpam i 'yuwain Kulu Keri. Edā tyoku u isheku i de u dā i'ari aza dā a tsu rongo kushulu n Kulu Keri kain dem. 52 A asuvu a nsumate, matsumate ma eni ma isheku i de i kpaḍai uwisha? Hal gbam a wunusai aza dā a danai Uza u Uwulukpi wā tā utuwā. Kpam gogo-na i neke de Kawauwi i wuna yi kpam. 53 Edā i wushai Mele a akere a atsumate a zuba, shegai i kpaḍai ma utono.”

### *A varasai Isitifanu a wunai*

<sup>54</sup> An azapige a aza a Yahuda a panai ili i'ya Isitifanu danai, aku a namgbai katsuma cika hal a lumai ajubu a le. <sup>55</sup> Shegai Isitifanu wa ta ushadangi n Kulu Keri, u webelei zuba, aku u wenei tsupige tsu Kashila n Yesu kushani a kukere ku ulyaki ku Kashila. <sup>56</sup> U danai, “Wundyai, n wene ta zuba u kukpai aku n wenei Maku ma Vuma kushani a kukere ku ulyaki ku Kashila!”

<sup>57</sup> Aku a salai a palai atsuvu a le, kute-kute a kana yi. <sup>58</sup> A wutukpa yi a uroto u ilyuci a gita yi uvarasa n atali tsara a wuna yi.

Aza da a wenei ukuna vi a zuwusai aminya a le a kapala ka kalobo ka roku uza u kala Shawulu.†

<sup>59</sup> An a'ari yi uvarasa, aku u yain kavasu, u danai, “Asheku Yesu, wusha kulu ku va.” <sup>60</sup> Aku u kudangi u salai, “Asheku, kotsu vu kana unyushi u cingi u na a kaci ka le wa.” An u danai nala, aku uma u ne u wutai.

## 8

1-2 Shawulu da pini kushani wa wundya kpm u wushuki n uwuna u Isitifanu. Aku ama roku aza da a ka tono Kashila a cidangu yi n a sayi cika.

### *Shawulu yankai Atoni mavura*

A a'ayin a nala yi mavura ma pige ma rukpai a mere ma Atoni a Yesu a Urishelima, aku gba le a wacuwai a asuvu a uyamba u Yahuda n Samariya. Shegai asuki yi alya koshi a wokoi pini a Urishe-lima.

---

† **7:58** Shawulu: Kala ka vuma u na ka tuwa ta ka wokoi Bulus, kpm u woko ta Katoni ka Yesu ka maci.

<sup>3</sup> Shawulu tani u rongoi uyan Atoni yi mavura cika. U uwusai a'uwa a'uwa wa ronuso aka n a'ali, wa ukusa le a kuwa ku a'ali.

*Filibu yain kuɓari a Samariya*

<sup>4</sup> Ama ɗa a sumai a aṣakai Urishelima vi, a rongoi ukyawunsa n a tonusuki ama ukuna u Yesu. <sup>5</sup> Filibu\* dem banai a ilyuci i pige i roku a uyamba u Samariya, wa tonusuko le ukuna u Kawauwi. <sup>6</sup> Aku ama a kyawan yi tsara a pana ili i'ya wa dana, kpaci a wene ta iryoci i'ya u yain. <sup>7</sup> U wutukpa ta ityoni i cingi a asuvu a ama ushani. An ityoni i cingi yi i wutai a asuvu a ama yi, aku i kanai isali cika. U tanasai kpam aza ɗa ili i soi ikyamba n awunu ushani. <sup>8</sup> Adama a nala ilyuci yi i shadangi n ipeli.

*Simo kayain ka adabu*

<sup>9</sup> Vuma roku u ɗa pini uza u kala Simo, uza ɗa wari wa yansa adabu pini a ilyuci yi. Aza a Samariya† a yain majiyan ma ili i'ya u tsu yansa, hal u lapai makamba u danai eyi vuma u pige u ɗa. <sup>10</sup> Ama a Samariya azapige na mmuku a danai, “Vuma u na uza u ucira u ɗa, u ɗa a ka isa, Ucira u Kashila.”

<sup>11</sup> A'ayin ushani Simo wari uyansa adabu n u zuwusi le majiyan, adama a nala u wokoi uza u ucira a asuvu a ilyuci yi. <sup>12</sup> Shegai an a wushuki n Kadyanshi ka Shinga ka Filibu yain a kaci ka tsugono tsu Kashila n kala ka Yesu Kawauwi, aku a lyuɓugu le gba le aka n a'ali. <sup>13</sup> Hal dem Simo vi n kaci ka ne u wushuki dem n kadyanshi ki. An a

---

\* **8:5** Filibu ɗa a ka dansaka pini na vi, aya dem a ka dansaka a 6:5.

lyuḅugu yi, aku u kaṅai utono Filibu. An u wenei tyoku ḁa Filibu wa yansa iryoci n ikunesavu, aku u yain majiyan cika.

<sup>14</sup> An asuki a ḁa a'ari a Urishelima a panai a da aza a Samariya a wushuku ḁe n kadyanshi ki, aku a sukunku le Bituru n Yahaya. <sup>15</sup> An a rawai, aku a yanka le kvasu tsara a wushi Kulu Keri. <sup>16</sup> A'ayin a nala yi a lyuḅugu le ta a asuvu a kala ka Yesu Asheku, shegai ko uza u te u le wari u wusha Kulu Keri wa. <sup>17</sup> Aku Bituru n Yahaya a taḁanku le akere, aku Kulu Keri ku cipa le.

<sup>18</sup> An Simo wenei tyoku ḁa a ka naḁasa Kulu Keri a asu u utadangusu akere, aku wa ciga u naḁa le ikebe, <sup>19</sup> u danai, “Mpa dem naḁa numu ucun u ucira u nala vi tsara uza ḁa baci dem n taḁanki kukere u tsara Kulu Keri.”

<sup>20</sup> Shegai Bituru wushunku yi, “Kashila ka wuna vu ta n ikebe i vunu dem! Va wundya n ikebe i'ya va tsara kune ku Kashila? <sup>21</sup> Ko ili i paḁa vu n manyan ma na wa, kpaci katakasuvu ka vunu ka dere n Kashila wa. <sup>22</sup> She vu kpatala vu asaḁa tsicingi tsu vunu, vu foli Asheku a cimbusuka vu unyushi u cingi u ili i'ya vu fobusoi a katakasuvu ka vunu. <sup>23</sup> Kpaci n wene ta vu shadangi n malyon ma cingi, kpam usiri a asuvu a unyushi u cingi.”

<sup>24</sup> Simo wushuki, “Yanka numu kvasu, tsara ili i'ya vu danai na vi i gita na mpa wa.”

<sup>25</sup> Bituru n Yahaya a yain kuḁari ku kadyanshi ka Asheku a Samariya, an a kotsoi, aku a gonoi a Urishelima. A lyai kapala n kadyanshi ki ele n a goni a une i'ya a cinasai a ure.

*Filibu n vuma u Habasha*

26 A'ayin a nala yi, katsumate ka zuba ka yankai Filibu kadyanshi, “Yāngā vu toni ubana a daka, vu toni ure u kakamba u da u wutaḡi a Urishelima ubana a Gaza.” 27 U kaṅai ure, eyi a nwalu, u cinai vuma roku kazuwi ka ikebe ka uyamba u Habasha,† kpm kagbashi ka shegai wa ta n tsupige a tsugono tsu Kandakatu Magono, kpm uka da magono ma Habasha mi. A Urishelima da u banai tsara u lyai kayala. 28 An wa gono a kuwa, aku u dusuki a maringongo ma adoki ma ne, u kukpai tagarada u Ishaya wa yan kaneshi.

29 Aku Kulu Keri ku tonukoi Filibu, “Raḡa evu n maringongo ma nala mi.”

30 U sumai u banai asu u ne, u panaḡa yi wari a kaneshi u tagarada u Ishaya matsumate. U wecei vuma vi, “Vu reve ili i'ya wari a kaneshi?”

31 U wushunku yi, “Nte tani, she uza roku u baṅga mu.” Aku u tonukoi Filibu u yuwa maringongo mi u dusuku kaḡolo n eyi.

32 Kaḡon ka tagarada ka wa yan kaneshi vi ka na:

“A rono yi yavu macon† ma a ka bana ukida.

Tyoku da maku ma kondom ma tsu pada bini a ka kidasa yi baci tsileme tsu ikyamba i ne, nala dem u padai.‡

33 A yanka yi uwono hal a kidaga yi ugana n ukuna u da bawu wari dere.

---

† 8:27 Kaletsu ka Tsiheline ka yanka ta manyan n ili i'ya i'ari n kalen ka “kagbashi ka a wutukpai asanda.” Caupa ama a tsu yawunsa ta yavu a wutukpa baci agbashi a le asanda a ka yan ta manyan ma le mai. ‡ 8:32 A asu u nala vi, ncon mi ma ta n tsileme ugadi ugadi. Uza wa fuda ta gbam wa kidasa tsa u yanka kunya bawu u kidai macon mi.

Uza wā la wa yan kpam kadyanshi ka mmuku, nā mmuku n tsikaya n ne wa.

Nte tani, kpaci a wuna yi kahu u tsarā le.” ◇

<sup>34</sup> Vuma vi u tonuko yi, “N folo vu, tonuko mu kalen ka asu ki. A kaci ka yai ka matsumate mi ma yain kadyanshi ki, n kaci ka ne ka wa yan ka, ko gai uza roku u ɗa kau?”

<sup>35</sup> Aku Filibu gitai asu u tagarāda u nala vi, u yanka yi alabari a Yesu. <sup>36</sup> Ele pini a nwalu a cinai asu u roku n mini. Pini nala, vuma vi u danai, “Mini ma na, ndya ya ɓishinka vu vu lyuɓugu mu?”

[ <sup>37</sup> Filibu danai, “Vu wushuku baci n katakasuvu ka te, ma lyuɓugu vu ta.”

Vuma vi u wushuki. “N wushuku ta n Yesu Kawauwi, Maku ma Kashila.”]§

<sup>38</sup> U zuwai a shamkpai maringongo ma adoki mi. Ama a re a le gbā a cipai a uwai a asuvu a mini mi, aku u lyuɓugi yi.

<sup>39</sup> An a wutai a asuvu a mini mi, Kulu Keri ku Magono ma Zuba ku cangai Filibu. Vuma vi u doku u wene yi wa. Aku u lyai kapala nā nwalu n ne ushadangi n ipeli. <sup>40</sup> Filibu wenei kaci ka ne a ilyuci i Azatu. U tambai ilyuci ilyuci n u yanyi kuɓari ku Kadyanshi ka Shinga ka Asheku hal u rawai a Kasariya.

## 9

### *Shawulu wokoi Katoni*

---

◇ **8:33** Isha. 53:7-8. § **8:37** Akorongi a cau ushani aza ɗa a purai a tagarāda u Manyan ma Asuki a'ari n makpandā ma 37 wa.



<sup>1</sup> A'ayin a da Shawulu wari pini a uyanka Atoni a Asheku mavura cika, hal n u dani wa wuna le. Aku u banai a asu u Magono ma Adaraki, <sup>2</sup> u folo yi u naka yi ukanikorongi u ubana a agata a Kashila a Damasuka. Tsara u cina baci Atoni a da a wushuki n Ure u Asheku aka ko a'ali, aku u tuwa n ele usiri a Urishelima. <sup>3</sup> Eyi pini a nwalu, hal u yain evu n Damasuka, kute-kute u wenei katyashi ka ucira ka wuta a zuba ka wakana yi ukyawan. <sup>4</sup> Aku u rukpai a iyamba u panai kalagatsu ka danai, "Shawulu, Shawulu, ndya i zuwai va yan mu mavura?"

<sup>5</sup> Shawulu wecikei, "Asheku, ada yai?"

Aku kalagatsu ki ka wushuki, "Mpa Yesu uza da vari a uyan mavura. <sup>6</sup> 'Yanga vu uwa a ilyuci yi, a ka tonuko vu ta i'ya va yan."

<sup>7</sup> Aza da a ka walaka kabolo ki a fuda a dana ukuna wa, a pana ta kalagatsu ki, shegai a wene uza wa. <sup>8</sup> Aku Shawulu 'yanga, shegai an u kukpai a'eshi a ne u wene asu wa. Atoku a ne a da a kana yi kukere a banka yi pini a ilyuci i Damasuka yi. <sup>9</sup> U yan ta a'ayin a tatsu pini a Damasuka vi bawu u wenei asu, kpan u lya ili wa, u so tani ili wa.

<sup>10</sup> A Damasuka vi katonu ka pini uza u kala Ananiya. Asheku a isa yi a asuvu a kuwene, u danai, "Ananiya!"

Aku u wushuki, "Mpa na, Asheku."

<sup>11</sup> Asheku a tonuko yi, "'Yanga vu bana a ure u da a ka isa Ure u Karara vu wecike kuwa ku Yahuza. Uza roku da pini uza u Tarsu, uza da a ka isa Shawulu. Aya pini wa yan kavas. <sup>12</sup> N wenike yi ta gbam kuwene. A asuvu a kuwene ki u wene

tā vuma ḏa a ka isā Ananiya u taḏanku yi kukere a kaci tsarā u wene asu.”

<sup>13</sup> Ananiya wushuki, “Asheku, n so tā upanasa alabari a vuma u nala vi a ili i cingi i'ya wa yansaka aza a uwulukpi a vunu a Urishelima.

<sup>14</sup> Kpam adarakpi a pige a wushunku yi ḏe u kana gba uza ḏa baci dem wa isā asuvu a kala ka vunu.”

<sup>15</sup> Asheku a tonuko yi, “Avu gai wala, kpaci aya n dangasai u dansa kala ka va a asu u Awulawa, na ngono n le, kpam n a asu u aza a Isara'ila. <sup>16</sup> Ma wenike yi tā tyoku ḏa wa pana ikyamba adama a kala ka va.”

<sup>17</sup> Ananiya ba u uwai a kuwa ki. U 'yangasai kukere u sawai Shawulu u danai, “Utoku u va, Asheku a ḏa a suku mu; wata, Yesu uza ḏa u wenikei kaci ka ne ara vunu a ure u ḏa vu walai vi. Wa ciga tā vu doku vu wene asu, kpam u shadangu vu n Kulu Keri.” <sup>18</sup> Kute-kute aku ili i roku i rukpai a a'eshi a Shawulu yavu apici, aku u wenei asu. Pini nala, u 'yangai a lyubugu yi. <sup>19</sup> An u lyai ilikulya, aku ucira u ne u gonoi.

### *Shawulu yain kuḃari a Damasuka*

Shawulu yain a'ayin pini a asuvu a Damasuka kaḃolo n Atoni a ḏa a'ari pini vi. <sup>20</sup> A barakpa wa, aku u gitai kuḃari ku kadyanshi ka Kashila a agata a Kashila n u dansi Yesu ḏa Maku ma Kashila. <sup>21</sup> Gba aza ḏa a panaka yi a yain majiyan, a danai, “Vuma na vi aya u 'yangasakai Atoni n u yansaki le mavura a Urishelima vi wa? Tuwa ḏa u tuwai tsara u kana le u sirasa u banka le a asu u adarakpi a pige wa ko?”

<sup>22</sup> Shegai Shawulu doki ucira u kuɓari, wari a uvurusā atakasuvu a aza a Yahuda aza da a'ari a Damasuka, n u dansi Yesu da Kawauwi.

<sup>23</sup> An a yain a'ayin ushani, aza a Yahuda a sheshei a wuna yi. <sup>24</sup> Shegai u panai alabari a ili i'ya a sheshei. A'ari uwundya itsutsu i ilyuci yi kaara n kayin tsara a kana yi a wuna. <sup>25</sup> Pini nala, kayin ka pige aɓangi a ne a zuralakpa yi a ilinuku i kasaga ka ilyuci a asuvu a mabana ma pige.

### *Shawulu banai a Urishelima*

<sup>26</sup> An Shawulu rawai a Urishelima, u cigai u ɓolomgbono kaci n Atoni yi, shegai a panai uwonvo u ne kpaci a wushuku an eyi katoni ka wa.

<sup>27</sup> Shegai Baranaba tuko yi a asu u asuki, u tonuko le tyoku da Shawulu wenei Asheku a ure n tyoku da Asheku a dansai n eyi. N tyoku da kpam u yain kuɓari ku kadyanshi ka Kashila n u dansi kala ka Asheku a Damasuka bawu uwonvo.

<sup>28</sup> Asuki yi a wushuki n Shawulu. Pini nala, u dusuki n ele a Urishelima n u tamba asu asu, n u yanyi kuɓari n kala ka Asheku bawu uwonvo. <sup>29</sup> U dansa ta n u yanyi kananamgbani n aza a Yahuda a da a ka pana kaletsu ka Tsiheline, adama a nala, a'ari uzama ure u da a ka wuna yi. <sup>30</sup> An atoku a ne a panai nala, aku a banka yi a Kasariya a tutsuku yi a kpatsu ubana a Tarsu ilyuci i ne.

<sup>31</sup> Gba Atoni a da a'ari a uyamba u Yahuda, n u Galili, n u Samariya a tsara ndishi n shinga. A panai uwonvo u Asheku, a yain ucira, Kulu Keri kpam kari a ugbamatangusu le hal a'ari a udoku kakuma.

### *Bituru tanasai Iniyasu*

<sup>32</sup> A'ayin a nala yi, Bituru kyawunsai uyamba vi gba, u ba u kondoi ama a Kashila da a'ari a ilyuci i Lida. <sup>33</sup> Nte a gawunsai pini n vuma roku uza u kala Iniyasu, uza da wari nvain na mballa n tsuwunu hal ayen kulla. <sup>34</sup> Aku Bituru tonuko yi, "Iniyasu, Yesu Kawauwi tanasa vu de, 'yanga vu katala kajiba ka vunu." Kute-kute u 'yanga. <sup>35</sup> Gba aza a Lida n aza a uyamba a Sarana a wenei vuma da a tanasai vi, pini nala, a kpatalai a asu u Asheku.

*Bituru 'yangasai Dokas a ukpa*

<sup>36</sup> Uka roku da pini a Japa uza u kala Tabita; wata, Dokas\* n Tsiheline, uka vi katoni ka. U naka ta kaci ka ne a asu u manyan ma maci n u banga aza a unambi. <sup>37</sup> A'ayin a nala yi a da u yain mabala aku u kuwai. Pini nala, a sumba yi a vakunku yi a kunukuzuba. <sup>38</sup> An Atoni yi a panai alabari cina Bituru pini a Lida evu n Japa, aku a suki ama a re a ba a foli yi a danai, "Tuwa gogo."

<sup>39</sup> Bituru lazai kabolo n ele. An a rawai, aku a banka yi a kunukuzuba ki. Nrana n shamgbai evu n eyi a ka sa, kpam a ka wenishike yi ntogo n aminya a da Dokas yanka le cina eyi n uma.

<sup>40</sup> Bituru wutukpa le a ulanga, aku u kudangi u yain kavasu. U kpatalai a asu u kakushe ki u danai, "Tabita, 'yanga." Aku u kukpai a'eshi, an u wenei Bituru, u 'yanga u dusuki. <sup>41</sup> Bituru kana yi kukere u banga yi tsara u 'yanga. Aku u isai Atoni yi na nrana mi gba, u naka le n eyi n uma.

---

\* **9:36** Kala ka Tabita n Tsi'arama, n Dokas n Tsiheline gba kalen ka le ka te, kpam ka "maren."

<sup>42</sup> Alabari yi a tamburai gb̄a a uyamba u Japa, kpam ama a wushuki n Asheku. <sup>43</sup> Bituru dusuki a Japa a'ayin ushani, a kuwa ku uza u manyan ma ikpan uza u kala Simo.

## 10

### *Koniliyu is̄ai Bituru*

<sup>1</sup> A yan t̄a vuma roku a ilyuci i Kasariya uza u kala Koniliyu, katigi ka a asuvu a kaḅolo ka asoje ka a ka is̄a Kaḅolo ka Asoje a Italiya. <sup>2</sup> Vuma u maci u ḁa, u tsu rongo t̄a ulyas̄aka Kashil̄a kayala a'ayin dem. Nala dem aza ḁa a'ari a kuwa ku ne. U tsu naḁas̄a t̄a aza a unambi kune, n u yansi kavas̄u ubana a asu u Kashil̄a.

<sup>3</sup> Kain ka te, evu n ulapa u uwule u tatsu u kaara, aku u wenei katsumate ka zuba a asuvu a kuwene ka tuw̄ai ka tonuko yi, “Koniliyu.”

<sup>4</sup> Koniliyu wa wundya yi tuntu n uwonvo. U wecei katsumate ki, “Ndya yi, Asheku?”

Aku u wushuki, “Kashil̄a ka wushuku t̄a kavas̄u ka va yansa ubana ara ne, kpam u reve t̄a n kune ku va yans̄aka aza a unambi.” <sup>5</sup> Suku ama roku ubana a ilyuci i Japa a ba a is̄a vuma roku uza u kala Simo, uza ḁa dem a tsu is̄a Bituru. <sup>6</sup> Aya pini wa rongo n vuma roku uza ḁa dem a tsu is̄a Simo, vuma vi manyan ma ikpan ma wa yansa. Kuwa ku ne evu n kushiv̄a ḁa kari.”

<sup>7</sup> An katsumate ki ka lazai, aku Koniliyu is̄ai agbashi a ne a re n kasoje ka roku, uza ḁa wa tono Kashil̄a a asuvu aza ḁa a ka yans̄aka yi manyan kain dem. <sup>8</sup> Aku u tonuko le gb̄a ili i'ya i git̄ai, pini nala, u suku le a Japa.

*Bituru wenei kuwene*

<sup>9</sup> An kain ka wansai, n kaara a kaci ele a asuvu a nwalu, cina a yain evu n ilyuci yi, aku Bituru yuwai a zuba u kunu u yain kvasu. <sup>10</sup> Pini nala, kambulu ka kana yi, ele pini a ufobuso ilikulya yi, aku u wenei kuwene. <sup>11</sup> U wenei zuba u kukpai aku ili i roku yavu kunya ku pige ku ngan n nishi ubarakpi a ka cipuka ka utuwa a iyamba. <sup>12</sup> A kunya ki gba icun i nnama n da mari n a'ene a nishi na n da ma kabura na nnu n da mari pini.\* <sup>13</sup> Aku u panai kalagatsu ka danai, "Bituru, 'yanga vu kida vu takuma."

<sup>14</sup> Shegai Bituru wushuki, "A'a, Magono ma Zuba, kotsu n takuma ili i'ya bawu a wulukpei ko kpam i'ya i'ari n icadi i'ya Mele ma tsunu ma bishinka tsu utakuma wa."

<sup>15</sup> Aku u doki u panai kalagatsu ki upana u ire, "Kotsu vu isa ili i'ya Kashila ka wulukpei, ili i'ya bawu i'ari uwulukpi wa."

<sup>16</sup> An ukuna u nala u gitai hal kutatsu, kute-kute aku a bidyai kunya ki ugono a zuba.

<sup>17</sup> Bituru pini a kadambula ka kalen ka kuwene ku nala ki, aku ama da Koniliyu suki vi a rawai a utsutsu, cina a wecike de kuwa ku Simo ki. <sup>18</sup> A danai, "Azakuwa," aku a wecikei ko nte Simo uza da a ka isa Bituru vi wari pini.

<sup>19</sup> Eyi pini a uyawunsa a kaci ka kuwene ka u wenei vi, aku Kulu Keri ku tonuko yi, "Ama a tatsu da la a ka bolo vu. <sup>20</sup> Cipa vu tonole. Kotsu vu yain malala wa, kpaci mpa n suku le."

---

\* **10:12** A asuvu a kunya ki nnama n roku n da pini n da aza a Yahuda a tsu takuma kpam na n da bawu a tsu takuma adama a Mele.

<sup>21</sup> Bituru cipai u cinai ama yi, u danai, “Mpa ya bolo. Ndyā ya boluko mu n i'ya?”

<sup>22</sup> A danai, “Katigi ka aza a Roma, uza u kala Koniliyu aya u suku tsu. Vuma maci u da, uza da u tsu rongo a ulyaka Kashila kayala, uza da kpam gba aza a Yahuda a ka naka karinga. Katsumate ka zuba ka kari uwulukpi ka ka tonuko yi u isa vu vu bana ara ne tsara u pana i'ya va dana.” <sup>23</sup> Pini nala, Bituru uwai n ele a asuvu a kuwa, u naka le asu u da a ka wansa.

### *Bituru banai a kuwa ku Koniliyu*

An kain ka wansai, Bituru, kaɓolo n Atoni a roku aza a Japa, a wutai a lazai kaɓolo n aza da Koniliyu suki vi. <sup>24</sup> An kain ka doki ka wansai, aku a uwai a Kasariya. Alya Koniliyu wari a uvana hal gbam u libanai amaci a ne n aje a ne. <sup>25</sup> Bituru n u uwi a kuwa ki, aku Koniliyu ryabusa yi, u rukpai a kapala ka ne u lyaka yi kayala. <sup>26</sup> Aku Bituru 'yangasa yi u tonuko yi, “'Yanga, mpa dem vuma da.” <sup>27</sup> An Bituru wari kadyanshi n eyi, aku u uwai u cinai kakuma ka ama ushani.

<sup>28</sup> U tonuko le, “Eda n kaci ka de i reve ta u gan uza u Yahuda u gawan kaci ko kpam u ba u kondo Kawulawa wa. Shegai Kashila ka wenike mu ta u da, kotsu n isa uza roku uza u ashinda wa. <sup>29</sup> Adama a nala, an i isa mu n 'yuwan utuwa wa. Gogo-na ma ciga n pana ili i'ya ya isaka mu vi.”

<sup>30</sup> Koniliyu wushuki, “A'ayin a nishi a da a wurai dere n gogo-na naha, a ulapa u uwule u tatsu u kaara an mari a uyan kavasū, aku vuma roku u tuwa mu n aminya a eri a ulada u shamgbai a kapala ka va. <sup>31</sup> U danai, ‘Koniliyu, a wushuku de kavasū ka vunu, kpam kune ku va neshe aza a

unambi yi ku woko de ili i uciɓusa a asu u Kashila. <sup>32</sup> Adama a nala she vu suku a ubana a Japa a ba a isa Simo uza da a ka isa Bituru. Aya pini u cipai a kuwa ku Simo uza u manyan ma ikpan, uza da wa rongo evu n kushiva.' <sup>33</sup> Da i zuwai n suki ama n maloko a isa vu vi, kpmam u gan ta an vu tuwai. Gogo-na atsa na gba tsunu tsu bolomgbonoi a asu u te tsara tsu pana ili i'ya Asheku a tonuko vu vu tonuko tsu."

*Bituru dansai a kuwa ku Koniliyu*

<sup>34</sup> Pini nala, Bituru gitai kadyanishi, "Mayun da, n reve ta Kashila kari n kudyangi wa. <sup>35</sup> Shegai u wushi gba ama da a ka pana yi uwonvo, n a yanyi ili i'ya wa ciga, a asuvu a kaletsu dem. <sup>36</sup> I reve ta n akani a da Kashila ka sukunki aza a Isara'ila, n a tonusuki le alabari a kayanyan ka ndishi n shinga a asu u Yesu Kawauwi. Aya kpmam Asheku a ama gba. <sup>37</sup> I reve ta n ili i'ya i gitai a uyamba u Yahuda, an Yahaya danai a lyuɓugu ko ya wa. Kpmam a Galili da ukuna u na vi u gitai. <sup>38</sup> I reve ta Kashila ka ka nakai Yesu uza u Nazara tsupige, Kulu Keri ka ta n eyi, kpmam wa ta n ucira cika. U tamba ta n u yansi ukuna u shinga, n u tanasi aza da Kalapansi ka 'yanki, kpaci Kashila ka ta n eyi.

<sup>39</sup> "Atsa tsu wenei ukuna u da u gitai n eyi a uyamba u Yahuda, n Urishelima. Alya a wuna yi a mawandamgbani. <sup>40</sup> Shegai Kashila ka 'yangasa yi a kain ka tatsu, kpmam u zuwa yi u wenike kaci ka ne a asu u ama. <sup>41</sup> U wenike kaci ka ne a asu u ama gba wa, shegai ara tsunu; wata, atsu aza da Kashila ka dangasai caupa, tsara tsu woko aza da a wenei ukuna vi. Atsa aza da tsu lyai kpmam tsu soi



kaɓolo n eyi an u 'yangai a ukpa. <sup>42</sup> Kpam u tonuko tsu tsu yanka ama kuɓari, tsu tonuko le Yesu da Kashila ka dangasai u yanka aza uma n akushe afada. <sup>43</sup> Gba nsumate n yan ta kadyanshi ka ne a danai, 'Gba uza da baci u wushuki n kala ka ne, a ka cimbusuka yi ta unyushi u cingi u ne.' ”

### *Awulawa a tsarai Kulu Keri*

<sup>44</sup> Bituru pini a kadyanshi ki, aku Kulu Keri ku cipai a kaci ka aza da a ka panaka yi vi. <sup>45</sup> Aku aza a Yahuda a da a'ari Atoni a asuvu a aza da a tuwai n Bituru vi, a yain majiyan an a wenei dem Awulawa a wushai kune ku Kulu Keri ki. <sup>46</sup> Kpaci a panaka le ta a ka dansa n aletsu a roku, n a cikpali Kashila.

Pini nala, Bituru danai, <sup>47</sup> “Awulawa a na yi dem a wusha ta Kulu Keri tyoku da atsu tsu wushai. Uza wa la wa bishinka a lyuɓugu le wa.” <sup>48</sup> Aku u zuwai a lyuɓugu le a asuvu a kala ka Yesu Kawauwi. Pini nala, a folo yi u doku u yain a'ayin n ele.

## 11

### *Bituru gonoi a Urishelima*

<sup>1</sup> Asuki yi n Atoni a da a'ari a Yahuda a panai alabari a da Awulawa a wushai kadyanshi ka Kashila. <sup>2</sup> Shegai an Bituru gonoi a Urishelima, aku Atoni a roku aza da a'ari aza a Yahuda a yanka yi kushulu. <sup>3</sup> A danai, “Ndya i zuwai vu banai a asu u Awulawa, hal vu lyai kaɓolo n ele?”

<sup>4</sup> Aku Bituru tonuko le ili i'ya i gitai. <sup>5</sup> U danai, “Kain ka te a Japa, tyoku da mari a kvasu aku n wenei kuwene. N wenei ili i roku yavu kunya ku pige ku ngan n nishi ubarakpi a ka cipuka ka

utuwa a iyamba, hal ku rawai evu na mpa. <sup>6</sup> An n webelei kunya ki mai n wenei gba icun i nnama n kenu, na nnama n mete, n ili i nkaburu, na nnu. <sup>7</sup> Aku n panai kalagatsu ka danai, 'Bituru, 'yanga vu kida vu takuma.'

<sup>8</sup> "Pini nala, n wushuki, 'Ko kenu, Magono ma Zuba, ili i'ya bawu i'ari uwulukpi, ko i icadi i'ya Mele ma tsunu ma bishinka tsu utakuma kotsu i uwa a unu u va wa.'

<sup>9</sup> "Shegai kalagatsu ka ka wutai a zuba vi ka doki ka danai ukuna u ire, 'Kotsu vu isa ili i'ya Kashila ka wulukpei, ili i'ya bawu i'ari uwulukpi wa.' <sup>10</sup> Kutatsu ka a yain nala kahu a canga ili yi ubana a zuba.

<sup>11</sup> "Derere u ukuna vi u da ama a tatsu a da a suki a Kasariya a rawai a kuwa ka mari vi. <sup>12</sup> Aku Kulu Keri ku tonuko mu n toni le kpm n dambula an a wokoi Awulawa wa. Atoku a va ama a teli a na yi alya a soku mu, hal tsu uwai a kuwa ku uza da u suku le vi. <sup>13</sup> U tonuko tsu kpm tyoku da u wenei katsumate ka zuba ka shamgbai a kuwa ku ne ka tonuko yi, 'Suku a ba a isa Simo uza da a ka isa Bituru a Japa. <sup>14</sup> Aya wa tonuko vu tyoku da avu n kuwa ku vunu gba ya tsara iwauwi.'

<sup>15</sup> "Kadyanshi ka n gita le uyanka, aku Kulu Keri ku cipai ara le dere tyoku da ku cipa tsu a kagita. <sup>16</sup> Pini nala, aku n cibai an kadyanshi ka Kashila ka danai, 'Yahaya gai n mini ma u lyubugusi, shegai eda Kashila ka lyubugu da ta n Kulu Keri.' <sup>17</sup> An u wokoi Kashila ka yanka le kune derere tyoku da u yanka tsu a'ayin a da tsu wushuki n Yesu Asheku Kawauwi, ya mpa n bishinka Kashila?"

<sup>18</sup> An a panai nala aku a nambai ili i'ya a ka dana, pini nala, a kaṅaṅi ucikpala Kashila a danai, “Gogo-na dem Kashila ka wushuku de Awulawa a kpatala utuwa ara ne, kpam u ne le de uma.”

### *Atoni a Antakiya*

<sup>19</sup> An Isitifanu kuwai, aku a gitai uyan Atoni yi mavura, hal a wacuwai ubana a mbari. A rawa ta a Finisiya n Sayipuru n Antakiya u Suriya. A yain kuɓari ku Kadyanshi ka Shinga ka Kashila, shegai aza a Yahuda a da a yankai kuɓari ki koshi.

<sup>20</sup> Asuvu a Atoni a da a wacuwai vi aza roku a wutai a Sayipuru n Sirani a banai a Antakiya, a kaṅaṅi uyanka Awulawa Kadyanshi ka Shinga ka Yesu Asheku. <sup>21</sup> Ucira u Asheku wa ta kaɓolo n ele, hal ama ushani a wushuki a kpatalai asu u Asheku.

<sup>22</sup> An Atoni a da a'ari a Urishelima a panai ili i'ya i gitai a Antakiya, a suki Baranaba ubana de. <sup>23-24</sup> Vuma u maci da uza da wari ushadangi n Kulu Keri kpam u pityanangi. An u rawai u wenei ukuna u shinga u da Kashila ka yanka le, u yain ipeli cika. Aku u rono le atsuvu a pityanangu n Asheku n katakasuvu ka le ubana. Ama ushani a doku ta a kpatalai ubana a asu u Asheku.

<sup>25</sup> Pini nala, Baranaba banai a Tarsu uzama Shawulu. <sup>26</sup> An u wene yi, aku u tuko yi a Antakiya. Ama a re a le gba a shamgbai pini n Atoni yi hal kayen ka te dere, n a wenishiki kakuma ka ama. A Antakiya da a gitai u'isa atoni a Yesu n kala ka Aza a Kirisiti.†

<sup>27</sup> A'ayin a na yi a da ntsumate n roku n wutai a Urishelima a banai a Antakiya. <sup>28</sup> Uza u te a asuvu a le uza u kala Agaba u 'yangai u yain

kadyanshi n ucira u Kulu Keri u danai, “A ka tuwa tā a yain kambulu ka pige a likimba gbā.” (A'ayin a dā Kaladiyu wa lya tsugono tsu Roma dā udani u na vi u shadangi.) <sup>29</sup> A'ayin a nala yi, Atoni a sukunku tā atoku a le a dā a'ari a Yahuda kune. Ya dem suki utyoku u ucira u ne. <sup>30</sup> Nala a yain a sukunki nkoshi ma atoni a Yahuda kune a akere a Baranaba n Shawulu.

## 12

### *Bituru a kuwa ku a'ali*

<sup>1</sup> A'ayin a nala yi a dā Hiridu Agaripa magono u gitai uforo ama a Kashila. <sup>2</sup> Hal gbam u zuwai a kapamgbanāi kaci ka Yakubu utoku u Yahaya n burundu. <sup>3</sup> An u wenei aza a Yahuda a panai kayanyan ka ili i'ya u yain, aku u kanāi dem Bituru. A'ayin a Ulya u Ilikulya i'ya i Nambai Yistīt dā ukuna vi u gitai. <sup>4</sup> An u kanā yi, aku u gidaku yi a kuwa ku a'ali. U nakangu yi a akere a asoje a nishi a nishi hal asu kunishi a wundi yi, tsarā a kotso baci Abiki yi, u tuko yi a kapala ka ama u yanka yi afada. <sup>5</sup> A'ayin a dā Bituru wari pini a kuwa ku a'ali ki, aku ama a Kashila a'ari uyan kavasu adama a ne.

### *Katsumate ka zuba ka wauwai Bituru*

<sup>6</sup> N kayin ka Hiridu wa yawunsa kain ka wansa baci u wutukpā yi tsarā u yanka yi afada yi, Bituru wari alavu a mere ma asoje a re usiri n ikani i re. Kpam asoje a re aza dā a ka wundya kuwa ki kushani a utsutsu. <sup>7</sup> Kute-kute aku katsumate ka zuba ka Magono ma Zuba ka wenikei kaci ka ne ara ne, aku katyashi ka wakanai kunu ki. Aku katsumate ki ka sawai Bituru a ikengi u 'yangasā

yi u danai, “Yāngā gogo!” Pini nala, ikani yi i saruwai.

<sup>8</sup> Katsumate ki ka tonuko yi, “Uka matogo n akpata a vunu.” Aku u yain nala. U tonuko yi kpam, “Wambana kunya ku vunu, vu tono mu.”

<sup>9</sup> Aku u wutaì u tono yi, kpam u reve an ili i'ya katsumate ki ka yan vi mayun da wa, eyi n u dani kuwene ka a ka wenike yi. <sup>10</sup> An a wurai asoje a da a ka wundyā kuwa ki aza a kagita n aza a ire, aku a rawai a utsutsu u urim, utsutsu u uwa a ilyuci yi. Aku utsutsu vi u giduwai n kaci ka ne, aku a wutaì. An a rawai a nsandu ma ure, kute-kute katsumate ki ka asaka yi.

### *Bituru gonoi asu u aza a ne*

<sup>11</sup> Pini nala, ugboji u Bituru u gono yi, u danai, “Gogo-na n reve ta Magono ma Zuba ma ma suki katsumate ka zuba ka ne tsara u wauwa mu a kukere ku Hiridu, n ukuna u cingi u da aza a Yahuda a fobusoì a kaci ka va.”

<sup>12</sup> An u revei nala, aku u banai a kuwa ku Meri mma u Yahaya uza da kpam dem a ka isa Marku, a asu u da ama ushani a bolomgbonoi a'ari uyan kavasu. <sup>13</sup> An u kudai utsutsu u danai aza a kuwa, aku kagbashi ka kari makere uza u kala Ruda tuwai tsara u wene ko yayi. <sup>14</sup> An u revei kalagatsu ka Bituru ka, u giduwa kpam utsutsu vi wa adama a mazanga, aku u gonoi a asuvu a kuwa n ilyadi, u danai, “Bituru da pini kushani a utsutsu u kuwa.”

<sup>15</sup> A danai, “Ijan i'ya vu?” Eyi tani u matsai n u dansi aya. Aku a danai, “Yan maken wa,

katsumate ka ne ka!”\*

<sup>16</sup> Bituru gai lyai kapala n ukudusa utsutsu vi, aku a giduwai a wene yi, a yain majiyan cika.

<sup>17</sup> U yanka le iryoci n kukere u da a pada bini. U tonuko le tyoku da Magono ma Zuba ma wutukpa yi a kuwa ku a'ali. U doki u tonuko le, “Tonukoi Yakubu n Atoni a da a buwai ukuna vi.” Aku u yangai u banai a asu u roku.

<sup>18</sup> An kain ka wansai, ugiruwā u kenu u da asoje yi a giruwai wa, adama a ili i'ya i gitai n Bituru.

<sup>19</sup> An Hiridu zama yi bawu u wene yi. Aku u wecishei asoje a da a ka wundya yi vi. Pini nala, u zuwai a wuna le.

### *Ukpa u Hiridu*

An nala u wurai, Hiridu yangai a Yahuda ubana a Kasariya u yain a'ayin de. <sup>20</sup> A'ayin a nala yi, Hiridu wa ta n upan u ama a Taya n Sida. Shegai an a ka ciga ilikulya a asu u tsugono tsu Hiridu, aku a tuwai ara ne n katakasuvu ka te. A boloi ufolomgbono u kaci u Bilasutu kagbashi ka ka kirana n kunu ku magono, a zamai ndishi n shinga.

<sup>21</sup> Kain ka te an a fo6usoi, aku Hiridu ukai aminya a tsugono u dusuki a karatsu ka tsugono, u yanka le kadyanshi. <sup>22</sup> An kakuma ka ama ki ka panai, aku a yangasai alagatsu a le a danai, “Kalagatsu ka kashila ka roku ka na vi, ka vuma ka wa.” <sup>23</sup> Kute-kute, aku katsumate ka zuba ka Magono ma Zuba ka gbasha yi, kpaci u bidiga ta kaci ka ne tsupige aku u yuwain unaka Kashila

---

\* **12:15** A a'ayin a nala yi, ama roku a bidya ta Kashila ka tsu suku ta atsumate a ne a kirana n vuma dem, kpm katsumate ki ka tsu tuwa ta a asu u vuma vi yavu vuma da.

tsupige. Pini nala, azun a katsuma a gita yi utakuma hal u kuwai.

*Atoni a doki ushani*

<sup>24</sup> Kadyanshi ka Kashila kpm kari a ulya kapala n ka tamburi.

<sup>25</sup> An Baranaba n Shawulu a kotsoi manyan ma a naka le a Urishelima, aku a gonoi a Antakiya kaɓolo n Yahaya Marku.

## 13

*A suki Baranaba n Shawulu*

<sup>1</sup> A asuvu a Atoni a da a'ari a Antakiya vi, ntsu-mate n da pini hal n awenishiki; wata, Baranaba, n Saminu uza da a ka isa "Uza u Dan," n Lusiya uza da u wutai a Sirani, n Manayan, uza da u gbonguroi kaɓolo n Hiridu Antiba, n Shawulu.

<sup>2</sup> Kain ka te, tyoku da ama a na a'ari ulyaka Magono ma Zuba kayala n a yanyi kakuli, Kulu Keri ku danai, "Takpa numu Baranaba n Shawulu adama a manyan ma n isa le n ma."

<sup>3</sup> An a doki a yain kakuli n kvasu, aku a taɗanki Baranaba n Shawulu akere a tutsuku le a kana ure.

*Baranaba n Shawulu a banai a Sayipuru*

<sup>4</sup> An Kulu Keri ku suki Baranaba n Shawulu a banai a Salusiya, a uwai a kpatsu ubana a uyamba u mere ma mini u Sayipuru. <sup>5</sup> An a rawai a ilyuci i Salami, a yain kuɓari ku kadyanshi ka Kashila a agata a Kashila a aza a Yahuda. Yahaya Marku dem bana ta kaɓolo n ele wa ɓanga le.

<sup>6</sup> An a kyawunsai uyamba vi gba hal ubana a ilyuci i Pafasu. Aku a gawunsai n uza u Yahuda

u roku uza u adabu uza u kala Bara-Yesu. Eyi matsumate ma kaḅan ma, <sup>7</sup> uza ḁa wari kaḅolo n gomuna Sarajiya Bulus. Gomuna vi vuma ḁa uza u ugboji. U libana le a bana ara ne, kpaci wa ciga ṭa u pana kadyanshi ka Kashila.

<sup>8</sup> Shegai Alimasu uza u adabu vi u ḅolomgbono kaci n ele wa. (Alimasu ḁa a ka isa Bara-Yesu vi n Tsiheline.) Wa ciga a kpatala ugboji u gomuna vi tsara u pityanangu wa.

<sup>9</sup> Shegai Shawulu, uza ḁa a ka isa Bulus, ushadangi n Kulu Keri aku ku tonoi n eyi, u wundyanai Alimasu, u danai, <sup>10</sup> “Avu maku ma Kalapanansi uza u tsilala n i'ya i'ari i maci! Vu shadangu ṭa n tsukunu n ulapanasa. Va asaka unangasa ire i shinga i Magono ma Zuba wa? <sup>11</sup> Gogo-na asuvu a upan u Kashila a ka rukpa ṭa a kaci ka vunu, va rumbana ṭa, ubana a'ayin kenu va wene asu wa.”

Kute-kute karimbi ka kimba yi a'eshi, aku u kanaṭi upapa wa bolo uza ḁa wa kanaṭi yi kukere. <sup>12</sup> An gomuna wenei ili i'ya i gitai, aku u wushuki, u yain majiyan ma uwenishike u Asheku.

### *Bulus n Baranaba a Antakiya u Bisidiya*

<sup>13</sup> Bulus n atoku a nwalu a ne a asakaṭi ilyuci i Pafasu a uwai a kpatsu ubana a uyamba u Bamafiliya. An a rawai a ilyuci i Paraga, a wutaṭi a kpatsu ki, aku Yahaya Marku asakaṭi le u gonoi a Urishelima. <sup>14</sup> Shegai Bulus n Baranaba a 'yangai a Paraga a lyai kapala a banai a Antakiya\* u

---

\* **13:14** Ilyuci i re i'ya pini i'ya a ka isa Antakiya. I naha yi a kaḅon ka Bisidiya ka i'ari, i ire yi kpam a kaḅon ka Suriya ka i'ari a asu u ḁa Baranaba n Shawulu a'ari a ka rongo. Asuki 11:19–13:1.



uyamba u Bisidiya.

Kain ka Ashibi a uwai a kagata ka Kashila a dusuki. <sup>15</sup> An a yain kaneshi a itagarada i Mele ma Musa n i Ntsumate, aku azapige a kagata ka Kashila a suki a tonuko le, “Atoku, i'a baci n kadyanshi ka ku'ari ku ya doku ama, she i yain.”

<sup>16</sup> Bulus 'yanga'i u yanka le iryoci n kukere a pada bini, u danai, “Aza a Isara'ila n Awulawa a da a ka lyaka Kashila kayala, pana'ka numu! <sup>17</sup> Kashila ka aza a Isara'ila ka dangasai isheku i tsunu, u zuwai a yain kakuma a'ayin a da a rongoi a uyamba u Masar. N ucira u pige u ne u da u wutupa le pini a uyamba vi. <sup>18</sup> U kawunki n ele hal ayen amangare a kakamba.† <sup>19</sup> U wusai uyamba u aletsu a shindere a Ka'ana, aku u naka'i u da ama a ne u wokoi agadu a le. <sup>20</sup> Nala gita ta a asuvu a ayen amangatawanishi n amangarenkupa (450).

“U naka le aza a afada, kpam a rongoi pini hal ubana a'ayin a Sama'ila† matsumate. <sup>21</sup> Shegai aza a Isara'ila a zamai a naka le magono, aku Kashila ka naka le Shawulu maku ma Kishu uza u kagali ka Bayami† u lyai tsugono. <sup>22</sup> An Kashila ka takpa yi tsugono, u zuwai Dawuda. Kashila ka yain kadyanshi a kaci ka Dawuda, u danai, ‘N tsa de Dawuda maku ma Yese, vuma da uza da u tsu zuwa katakasuvu ka va ka rongo n ipeli, kpaci wa yan ta gbā ili i'ya ma ciga yi u yain.’

<sup>23</sup> “Kashila ka yain kazuwamgbani a asuvu a kagali ka vuma nala vi u zuwai Kawauwi ka aza a Isara'ila ka wuta pini. Kpam Yesu da. <sup>24</sup> Shegai

---

† **13:18** Ure u roku u da a ka fuda a ka reve udani u Tsiheline pini na u da “Kashila ka kirana ta n ele hal ayen amangare a kakamba.”

kahu Yesu tuwā, Yahaya rongo tā utonusuko ama a kpatala a lyuḅugu le. ◇ <sup>25</sup> An Yahaya yain evu n ukotso manyan ma ne, u wecikei, ‘Ya wundya mpa Kawauwi ki? Mpa Kawauwi ki wa. Kawauwi ki kà tā a utuwā, mpa n rātsa gbām ma surukpa isirikatsu i akpata a ne wa.’ ◇

<sup>26</sup> Ama a vā, eḍā aza ḍa i'ari a kagali ka Ibrahi, n aḍā Awulawa a ḍa a ka nākā Kashilā karingā, panai na! Aṭsa Kashilā ka sukunki akani a iwauwi yi. <sup>27</sup> Azapige a aza a Urishelima n ama a le a reve an Yesu ḍa Kawauwi ka mayun ki wa. A reve dem an aya nsumate n korongi a kaci ka ne kpam a tsu yansa kaneshi Ashibi dem vi wa. Shegai kadyanshi ka a yain a kaci ka ne ka shadangu tā an a kidāga yi ugana u ukpā. <sup>28-29</sup> A yan tā dere ili i'ya tagarāda u Kashilā u danai. Ko an u wokoi a tsarā unyushi u ḍa a ka wuna yi wa, gbā n nala a tonukoi Bilatu Gomuna u wandamgbana yi.

“An u kuwāi, aku a cipukā yi a mawandamgbani mi a uka yi a kasaun. <sup>30</sup> Shegai Kashilā ka 'yangasa yi tā a ukpā! <sup>31</sup> A'ayin a nala yi, u wenishike tā kaci ka ne a asu u atoni a ne aza ḍa a yansai nwalu kaḅolo a Galili hal ubana a Urishelima. Gogo-na alyā a ka tonusuko ama a tsunu ukuna u ne.

<sup>32-33</sup> “Kpam aṭsa na tsu tuko ḍa Kadyanshi ka Shinga: ili i'ya Kashilā ka yain kazuwamgbani wa yanka akaya a tsunu i'ya gai la vi. Gogo-na u yanka tsu tā i'ya aṭsu aza ḍa tsari mmuku n tsikaya n ne a'ayin a ḍa u 'yangasai Yesu a ukpā. A korongu tā ukuna u na vi a tagarāda u Ishipa u ire:

“ Aḍa Maku ma vā,

◇ **13:24** Mak. 1:4; Luk. 3:3. ◇ **13:25** Mak. 1:7; Luk. 3:16.

ara n woko t̄a Tata u vunu.’ ◊

<sup>34</sup> “Kashil̄a ka 'yanḡasa t̄a Yesu a ukp̄a kpam wa asak̄a ikyamba i ne i shama wa, dere tyoku d̄a u danai:

‘Ma zuwuka vu t̄a un̄a u shinga u uwulukpi u d̄a n da ma zuwuka Dawuda.’ ◊

<sup>35</sup> “A korongu t̄a a Ushipa u roku:

‘Va asak̄a Uza u Uwulukpi u vunu u shama wa.’ ◊

<sup>36</sup> “A'ayin a d̄a Dawuda war̄i n uma, u pan̄aka t̄a Kashil̄a. An u tuw̄a u kuwai, aku a cid̄angu yi a asu u asaun a akaya a ne, ikyamba i ne kpam i shamai.

<sup>37</sup> Shegai Kashil̄a ka 'yanḡasa t̄a Yesu a ukp̄a kpam ikyamba i ne i shama wa.

<sup>38-39</sup> “Ama a va, zuwai atsuvu mai a ili i'ya tsa tonon: adama a ili i'ya Yesu yain, i'ya i zuwai tsu tsar̄ai ucimbusa u unyushi u cingi gogo-na. Mele ma Musa ma fud̄a ma gonuko d̄a i woko dere wa. Shegai adama a Yesu, uza d̄a baci dem u wushuki wa woko t̄a dere. <sup>40</sup> Kiranai, kawa ili i'ya ntsumate n korongi ya git̄a t̄a n ad̄a. A dana t̄a:

<sup>41</sup> “ ‘Panai na, aza a majari, i shad̄angi n majiyan i kuwa!

Kpaci ma yan t̄a manyan ma roku a a'ayin a d̄e, manyan ma ya kp̄ad̄a uwushuku n ma, ko uza roku u tonuko d̄a baci tani.’ ” ◊

<sup>42-43</sup> Wut̄a d̄a Bulus n Baranaba a ka wut̄a a kagata ka Kashil̄a ki, aku aza a Yahuda n Awulawa ushani aza d̄a a ka lyaka Kashil̄a kayala a tonon le. Pini nala, Bulus n Baranaba a'ari le ugbamatan-gusu asuvu a lyai kelime n uwushukusu n ukuna u shinga u Kashil̄a. Aku ama yi a folo le a doku a

◊ 13:32-33 Ishp. 2:7. ◊ 13:34 Isha. 55:3. ◊ 13:35 Ishp. 16:10.

◊ 13:41 Hab. 1:5.

yain kadyanshi a kaci ka ili i na yi n Ashibi a ɗa a ka tuwa.

*Aza a Yahuda a 'yuwain Kadyanshi ka Shinga*

<sup>44</sup> An Ashibi a kyawain, ama a ilyuci yi ushani a tuwa ta a pana kadyanshi ka Kashila. <sup>45</sup> An aza a Yahuda a wenei kakuma ka ama ki, a yan ta malyon cika. A wishai Bulus kpam a 'yuwain ili i'ya u danai.

<sup>46</sup> Aku Bulus n Baranaba a dansai karara bawu uwonvo, a danai, “Eɗa u kanaɗi tsu gitā uyanka kuɓari ku kadyanshi ka Kashila, shegai i 'yuwain ka uwusha. Nala u wenike ta an bawu i ratsai i wushi uma u ɗa bawu wari n utyoku. Adama a nala, tsa asaka ɗa ta aku tsu bana a asu u Awulawa.

<sup>47</sup> Ili i'ya Kashila ka tonuko tsu tsu yain i'ya na:

‘N zuwa ta vu woko katyashi a asu u Awulawa,

tsara vu tuko iwauwi

hal ubana likimba gba.’ ” ◇

<sup>48</sup> An Awulawa a panai nala, a pana ta kayanyan aku a cikpalai kadyanshi ka Asheku. Aza ɗa a dangasai adama a uma u ɗa bawu wari n utyoku a wushuku ta n Asheku.

<sup>49</sup> Pini nala, kadyanshi ka Asheku ka tamburai ko nte wa a ubongu vi. <sup>50</sup> Aku aza a Yahuda a banai a asu u azapige a roku a ilyuci yi n aka a ɗa a ka naka tsupige. A zuwa le a 'yuwain Bulus n Baranaba, aku a gitā le mavura hal a loko le a kaɓon ka uyamba ki. <sup>51</sup> Aku Bulus n Baranaba a kapatsai kabuta ka a'ene a le adama u woko iryoci a kaci ka aza a ilyuci yi, pini nala, a lazai ubana

a ilyuci i Ikaniya. <sup>52</sup> Shegai atoni a Antakiya yi a woko ta n mazanga kpm ushadangi n Kulu Keri.

## 14

### *Bulus n Baranaba a Ikaniya*

<sup>1</sup> An Bulus n Baranaba a rawai a Ikaniya, a uwai a kagata ka Kashila ka aza a Yahuda tyoku da a yain kuɓari a Antakiya. Ama ushani aza a Yahuda n Awulawa a wushuku ta n kadyanshi ka Kashila.

<sup>2</sup> Shegai aza a Yahuda a da a kpaɗai uwushuku n kadyanshi ki, a vurusai a'ene a Awulawa a da bawu kotsu a wushuki, a nangasai ndishi n le n ama a Kashila yi. <sup>3</sup> Gba n nala, asuki yi a barakpai pini n ele cika, n a yanyi kuɓari ku kadyanshi ka ukuna u shinga u Asheku bawu uwonvo. Kpm u naka le ucira u uyan iryoci n ikunesavu. <sup>4</sup> Ama a ilyuci yi a pecei kure, aza roku a ka tonon aza a Yahuda, aza roku kpm a ka tonon asuki.

<sup>5</sup> Aku Awulawa a roku n aza a Yahuda n azapige a le a ɓolombonoi kaci tsara a yain asuki yi mavura, kpm a varasa le n atali a wuna. <sup>6</sup> An asuki yi a revei ukuna u da wari a nwalu, aku a sumai ubana a uyamba u Likiya; wata, ilyuci i Lisitira n Daraba n une i'ya i kyawan le. <sup>7</sup> Nte a lyai pini kapala n uyan kuɓari ku Kadyanshi ka Shinga.

### *Bulus n Baranaba a Lisitira n Daraba*

<sup>8</sup> A Lisitira vi, Bulus n Baranaba a cinai vuma roku uza da a matsai kawunu, uza da tun a matsa yi u wala wa. <sup>9</sup> Wari a upana kuɓari ku Bulus wari uyan, pini nala, Bulus wenei vuma vi wa ta n upityanangu u da u rawai a tanasa yi. <sup>10</sup> Aku

u danai, “Yāngā vu shamgba n a'ene a vunu.” Kute-kute vuma vi u 'yāngāi u gitai nwalu.

<sup>11</sup> An kakumā ka wenei ili i'ya Bulus yain, aku a 'yāngasai alagatsu n kaletsu ka aza a Likiya, a danai, “Ama a na yi ashilā a roku a ḍa a cipā tsu n iryoci i ama!” <sup>12</sup> Aku a nākai Baranaba kala Zafosa,\* Bulus kpam Hamisa kpaci aya kayain ka kadyanshi. <sup>13</sup> Pini nala, kadarakpi ka katani ka Zafosa kameli ka kari a uroto u ilyuci vi u kalai anaka n apalu u tukoi a ḍa a utsutsu u ilyuci vi, tsarā eyi n ama a ne a yanka asuki yi udarakpa.

<sup>14</sup> Shegai an asuki yi a panai nala, aku a karasai aminya a le adama a unamgbukatsuma, a uwai a asuvu a kakumā ka ama ki n ilyadi n a dansi, <sup>15</sup> “Atoku a tsunu, ndya i zuwai ya yan naha? Atsu dem ama ḍa tyoku u ḍe. Kadyanshi ka Shinga ka tsu tuko ḍa tsarā i kpatala i asaka ili i gbani i nala yi i gono a asu u Kashilā Uza u Uma, uza ḍa u yain zuba n likimba n kushiva n gba ili i'ya i'ari pini a asuvu a le. <sup>16</sup> Caupa u asaka ta gba ama a likimba a yain ili i'ya i luwa le. <sup>17</sup> Shegai u tsu wenike ta kaci ka ne a asu u ili i shinga i'ya u tsu yansa. Kashilā ka tsu suku ta mini ma zuba, tsarā iceshi i ḍe i yain. U naka ḍa kpam ilikulya kpam u zuwa ḍa ipeli.” <sup>18</sup> Gba n kadyanshi ka a yanka le vi, she na a matsai aku a fudai a bishinka le udarakpa vi adama a le.

<sup>19</sup> Shegai aza a Yahuda a roku a wutai a uyamba u Antakiya n Ikaniya a leshei ama yi a varasai Bulus a rono yi ubana a uroto u ilyuci, n a dani u kuwa ḍe. <sup>20</sup> An Atoni a tuwai a kyawan yi, aku u

---

\* **14:12** Zafosa kameli ka pige ka aza a Heline ka, Hamisa kameli aya matsumate ma ne.

'yangai u gonoi pini a ilyuci yi. An kain ka wansai aku a lazaɪ ubana a Daraba kaɓolo n Baranaba.

*Bulus n Baranaba a gonoi a Antakiya*

<sup>21</sup> An Bulus n Baranaba a yain kuɓari ku Kadyanshi ka Shinga a Daraba, a tsara ta Atoni ushani. Pini nala, a gonoi a Lisitira n Ikaniya n Antakiya u Bisidiya. <sup>22</sup> A gbamatangusu ta atakasuvu a ama a Kashila n a bara le a shamkpa upityanangu u le mai, n a dansi, “She tsu pana ikyamba aku tsu tsara u'uwa a tsugono tsu Kashila.”

<sup>23</sup> Bulus n Baranaba a yain kvasu n kakuli, aku a dangasakai kuwa ku Atoni dem nkoshi. A naka le a asu u Asheku uza da nkoshi mi n wushuki n eyi.

<sup>24</sup> An a tonoi a Bisidiya aku a rawai a Bamafiliya.

<sup>25</sup> An a yain kuɓari a Paraga, aku a lazaɪ ubana a Ataliya. <sup>26</sup> Pini nala, a uwai a kpatsu a banai a Antakiya, a asu u da caupa a yanka le kvasu tsara Kashila ka kirana n ele a asuvu a manyan ma a kotsoi vi.

<sup>27</sup> N urawa u le, aku a ɓolomgbonoi ama a Kashila a asu u te a tonuko le ili i'ya Kashila ka yain adama a le, n tyoku da kpam u kukpunkai Awulawa ure u upityanangu. <sup>28</sup> Aku a barakpai pini n ama a Kashila.

## 15

*Asheshi a Atoni a Urishelima*

<sup>1</sup> An Bulus n Baranaba a'ari a Antakiya u Suriya, aku ama roku a wutai a Yahuda a tuwai a Antakiya a ka wenishike Atoni. Aku a ka dansa, “A kida da baci acombi tyoku da Mele ma Musa ma danai

wa, ya tsarā iwauwi wa.” <sup>2</sup> Pini nala, Bulus n Baranaba a yain kananamgbani n ele cika, adama a kadyanshi ka nala ki. Aku Atoni† a zuwai Bulus n Baranaba n Atoni a roku a bana a Urishelima a asu u asuki nā nkoshi n kuwa ku Atoni, tsarā a dansa kadyanshi ki. <sup>3</sup> Aku a soku le a lazai, a tonoi a uyamba u Finisiya n Samariya, n a nāki alabari tyoku da Awulawa a wushuki. Nala zuwa ta Atoni a panai kayanyan cika. <sup>4</sup> An a rawai a Urishelima, Atoni, n asuki, nā nkoshi a ryabusa le. Aku Bulus n Atoni a da a banai kaḅolo n eyi, a tonuko le gba ili i'ya Kashila ka yankai ama ushani a akere a le.

<sup>5</sup> Shegai Atoni a roku, aza a kaḅon ka Afarishi, a 'yangai a danai, “U kana ta Awulawa a kida acombi, a toni kpmam ili i'ya Mele ma Musa ma danai.”

<sup>6</sup> Aku asuki yi nā nkoshi mi a bolomgbonoi, tsarā a webele kadyanshi ki. <sup>7</sup> An a barakpai a kananamgbani ki, aku Bituru 'yangai kushani u tonuko le, “Aza a va, i reve ta Kashila ka dangasa mu ta caupa a asuvu a de, u da ara va da Awulawa a ka pana kuḅari ku Kadyanshi ka Shinga, kpmam a wushuku. <sup>8</sup> Kashila uza da u revei atakasuvu a ama gba, u wenike tsu ta an u wushai Awulawa a asu u da u naka le Kulu Keri tyoku da u naka tsu. <sup>9</sup> U bidya tsu kau-kau n ele wa, kpaci adama a upityanangu u le u da u wulukpe le. <sup>10</sup> Adama a nala, nida ya ciga i kondo Kashila a asu u utadanku Awulawa a na ucanga u da bawu atsu n isheku i tsunu tsa fuda tsa canga? <sup>11</sup> Wa yan nala wa! Tsu wushuku ta an adama a ukuna u shinga u Yesu Asheku u da tsu tsarai iwauwi, kpmam tyoku da ele dem a tsarai iwauwi.”



12 Pini nala, ama yi a pađai bini, a ka panaka Baranaba n Bulus tyoku da a ka dansa iryoci n ikunesavu i'ya Kashila ka yain a asu u Awulawa a akere a le. 13 An a kotsoi kadyanshi, aku Yakubu\* danai, "Atoku a va, panaka numu. 14 Simo Bituru tonuko tsu ta tyoku da Kashila ka gitai utuwa a asu u Awulawa a roku u gonuko le ama a ne. 15 Nala wa ta dere n kadyanshi ka ntsumate n korongi ili i'ya Magono ma Zuba ma danai,

16 " "Ma gono ta n lapula n mai kuwa ku Dawuda ka ku wasai.

Ko an u woko ku wasai, ma lapula ta n mai ka kpm n shamkpa ka.

17 Nala ma yan, tsara aza da a buwai vi a kpatala a asu u va, gba n Awulawa dem, n aza da n dangasai a woko ama a va. Mpa, Magono ma Zuba, mpa n danai nala.

18 N yan ta kazuwamgbani nala tun caupa.' " ◇

19 Yakubu lyai kapala n kadyanshi, "Adama a nala, u gan tsu matsa Awulawa, aza da a ka kpatalasa ubana a asu u Kashila wa. 20 Shegai tsu koronku le ukanikorongi tsu tonuko le kotsu a lyai ilikulya i'ya a daramkpai kameli wa, kotsu a yain tsishankala wa, n utakuma u inyama i manama ma a piyanlai udyoku wa, ko kpm inyama i'ya i buwai na mpasa wa. 21 Kpaci Mele ma Musa ma na mi a'a ta ma a uwenishike a agata a Kashila a aza a Yahuda a ilyuci dem n kain ka Ashibi tun a a'ayin a cau."

### *Asheshi a korongi ukanikorongi*

\* **15:13** Yakubu na vi, vangu u Yesu da. ◇ **15:18** Emo. 5:25-27; Isha. 45:21.

<sup>22</sup> Aku asuki na nkoshi n kuwa ku Atoni, kabolo n aza a kuwa yi gba, a wenei u lobono ta a dangasa aza roku a asuvu a le a suku le a Antakiya kabolo n Bulus n Baranaba. Aku a dangasai Yahuza, uza da a ka isa Barasaba, n Sila, azapige da a asuvu a Atoni.

<sup>23</sup> A naka le ukanikorongi u da u danai,

“Idyani a asu u atoku a de asuki na nkoshi n kuwa ku Atoni, ubana a asu u Awulawa aza da a'ari Atoni, aza da a'ari a ilyuci i Antakiya n iyamba i Suriya n Kilikiya.

<sup>24</sup> “Tsu pana ta alabari a da aza roku a asuvu a tsunu a tuwa ta ara de. Tsu pana ta a 'yangasaka da atakasuvu n kadyanshi ka le, a dangbarasa da, ko an u wokoi atsa tsu suku le a yain nala wa.

<sup>25</sup> An tsu dansai kadyanshi ki, tsu wenei u lobono ta tsu dangasa aza roku a asuvu a tsunu tsu suku le ara de kabolo n atoku a tsunu Baranaba n Bulus.

<sup>26</sup> Ama da a nakai uma u le ko a ka kuwa baci adama a kala ka Yesu Kawauwi. <sup>27</sup> Adama a nala a da dem tsu sukunku da Yahuza n Sila, ara le da ya pana ukuna u ili i'ya tsa koronku da na vi. <sup>28</sup> Kulu Keri ku wenike tsu ta ku da kotsu a zuwuka da araji wa. <sup>29</sup> Shegai kotsu i lyai ili i'ya a darankpai kameli wa. Kotsu i takuma unyama u da wari na mpasa wa, ko kpam unyama u manama ma a piyanlai udyoku. Kpam kotsu i yain tsishankala wa. I kirana baci n ili i na yi, ya rongo ta mai.

“U yan tsu ben.”

<sup>30</sup> Aku a lazai ubana a Antakiya. An a rawai a bolomgbonoi Atoni yi a asu u te, a naka le ukanikorongi vi. <sup>31</sup> An ama yi a yain u da kaneshi, aku a

yain mazanga cika a adama a ugbami u atakasuvu u da a doku le.

<sup>32</sup> Yahuza n Sila tani an u wokoi ele ntsumate n da, aku a dansai cika n a gbamatangu le atakasuvu a shamgba n ucira. <sup>33</sup> An a yain a'ayin pini kenu, aku Atoni a Antakiya a soku le n katsuma ka eri tsara a gono a asu u aza da a suku le. [ <sup>34</sup> Shegai Sila wenei ulobono ta u shamgba pini n ele.]†

<sup>35</sup> Bulus n Baranaba a wokoi a Antakiya, ele n ama roku ushani a ka wenishike n a dansi kadyan-shi ka Asheku.

### *Upecene u Bulus n Baranaba*

<sup>36</sup> An a yain a'ayin, aku Bulus tonukoi Baranaba, “Tuwa tsu bana a ilyuci i'ya tsu yain kuɓari ku kadyan-shi ka Asheku, tsu kondo atoku yi tsara tsu wene tyoku da a'ari.” <sup>37</sup> Baranaba ciga ta a bidya Yahaya Marku u bana dem n ele. <sup>38</sup> Shegai Bulus wenei ulobono a bana n eyi wa, kpaci u asaka le ta caupa a ilyuci i Bamafiliya, kpam u 'yuwain u lyai kapala n manyan mi kaɓolo n ele.

<sup>39</sup> Aku kananamgbani ka uwai a mere ma le, hal ka zuwai a pecenei. Baranaba bidyai Yahaya Marku a uwai a kpatsu ubana a ilyuci i Sayipuru. <sup>40</sup> Shegai Bulus dangasai Sila. Aku atoku yi a yanka le kavasu ka ndishi n shinga, Asheku a kirana n ele, pini nala, a lazai. <sup>41</sup> Bulus kyawunsai uyamba u Suriya n Kilikiya n u gbamatangusi atakasuvu a aza da a'ari a a'uwa a Atoni yi.

---

† **15:34** Akorongi a cau ushani aza da a purai a tagarada u Manyan ma Asuki a kalatsa ta makpanda ma 34.

# 16

## *Timoti yain nwalu n Bulus n Sila*

<sup>1</sup> Bulus banai a Daraba n Lisitira, a asu u ɗa Katoni uza u kala Timoti wa rongo. Mma u ne dem Katoni ka, uza u Yahuda, tata u ne tani uza u Heline† u ɗa. <sup>2</sup> Atoni a ɗa a'ari a Lisitira n Ikaniya a ka cikpala ta Timoti cika. <sup>3</sup> Bulus wa ciga ta Timoti toni le. Adama a nala u zuwai a kiɗa yi kacombi kahu a laza. U yan ta nala adama a aza a Yahuda, kpaci ya dem reve ta tata u ne uza u Heline u ɗa. <sup>4</sup> Tyoku ɗa a'ari ukyawunsa a ilyuci ilyuci, a rongoi utonusuko ama ukuna u ɗa asuki na nkoshi a shamkpai a Urishelima, aku a folo le a toni ukuna u nala vi. <sup>5</sup> Nala aza a a'uwa a Atoni yi a rongoi udoku upityanangu n ucira n kakuma kain dem.

## *Bulus wenei kuwene a Taruwasa*

<sup>6</sup> Bulus n atoku a ne a lazai a tonoi a asuvu a uyamba u Firijiya n Galatiya, kpaci Kulu Keri ku bihinka le ta uyan kadyanshi ka Asheku a uyamba u Asiya a a'ayin a nala yi. <sup>7</sup> An a rawai utyoku u uyamba u Misiya, a cigai a bana a Bitiniya, shegai Kulu ku Yesu ku wushunku le wa. <sup>8</sup> Aku a walai a uyamba u Misiya ubana a ilyuci i Taruwasa a ikengi i kushiva.

<sup>9</sup> N kayin, Bulus wenei kuwene. A kuwene ki, u wenei uza u Masidaniya kushani wa folo yi, u danai, “Tuwa a Masidaniya vu banga tsu.” <sup>10</sup> An u kotsoi uwene kuwene ki, kute-kute tsu\* kana ure ubana a Masidaniya, kpaci tsu reve ta Kashila

---

\* **16:10** Kazoli ka kala ka “atsu” pini na vi, yanka ɗa a yankai ka manyan kpaci Luka uza ɗa u korongi tagarada vi u tono ta asuki yi a a'ayin a nala yi.

ka ka isa tsu tsu yanka le kuɓari ku Kadyanshi ka Shinga.

*Lidiya wokoi Katoni*

<sup>11</sup> Aku tsu uwai kpatsu a Taruwasa, tsu karai ubana a uyamba u mere u mini u Samutarasu. An kain ka wansai, tsu rawai a ilyuci i Niyapali.

<sup>12</sup> Pini nala, tsu wurai ubana a Filibi, ilyuci i'ya aza a Roma a'ari ushani a uyamba u Masidaniya, u da u wari a kere ka tsugono tsu Roma. Tsu rongoi pini a'ayin ushani.

<sup>13</sup> Kain ka Ashibi tsu wutaɪ a utsutsu u ilyuci vi ubana a una u agata, asu u da tsu wenei yavu a asu u kvasu u aza a Yahuda wa ta pini. Aku tsu dusuki tsu dansai n aka a da a bolomgbonoi ukuna u Asheku. <sup>14</sup> Uka roku da pini uza u kala Lidiya, kapani ka uwonvo u Kashila wa pana ka tsu. Eyi uza u ilyuci i Tayatira u da, kadengi ka aminya a ikebe a mini ma galura a da. Kashila ka kukpai katakasuvu ka ne, hal u wushuki n ili i'ya Bulus wa tono. <sup>15</sup> An a lyubugu yi kabolo n aza a kuwa a ne, aku u folo tsu, u danai, "An u wokoi i wushuki mpa katoni ka Asheku ka, tuwai i cipa a kuwa ku va." U rongo tsu a ufolo hal u fuda tsu aku tsu wushuki.

*A ukai Bulus n Sila a kuwa ku a'ali*

<sup>16</sup> Kain ka te, an tsa bana a asu u kvasu, tsu gawunsai n kagbashi ka kari makere, uza u ityoni i cingi i udana ili i'ya ya gita. Azakuwa a ne a ka tsarasa ta ikebe cika n manyan ma udana ili i'ya ya gita i'ya makere mi ma yansa. <sup>17</sup> Aku u rongo tsu utono n u salasi, "Ama a na yi agbashi a Kashila a da, Uza u Ucira Gba. Tuwa da a tuwai a tonuko da tyoku da ya tsara iwauwi." <sup>18</sup> Nala u

rongoi uyan hal a'ayin ushani, hal asuvu a namgbai Bulus, aku u kpatalai u ɓaranai ityoni i cingi yi, “A asuvu a kala ka Yesu Kawauwi, pecemgbene n eyi.” Kute-kute i pecemgbenei n eyi.

<sup>19</sup> An azakuwa a makere yi a wenei ure u utsarasa u ikebe i le u kimba ɗe, aku a kaɗai Bulus n Sila, a rono le ubana a kuden a kapala ka aza a afada. <sup>20</sup> An a rawai aku a danai, “Aza a Yahuda a na a ka damgbarasa ta ilyuci i tsunu. <sup>21</sup> Ili i'ya bawu i gain atsu aza a Roma tsu wushi, i'ya a ka wenishike.”

<sup>22</sup> Aku ama a lazai a kyawan le a ka dansa, “Mayun ɗa, nala wari.” Aza a afada yi a zuwai a monduso le aminya n ucira, a bawan le. <sup>23</sup> An a bawan le, aku a uka le a kuwa ku a'ali, a zuwai uza ɗa wa kirana n kuwa ki u wundi le mai. <sup>24</sup> An u panai nala, u uka le a kunu ku asuvu ku kuwa ki, aku u gbagbalai a'ene a le a kagbukulu.

<sup>25</sup> Ubana kayin a mere, Bulus n Sila a ka yan kavasu n ishipa i ucikpala Kashila, aza ɗa a'ari dem pini a kuwa ku a'ali ki a ka panaka le. <sup>26</sup> Kute-kute iyamba i gbaɗai cika, hal kami ka kuwa ku a'ali ki ka gbaɗai. Pini nala, itsutsu yi i giduwai gba. Ikani i'ya a sirasai aza ɗa a'ari pini a kuwa ku a'ali ki i saruwai.

<sup>27</sup> An uza ɗa wa kirana n kuwa ki u rikpanakai alavu, u wenei itsutsu i kuwa yi gba ugiduwi. Wa wundya aza a kuwa ku a'ali ki a suma ɗe, aku u talai burundu u ne wa ciga u wuna kaci ka ne. <sup>28</sup> Shegai Bulus ɓarana yi, u danai, “Kotsu vu nei kaci ka vunu usan wa, gba tsunu tsata pini.”

<sup>29</sup> Aku uza ɗa wa wundya kuwa ki u danai a tuko ncikalu. U wuranai u uwai a asuvu u rukpai a

kapala ka Bulus n Sila, n u jeki ikyamba adama a uwonvo. <sup>30</sup> Aku u wutukpa le a kateshe, u danai, “Ndyā ma yan tsarā n tsarā iwauwi?”

<sup>31</sup> Ele tani a danai, “Pityanangu n Yesu Asheku, avu na aza a kuwa a vunu ya tsarā tā iwauwi.”

<sup>32</sup> Aku a yanka yi kadyanshi ka Asheku n aza a kuwa a ne gba. <sup>33</sup> N kayin ka nala ki, u zaṣa le usan u le, aku kute a lyuḅugu yi n aza a kuwa a ne dem. <sup>34</sup> Aku u uka le a asuvu a kuwa ku ne u tuko le ilikulya. Eyi n aza a kuwa a ne gba a shadangi n ipeli adama a ḍa a pityanangi n Kashila.

<sup>35</sup> An kain ka wansai, aku aza a afada yi a suki adagari a ba a dana a aṣaka ama a nala yi.

<sup>36</sup> Aku uza ḍa wa kirana n kuwa ku a'ali ki u bankai Bulus akani, u danai, “Aza a afada a suku ḍe a aṣaka ḍa, adama a nala, she i wuta i wala alafiya.”

<sup>37</sup> Shegai Bulus danai, “Atsu aza a Roma a ḍa, kpam a bawan tsu a kapala ka ama bawu afada, a uka tsu a kuwa ku a'ali. Niḍa a ka yansa a wutukpa tsu usokongi? Wa yan wa! Shegai a tuwa n kaci ka le a wutukpa tsu.”

<sup>38</sup> Adagari yi a ba a tonukoi aza a afada kadyanshi ki. Aku uwonvo u kanai aza a afada yi, an a panai a da ele aza a Roma a ḍa. <sup>39</sup> A tuwai a kuwa ku a'ali ki, a foloi Bulus n Sila a yanka le ahankuri. A'ayin a ḍa a wutukpa le, aku a folo le a aṣaka ilyuci yi. <sup>40</sup> An Bulus n Sila a wuta a kuwa ku a'ali ki, aku a lazai karara she a kuwa ku Lidiya. An a wenei Atoni, aku a gbamatangusu le atakasuvu cika kahu a aṣaka a ilyuci yi.

# 17

## *Bulus ba u kondoi Tasaloniya*

<sup>1</sup> An Bulus n Sila a wurai a Amihipali n Apoloni, aku a tuwai a Tasaloniya a asu u da wari n kagata ka Kashila ka aza a Yahuda. <sup>2</sup> Bulus uwai pini tyoku da u cuwanakai, hal Ashibi a tatsu a'ari a uyan kadyanshi ka ukuna u Kashila a itagarada i Kashila, <sup>3</sup> wari le ukasanasa n u tonusuko le mayun da Kawauwi ka pana ikyamba kpam u 'yanga a ukpa. U tonuko le, "Yesu da mari da utonusuko na vi, aya gai Kawauwi ki." <sup>4</sup> Aku ama roku aza a Yahuda, n aza a Heline aza da a ka gbashika Kashila, n aka roku ushani, a wushuki n kadyanshi ka Bulus n Sila, kpam a bolomgbonoi n ele.

<sup>5</sup> Shegai aza a Yahuda a ka yan malyon cika, aku a banai a kuden a bolomgbonoi ama aza a ahali a cingi, a 'yangasai atakasuvu a ama a ilyuci yi gba le. A sumai ubana a kuwa ku Yason, tsara a tuko Bulus n Sila a kapala ka kakuma ka ama ki. <sup>6</sup> Shegai an bawu a cina le, aku a ronoi Yason n Atoni a roku ubana a asu u azapige a afada. A ka salasa, "Bulus n Sila alya a ka 'yangasasa atakasuvu a ama a likimba, alya na dem a rawai ara tsunu. <sup>7</sup> Kpam Yason da cipuka le a kuwa ku ne. Kpam gba le a ka tono mele ma Kaisa wa, n a dansi magono ma roku ma pini a ka isa Yesu."

<sup>8</sup> An a panai nala, aku aza a ilyuci yi n azapige a afada yi atakasuvu a le a 'yanga. <sup>9</sup> A asaka le wa, she na a zuwai Yason n ama yi a tsupai ikebe i u'asaka, aku a asaka le a lazai.

## *Bulus n Sila a ba a kondoi Biriya*



<sup>10</sup> An kayin ka yain, aku Atoni yi a soku le, a lazai ubana a Biriya. An a rawai de, a uwai a kagata ka Kashila ka aza a Yahuda. <sup>11</sup> Shegai aza a naha a la ta aza a Tasaloniya ahali a shinga, kpaci a wusha ta kadyanshi ki n akere a re. A'ari ukonduso Itagarada i Ntsumate kain dem, tsara a wene ko ili i'ya Bulus wa tonusuko le vi mayun da. <sup>12</sup> Ama ushani a pityanangu ta n Asheku. A asuvu a aza da a wushuki vi, alya aza a Yahuda, kaolo n aka a roku ushani aza a Heline aza da a'ari n tsupige a ilyuci yi, hal n a'ali aza a Heline dem.

<sup>13</sup> An aza a Yahuda aza da a'ari a Tasaloniya, a panai a da Bulus da pini wa yan kuɓari ku kadyanshi ka Kashila a Biriya, a banai de n a lapanasi kakuma ka ama ki n a 'yangasasi le atakasuvu. <sup>14</sup> Kute-kute Atoni yi a soki Bulus ubana a kushiva, shegai Sila n Timoti a shamgbai ve pini. <sup>15</sup> Aza da a soki Bulus vi, a soku yi ta hal ubana a Atina. An a ka gono, aku Bulus naka le akani a tuwa a tonuko Sila n Timoti a tuwa a cina yi pini gogo.

### *A banai a ilyuci i Atina*

<sup>16</sup> A'ayin a da Bulus wari a uvana Sila n Timoti a Atina, u namgba ta katsuma an u wenei ilyuci yi i shadangi n ameli. <sup>17</sup> U tsu yan ta kadyanshi a kagata ka Kashila n aza a Yahuda n Awulawa aza da a ka tono Kashila. Kpam kain dem u tsu yan ta kadyanshi n aza da u tsu cina a kuden. <sup>18</sup> An Bulus wari a uyan kuɓari ku Yesu n u'anga u

ukpa vi, aku ayawunshi a Epikuriya\* n ayawunshi a Sitokiya a yain kananamgbani n eyi. Aza roku a le a wecikei, “Ndya uza u kacan naha wa tonon?”

Aza roku a danai, “Yavu uza u uyan kuɓari ku ameli a roku a ɗa, bamu n a tsunu.”

<sup>19</sup> Adama a nala, aku a bidya yi a banka yi a asu u Asheshi a ɗa a ka isa Arasa, a danai, “Ko va tonuko tsu ucun u uwenishike u savu u ɗa va yan na vi?”

<sup>20</sup> Kpaci kotsu tsu pana ukuna u na vi wa, kpam tsa ciga ta tsu reve kalen ka ne.” <sup>21</sup> Gba aza a Atina n amoci a ɗa a'ari pini na ndishi a la ta uciga a barakpa a upana kadyanshi ka savu kpam a dansa ka kapala n ili gba.

<sup>22</sup> Bulus shambai a kapala ka asheshi yi, u danai, “Eda, aza a Atina, n reve ta eda aza a uciga utono adini a ɗa cika.” <sup>23</sup> Kpaci an ma kyawunsa a ilyuci yi, ma konduso ili i'ya ya gbashika. N wene ta asudarakpa u roku n ikorongi a zuba u ne, i danai, ‘Adama a Kashila ka Bawu a Revei.’ Uza ɗa ya gbashika bawu i reve yi vi, aya Kashila kpam aya ma tonuko da ukuna u ne.

<sup>24</sup> “Kashila ka ka yain likimba n ili i'ya i'ari a asuvu a ne. Aya Magono ma Zuba ma zuba n iyamba, u tsu dusuku a Kuwa ku Kashila ka vuma mai wa. <sup>25</sup> Nala dem u tsu ciga vuma a banga yi n ili i kukere i ne wa. U namba ili wa, kpaci aya u nakai gba ama uma, n kuvi, n ili i'ya a ka ciga.

---

\* **17:18** Aza ɗa a tsu kondonuso ili i'ya ya gitasa a likimba alya a tsu isa “Ayawunshi.” Kpam a tsu sheshishe ta a'ayin dem tyoku da likimba wari. Ayawunshi a Epikuriya a tsu rongo ta a usheshe a kaci ka ili i'ya a ka ciga adama a upana kayanyan ka kaci ka le. Ayawunshi a aza a Sitokiya a tsu rongo ta a usheshe adama a kaci ka le. Ele a tsu ciga ili i'ya ya tuko upana kayanyan wa.

<sup>26</sup> Aya kpam u yain gb̄a ama a asu u vuma u te. U d̄angas̄aka le asu u d̄a a ka dusuku gb̄a a kubain ku likimba. Kpam u fobusuko le a'ayin a d̄a gb̄a ama yi a ka rongo.

<sup>27</sup> “Kashil̄a ka yan t̄a nala tsar̄a a zami yi, kpaci a papura baci a ka tsar̄a yi t̄a, ko an u wokoi u yan m̄bari n ele wa. <sup>28</sup> Adama a ne a d̄a tsari n uma, tsa zamgb̄anas̄a kpam, adama a ne a d̄a tsu wokoi ili i'ya tsari, tyoku d̄a ashipi a d̄e a roku a danai, ‘Ātsu aza a kagali ka ne a d̄a.’

<sup>29</sup> “An u wokoi ātsu aza a kagali ka Kashil̄a a d̄a, u gan tsu ratsan̄aka Kashil̄a n ili i'ya a yain n zinariya ko azurufa ko katali, i'ya vuma u yain n ugboji u ne wa. <sup>30</sup> Caupa Kashil̄a kari ka foro ama a unyushi u le wa, adama a ukpa d̄a u ureve u le. Shegai gogo-na u tonuko t̄a ama ko nte wa a kpatala a as̄aka tsicingi tsu le tsu ugbashika ameli.

<sup>31</sup> “Kpaci u d̄angasa d̄e kain ka wa tuw̄a u yanka likimba afada a d̄a a'ari dere a kukere ku uza d̄a u d̄angasai. Kashil̄a ka as̄aka tsu t̄a tsu reve vuma u nala vi a asu u d̄a u 'yanḡasa yi a ukpa.”

<sup>32</sup> An a panai adama a u'yanḡa u ukpa, aku aza roku a yanka yi majari, shegai aza roku a danai, “Tsa ciga t̄a tsu doku tsu pana ukuna u d̄a vu danai nala vi.” <sup>33</sup> Pini nala, Bulus as̄akai asheshi yi. <sup>34</sup> Shegai ama roku a asuvu a le a wushuki n kadyanshi ka Bulus a wokoi Atoni. A asuvu a Atoni a savu yi alya Diyonisiyu uza d̄a wari asuvu a asheshi, n uka u roku uza d̄a a ka isa Damari, kabolo n aza roku kpam.

## 18

*Bulus ba u kondoi Korintiya*

<sup>1</sup> Aku Bulus asakai Atina u banai a Korintiya, <sup>2</sup> nte u cinai uza u Yahuda u roku de uza da a ka isa Akila, uza da a matsai a ilyuci i Pontu. Akila n uka u ne Bilikisu a barakpa n urawa an a wutai a uyamba u Italiya\* wa. Kpaci an u wokoi Kaladiyu magono u zuwa ta mele u da gba aza a Yahuda a asaka ilyuci i Roma. <sup>3</sup> Bulus rongo ta n ele n uanyi manyan n ele, kpaci ele aza a tsilaga tsa uyan atani a da tyoku u ne.

<sup>4</sup> Ashibi dem Bulus wa ta a kagata ka Kashila uyan kadyanshi n aza a Yahuda n aza a Heline. Wa ciga u zuwa le a wushuku n eyi. <sup>5</sup> An Sila n Timoti a wutai a Masidaniya a tuwai a Korintiya, aku Bulus nakai kaci ka ne gba a asu u uyan kuɓari n u tonusuki aza a Yahuda, “Kawauwi ka ya bolo vi, Yesu da.” <sup>6</sup> Shegai an aza a Yahuda a 'yuwan yi a taka yi n inyashi, Bulus kapatsai kabuta ka aminya a ne,† u danai, “Mpassa n de ma ta a kaci ka de, mpa kabirya mu wa.‡ Ili i'ya i bidyai n gogo-na ubana a kapala a asu u Awulawa da ma bana.”

<sup>7</sup> Pini nala, u ba u dusuki n Titiyu Yusutu Kawulawa uza u ulyaka Kashila kayala, kɓam kuwa ku ne ka ta evu n kagata ka Kashila. <sup>8</sup> Kirisibu uzapige u kagata ka Kashila n aza a kuwa a ne gba a pityanangu ta n Asheku. Ama ushani a Korintiya dem a pityanangi, aku a lyubuɓu le.

---

\* **18:2** A'ayin a Yesu, ilyuci i Roma i'ya ilyuci i pige a uyamba u Italiya a asu u da Kaisa Magono wari, kɓam a asu u da azapige azapige ama a'ari. Tsugono tsu Roma tsa ta tsu pige, nte dem uyamba u Masar n u Isara'ila n u Anasara wari pini. † **18:6** A'ayin a nala yi, uza u kapatsa baci kabuta ka a'ene ko ka aminya, wa wenike ta an u 'yuwain ama. ‡ **18:6** Ili i'ya baci dem i tsara da unyushi u de u da, mpa kabirya mu wa.

<sup>9</sup> Kain ka te n kayin, Asheku a ka yanka Bulus kadyanshi a kuwene u tonuko yi, “Pana uwonvo wa, yan kuɓari! Kotsu vu paɗa bini wa! <sup>10</sup> Kpaci ma ta n avu, kpam ko uza wa ne vu usaŋ wa. Ma ta n ama ushani pini a ilyuci i na yi.” <sup>11</sup> Bulus dusuki pini a ilyuci yi hal kayen ka te n uwoto u teli, u rongo le uwenishike kadyanshi ka Kashila.

<sup>12</sup> Shegai a a'ayin a ɗa Galiya wari gomuna u uyamba u Akataya, aza a Yahuda a ɓolomgbonoi kaci a 'yangaṣaṣakai Bulus, a banka yi a kapala ka aza a afada. <sup>13</sup> A danai, “Vuma na ama ɗa wa ciga a lyaka Kashila kayala a ure u ɗa mele ma ɓishinkai.”

<sup>14</sup> Shegai an Bulus wa ciga u gita kadyanshi, aku Galiya kpatalai a asu u aza ɗa a 'yangaṣaṣakai Bulus, u danai, “Panai eɗa aza a Yahuda, a ɗa baci nusa ɗa u nusai, ko kpam u yain unyushi u pige u roku, an mari ma panaṣa ɗa ta. <sup>15</sup> Shegai an u wokoi kananamgbani ki a kaci ka idani, n a'ala a ɗa n mele ma ɗe koshi, she i yain afada yi n kaci ka ɗe. Mpa ma yan icun i afada a nala yi wa.” <sup>16</sup> Aku u loko le a kunu ku afada ki. <sup>17</sup> Aku kakuma ki ka kanaṣi Sasatsani uzapige u kagata ka Kashila, a lapa yi a kapala ka kunu ku afada ki. Shegai Galiya kirana n ele wa.

### *Bulus gonoi a Antakiya n Suriya*

<sup>18</sup> An ukuna u nala u wurai, Bulus doku rongoi a Korintiya a'ayin kenu. Aku u tonukoi Atoni yi u ɗa eyi wa laza. U uwai a kpatsu kaɓolo n Bilikisu n Akila a kanaṣi ure ubana a Suriya. Shegai kahu a 'yanga, Bulus kuruwa ta kaci ka ne a Kankiriya, tyoku u agadu a aza a Yahuda, an u wokoi u yain kazuwamgbani n Kashila.

<sup>19</sup> An a rawai a Afisu, (pini a ilyuci yi Bulus asakai Bilikisu n Akila,) aku Bulus uwai a kagata ka Kashila tsara u dansa n aza a Yahuda. <sup>20</sup> Aku a folo yi u doku u rongo n ele, eyi tani u wushuku wa. <sup>21</sup> Shegai an wa asaka le, u danai, “Kashila ka wushuku baci, ma gono ta a asu u de.”

<sup>22</sup> An Bulus asakai Afisu u uwai kpatsu ubana a Kasariya, aku u wurai ubana a Urishelima. U ba u danasai Atoni, pini nala, u lazai ubana a Antakiya. <sup>23</sup> An u barakpai pini kenu, aku u 'yangai u kyawunsai uyamba u Galatiya n uyamba u Firi-jiya. U tonoi a ilyuci ilyuci n u gbatangusi Atoni atakasuvu, tsara a gbonguro a ure u Asheku.

### *Apolo yain kuɓari a Afisu*

<sup>24</sup> A'ari pini, aku uza u Yahuda u roku uza u kala Apolo tuwai a Afisu. Kpam uza u ilyuci i Alizandariya u da, karevi ka kadyanshi. U reve ta tagarada u Kashila cika. <sup>25</sup> A wenishike yi ta a asuvu a Ure u Asheku. U bidya ta kadyanshi ka Kashila ki mayun mayun n ucira, kpam wa wenishike ukuna u Yesu u maci vi. Shegai ukuna u ulyubugu u Yahaya u da u revei koshi. <sup>26</sup> Aku u kana kuɓari a kagata ka Kashila n ucira u ne gba. An Bilikisu n Akila a panai kadyanshi ka ne, a rono yi a banka yi a kuwa, a doku a tonusuko yi ukuna u Kashila cika.

<sup>27</sup> An Apolo wa ciga u pasambana ubana a uyamba u Akataya, Atoni a banga yi a koronki Atoni a da a'ari a Akataya vi ukanikorongi tsara a wushi yi n akere a re. An u rawai tani de, u woko ta kabangi ka aza da a pityanangi a asu u ukuna u shinga u Kashila, <sup>28</sup> kpaci u varangu ta

aza a Yahuda cika a kapala ka ama, u kasanasaka le tagarada u Kashila an Yesu Kawauwi ka.

## 19

### *Bulus a ilyuci i Afisu*

<sup>1</sup> A'ayin a da Apolo wari a Korintiya, Bulus walai pini a uyamba vi hal ubana a Afisu, a asu u da u cinai Atoni a roku. <sup>2</sup> U wece le, "I wusha Kulu Keri a'ayin a da i wushuki vi?"

A danai, "Tsu reve gbam ili i roku Kulu Keri wa."

<sup>3</sup> U wece le, "Ucun u ulyubugu u eni u da a lubugu da?"

A wushunku yi, "Ucun u ulyubugu u Yahaya u da."

<sup>4</sup> Bulus danai, "Ulyubugu u Yahaya u ukpatala u da. Yahaya tonusuko ta dem ama a pityanangu n uza da wa tuwa a kucina ku ne; wata, Yesu."

<sup>5</sup> An a panai nala, aku a lyubugu le a asuvu a kala ka Yesu Asheku. <sup>6</sup> An Bulus tadanku le akere, aku Kulu Keri ku cipa le. Pini nala, a gitai kadyanshi n aletsu a roku n a yanyi kadyanshi ka ukuna u Kashila. <sup>7</sup> Gba gba evu n ama kupa n ama a re a da.

<sup>8</sup> Bulus uwai a kagata ka Kashila n u yanyi kuɓari bawu uwonvo hal uwoto u tatsu, n u yanyi kadyanshi n ele n u tonusuko le ukuna u tsugono tsu Kashila. <sup>9</sup> Shegai aza roku a asuvu a le a gbmairi atakasuvu a le. A 'yuwain uwushuku, hal a yankai aza da a wushuki vi kadyanshi ka gbani adama a Ure u Asheku vi a kapala ka ama. Aku Bulus asakai kagata ka Kashila ki, u bidyai Atoni yi, n u wenishiki le kain dem a asu u uwenishike u Tiraniyu. <sup>10</sup> Nala a rongoi uyansa hal ayen a re,

hal gba aza a Yahuda n aza a Heline a da a'ari na ndishi a Asiya a panai kadyanshi ka Asheku.

### *Mmuku n Siva*

<sup>11</sup> Kashila ka naka ta Bulus ucira u da wa yansa ikunesavu i'ya bawu kotsu ama a tabai uwene.

<sup>12</sup> Hal gbam a bidya baci mayani ma ne ko aminya a manyan a ne a da wa ukusa a bankai aza a mballa, a tsu tana ta. Nala dem ityoni i cingi i tsu pecembene ta n ama.

<sup>13</sup> Aza a Yahuda a roku aza da a'ari ukyawunsa ilyuci ilyuci n a wutukpusi ityoni i cingi. A matsai tsara a yain manyan nala n kala ka Yesu Asheku. N a dansi, "N barana da ta n kala ka Yesu ka Bulus wa yansaka kuɓari ku ne ki, i wuta." <sup>14</sup> Mmuku n Siva kadamaki ka pigeƙa ka aza a Yahuda, n da dem pini n shindere a'ali a asuvu a aza da a ka yansa nala vi.

<sup>15</sup> Kain ka te, an a kondoi a yain nala a asu u uza u ityoni i cingi u roku, aku ityoni i cingi i wushunku le, "Mpa gai n reve ta Yesu! N reve ta kpam Bulus. Shegai eda tani an yayi?"

<sup>16</sup> Aku uza u ityoni i cingi vi u imkpai u gita le malapa hal u lyai ucira u le gba. Aku a wuta a kuwa ki n ilyadi ya dem kataɓa ikyamba i le kpam n a'utsu.

<sup>17</sup> An aza da a'ari ndishi a Afisu, aza a Yahuda n aza a Heline a panai ili i'ya i gitai, aku a panai uwonvo cika, a nakai kpam kala ka Asheku tsupige. <sup>18</sup> Ama da kpam a wushuki vi a wuta a kapala ka ama a ka dansa tsicingi tsu le. <sup>19</sup> Ama ushani aza a uyan adabu a bolomgbonusoi itagarada i le a asu u te a runukpai i'ya a kapala ka ama. An a kecei ikebe i itagarada yi, i rawa ta



ikebe i'ya vuma wa livā manyan ma a'ayin azu amangarenkupa (50,000.)\* <sup>20</sup> Nala kadyanshi ka Asheku ka rongoi utambura kpm̄ ka yain ucira cika.

<sup>21</sup> An ukuna u nala u gitai, Bulus bidigai kaci ka ne u da u kyawunsa baci uyamba u Masidaniya n u Akataya, aku u bana a Urishelima. U danai kpm̄, “N bana baci de, u kaṅa mu ta n bana a ilyuci i Roma. <sup>22</sup> Aku u suki aḅangi a ne a re, Timoti n Erasutu ubana a Masidaniya, eyi kpm̄ u shamgbai ve pini a uyamba u Asiya vi kenu.

### *A 'yangasai atakasuvu a ama a Afisu*

<sup>23</sup> A'ayin a nala yi a da a 'yangasai atakasuvu a ama cika a adama a Ure u Asheku. <sup>24</sup> U'yangasa u atakasuvu a nala vi u gitai ta n karumi ka roku uza u kala Dimitiriyu, uza da wa yansa manyan n azurufa n u rumi agata a Aritima† kameli ka kari uka. Eyi n atoku a manyan a ne a tsu tsara ta ikebe cika adama a manyan ma nala mi. <sup>25</sup> Aku u bolomgbonoi gba atoku a manyan a ne n aza da a ka yan manyan ma ma rotsoi icun i manyan ma nala mi, u danai, “Eda ama a va, i reve ta n manyan ma na ma tsa tsarasa ikebe. <sup>26</sup> I wene ta kpm̄ i pana ta tyoku da Bulus nala vi wa lapanasa ama. Nala wari a uyan pini na a Afisu n a asu u aza a Asiya ushani. U danai ameli a da ama a yain n akere, ashila a da wa. <sup>27</sup> Ukuna u cingi wa gitai ta,

---

\* **19:19** Akorongi a cau a cau a kagitai a korongu ta “ikebe i azurufa 50,000.” Kondo “Ikebe i azurufa” a kaci ka idani ka “Ikebe” a Idani i Uḅanga. † **19:24** Aritima kala ka kameli ka, kpm̄ urotsoni u uka u da kari. Ama ushani a kaḅon ka Asiya a tsu gbashika ta ka.

a ka nangasa t̄a manyan ma tsunu. Bamu gb̄am n nala, hal gb̄am a ka gonuko t̄a Aritima kameli ili i gbani, kpam a pece yi n tsupige tsu ne. Eyi uza da gb̄a uyamba u Asiya hal gb̄am n likimba gb̄a a ka gbashika.”

<sup>28</sup> An a panai nala, aku a yain upan cika, a 'yangas̄ai alaḡatsu a le, a danai, “Tsupige she Aritima u aza a Afisu.” <sup>29</sup> Aku ama yi a dambulai, a sumai ubana a kakur̄a a asu u da ama yi a bolomgbonoi, a'ari urono Gayu n Aristaraku. Ama a na yi atoku a nwalu a Bulus a da aza a Masidaniya.

<sup>30</sup> Bulus ciga t̄a u uwa pini a asuvu a ama yi, shegai Atoni a bishinka yi. <sup>31</sup> Azapige a roku aza a uyamba u Asiya aje a ne a sukunku yi akani a folo yi kotsu u kawan u bana a asu u ama a nala yi wa.

<sup>32</sup> Ama da a'ari pini vi atakasuvu a le gb̄a a shadangu de n kadambula, kpaci a reve gb̄am ili i'ya a bolomgbonoi uyan wa. Aza roku a 'yangas̄ai alaḡatsu a ka dansa ili i roku, aza roku kpam a ka dansa ili i roku kau. <sup>33</sup> Aza a Yahuda a tutsuki vuma roku uza u kala Alizanda a kapala, a ka ciga yi u kasanasa ukuna vi. Pini nala, u 'yangas̄ai akere a zuba u danai a pada, tsar̄a u siraka ama a ne kabetsu. <sup>34</sup> Shegai an a revei eyi uza u Yahuda u da, aku a 'yangas̄ai alaḡatsu a danai, “Tsupige she Aritima kameli.” A'ari uyansa nala hal ulapa u uwule u re.

<sup>35</sup> An nala u wurai, aku kakorongi ka ilyuci ka zuwai ama yi a padai, u danai, “Eda ama a Afisu, ama a likimba gb̄a a reve t̄a an ilyuci i Afisu i'ya ya kirana n Aritima kameli. Kpam ya dem reve

ta an kameli ka pige ka nala ki, ka rukpai a zuba derere a ilyuci i tsunu. <sup>36</sup> An u wokoi ili i na yi a ka nana i'ya wa, u gan ta i pada bini, kotsu i bidya ukuna vi n udagu wa. <sup>37</sup> I tukoi ama a na pini na, a yan uboki a kagata ka kameli ki wa, a wisha tani kameli ki wa. <sup>38</sup> Shegai Dimitiriyu n atoku a manyan a ne a'a baci n ukuna u roku a kaci ka uza roku, kunu ku afada ka ta ukupki. Aza a afada a da kpam pini, she i banka le de. <sup>39</sup> Shegai i'a baci n ukuna u roku kau u da ya ciga i reve, she a dansa u da na a asu u asheshi. <sup>40</sup> Mayun tani wa sufugba tsu ta a kukere ku azapige a Roma, an tsu wushuki n ukuna u u'yangasa u atakasuvu u ara u na vi, an u wokoi tsa fuda tsa naka kalen ka ili i'ya i gitai na vi wa." <sup>41</sup> An u danai nala, aku u wacinsai ama yi.

## 20

### *Bulus gonoi a Masidaniya n Heline*

<sup>1</sup> An u'yangasa u atakasuvu vi u kotsoi, aku Bulus isa'i Atoni u gbamatangu le atakasuvu. Pini nala, u tonuko le, "U yan tsu ben." Aku u lazai ubana a uyamba Masidaniya. <sup>2</sup> An u kyawunsai abon a nala yi gba, n u gbamatangusu le atakasuvu cika, aku u lazai she a Heline. <sup>3</sup> U dusuki pini hal uwoto u tatsu.

Afobi a da wari a uwa a kpatsu ubana a uyamba u Suriya, aku u revei aza a Yahuda a yanka yi ta afobi a cingi. Adama a nala a da u bidigai kaci ka ne wa gono a ure u Masidaniya. <sup>4</sup> Ama a na da a soku yi: Supata maku ma Puruhu uza u Biriya, ka'olo n Aristaraku n Sakunda aza a Tasaloniya, ka'olo n Gayu uza u Daraba, n Timoti, hal dem n Tikiku n Tarafima aza a Asiya.

<sup>5</sup> Ama a na yi a lyai kapala nā nwalu a ba a vana tsu a Taruwasa. <sup>6</sup> Ātsu tani an Abiki a Ilikulya i'ya i Nambai Yisti a wurai, tsu uwai a kpatsu a Filibi. Tsu yan t̄a nwalu ma a'ayin a tawun, aku tsu rawai a Taruwasa tsu cina le pini ɗe. Nte tsu rongoi pini hal a'ayin a shindere.

### *A 'yangasai Yutiku a ukpa*

<sup>7</sup> Kain ka Aladi, tsu ɓolomgbonoi tsara tsu lyai ilikulya. Bulus dansai kadyanshi n ama yi hal kayin ka pige, kpaci wa laza t̄a kain ka wansa baci. <sup>8</sup> A kunukuzuba ka tsari vi a sapusa t̄a pini ncikalushani. <sup>9</sup> Kalobo ka roku uza u kala Yutiku u dusuki a zuba u ilinuku i kunukuzuba ku ukumba u tatsu. Aku wa gbadiga a'ayin a ɗa Bulus wari uyan kuɓari ku ugadi, hal alavu a bidya yi gbende-gbende. Aku u fatanai u rukpai a kunukuzuba utuwa a iyamba. An a canga yi, a cinai u kuwa ɗe. <sup>10</sup> Pini nala, Bulus cipai a iyamba u wobo yi, u danai, “Kotsu i dambula wa, wa t̄a n uma.” <sup>11</sup> An Bulus gonoi a kunukuzuba, aku tsu lyai ilikulya kaɓolo. U lyai kapala n kadyanshi ki hal usana, aku u lazai. <sup>12</sup> Pini nala, a lazai n kalobo ki a kuwa n uma, aku a yain mazanga cika.

### *Bulus banai a Milita*

<sup>13</sup> Bulus bidiga t̄a kaci ka ne u wala a a'ene ubana a Asusu. Ātsu kpmam tsu uwai a kpatsu, tsara tsu ba tsu gawunsa ɗe.

<sup>14</sup> An tsu gawunsai a Asusu, aku u uwai a kpatsu ki tsu lazai ubana a Mitilini. <sup>15</sup> An kain ka wansai, aku tsu lyai kapala nā nwalu tsu rawai evu n a asu u ɗa a ka isa Kiyu. An kain ka wansai kpmam tsu rawai a uyamba u mere ma mini u ɗa a ka

isā Samasu. An kain ka doku ka wansai, aku tsu rawai a Milita. <sup>16</sup> Kpaci Bulus bidiga tā kaci ka ne u da wa shamgba a Afisu wa, adama a da wa barakpa a Asiya. Kpaci wa yan tā maloko u rawa a Urishelima kahu kain ka Abiki a Kain ka Amangarenkupa.†

*Bulus dansai n azapige aza a Afisu*

<sup>17</sup> Shegai an tsu rawai a uyamba u Milita, da Bulus sukunki nkoshi n kuwa ku Atoni a da a'ari a Afisu a tuwa a cina yi. <sup>18</sup> An a rawai, aku u danai, “Eda i reve tā gba ili i'ya n yain a'ayin a da n gitai utuwa a Asiya. <sup>19</sup> N yan tā manyan ma Asheku bawu aradi, kpam n meshi. N kawunki kpam n ukonduso u cingi u da aza a Yahuda a tukuso mu. <sup>20</sup> N kpaɗaɗa da utonuko ukuna u mayun wa, na n yansaɗa da kuɓari a asu u ama n a'uwa a de. <sup>21</sup> Kuɓari ku va ku te ka ubana a asu u aza a Yahuda n Awulawa. N tonuko le a reve kalen ka ukpatala a gono a asu u Kashila a asaka tsicingi tsu le kpam a pityanangu n Yesu Asheku.

<sup>22</sup> “Gogo-na Kulu Keri ka na ka zuwa mu ubana a Urishelima, kpam n reve ili i'ya ya gita na mpa de wa. <sup>23</sup> Ko an u wokoi Kulu Keri ka tonusuko mu ta a ilyuci i'ya dem n banai, ka danai a ka gidaku mu ta a kuwa ku a'ali kpam n pana ikyamba. <sup>24</sup> Shegai mpa n gonuko uma u va ili i roku wa, ma fuda baci ma kotso manyan ma Yesu Asheku u naka mu; wata, n dansa Kadyanshi ka Shinga ka ukuna u shinga u Kashila.

<sup>25</sup> “Gogo-na n reve ta aza da n kyawunsai na yansaɗa le kuɓari ku tsugono tsu Kashila a ka doku a ka wene mu wa. <sup>26</sup> Adama a nala a da ma tonuko da ara, uza da baci dem u tuwa u puwain

a asuvu a ɔe a ka wece mu mpasa n ne wa. <sup>27</sup> N tonuko ɔa ta mai ili i'ya Kashila ka ciga ɔa i reve. <sup>28</sup> I kirana n uma u ɔe n ushiga u ɔa Kulu Keri ku zuwa ɔa i guɓi. Kpam i lyai kapala n ulina ka Atoni a ɔa Kashila ka tsilakai kaci ka ne na mpasa n Maku ma ne. <sup>29</sup> N reve ta n laza baci, awenishiki a ka tuwa ta, aza ɔa bawu a ka wenishike ukuna u mayun. A ka yan ta yavu nleweni, tsara a wacinsa ncon n Kashila. <sup>30</sup> Hal gbam aza roku a asuvu a ɔe a ka yan ta kadyanshi ka kaɓan tsara a roni Atoni ubana ara le. <sup>31</sup> Adama a nala, she i rongo ufoɓusi, i ciɓa ayen a tatsu a ɔa pa vi kaara n kayin mari n aɔa, n asaka ɔa ubara wa. Hal gbam n sai n meshi adama a ɔe.

<sup>32</sup> “Gogo-na n nakangu ɔa ta a kukere ku Kashila. Asaka kadyanshi ka ukuna u shinga ka ne ka kirana n aɔa. Ciɓai n kadyanshi ka pige ka shinga ka nala ki. Kadyanshi ka nala ki ka ka ɓanga ɔa ka naka ɔa ili i'ya Kashila ka ciga ka naka ama a ne agadu.

<sup>33</sup> “N yan malyon ma ikebe ko aminya a uza roku wa. <sup>34</sup> I reve ta n yan ta manyan n akere a va, tsara n tsupuka kaci ka va ili i'ya ma ciga, n aza ɔa a'ari kaɓolo na mpa. <sup>35</sup> Kain dem n woko ta iryoci ara ɔe tyoku ɔa ya yan manyan cika, tsara i ɓanga aza a unambi. Ciɓai n kadyanshi ka Yesu Asheku ka u danai, ‘U la ta unu u shinga vu naka n u ɔa va wusha.’”

<sup>36</sup> An Bulus kotsoi kadyanshi, aku u kudangi kaɓolo n ele a yain kavas. <sup>37-38</sup> Aku a woɓo yi gba le n unamgbukatsuma a kana kushen cika, kpaci u dana ta a ka doku a ka wene yi wa. Pini nala, a soku yi gba le hal u uwai a kpatsu.

## 21

### *Nwalu n Bulus ubana a Urishelima*

<sup>1</sup> An tsu pecembenei n ele, aku tsu uwai a kpatsu ubana a uyamba u mere ma mini u Kosso. An kain ka wansai, aku tsu banai a Rodusu, pini nala, she a Patara. <sup>2</sup> An tsu cinai kpatsu ku ka bana a Finisiya, aku tsu uwai tsu lazai. <sup>3</sup> An tsu gitai uwene uyamba u mere ma mini u Sayipuru, aku tsu asakai i'ya a ugula u tsunu, tsu lyai kapala na nwalu ubana a Suriya. Tsu cipai a Taya kpaci nte kpatsu ki ka cipuka pini ucanga. <sup>4</sup> Tsu cina ta pini Atoni, aku tsu dusuki pini n ele hal a'ayin a shindere. Kulu Keri ku tonuko le a tonuko Bulus kotsu u bana a Urishelima wa. <sup>5</sup> Shegai an a'ayin a u'yangā a tsunu a yain, aku tsu lyai kapala na nwalu n tsunu. Atoni yi a soku tsu ta hal gbam n aka a le na mmuku n le gba ubana a uroto u ilyuci vi. An tsu rawai a ikengi i agata, aku tsu kudangi tsu yain kvasu. Tsu 'yangai tsu lyai kapala na nwalu n tsunu. <sup>6</sup> An tsu pecenei, aku tsu uwai a kpatsu, ele kpm a lazai ugono a kuwa.

<sup>7</sup> An tsu asakai Taya, tsu lyai kapala na nwalu she a Talamaya. Nte tsu damamgbanasai pini n atoku kpm tsu shamgbai pini n ele kain ka te. <sup>8</sup> An kain ka wansai, aku tsu banai a Kasariya, tsu cipai a kuwa ku Filibu uza u uyan ku6ari ku kadyanshi ka Kashila, uza u te a asuvu a ama a shindere ♦ a da a dangasai a pecike ama ilikulya. <sup>9</sup> Wa ta na mmuku nkere n nishi n da bawu kotsu n yain iyolo, alya aza a udansa kadyanshi ka Kashila.

---

♦ **21:8** Ask. 6:1-7.

10 An tsu yain a'ayin pini a asu vi, aku uza u udansa akani a Kashilā u roku uza u kala Agaba, ◇ u wutai a Yahuda u tuwai. 11 U bidyai kagbawatsu ka cuku ka Bulus, u sirai akere a ne n a'ene a ne n ka, u danai, “Ili i'ya Kulu Keri ku danai i'ya na, ‘Naha da aza a Yahuda a Urishelima a ka sira uza u kagbawatsu ka na vi, kpam a neke yi a akere a Awulawa.’ ”

12 An tsu panai nala, atsu n aza da a'ari pini tsu foloi Bulus kotsu u bana a Urishelima wa. 13 Aku u wushuki, “Nda i zuwai i'ari a kushen ya zuwa mu unamgbukatsuma? Ufoɔusi u da mari a sira mu hal gbam a wuna mu a Urishelima adama a kala ka Yesu Asheku.”

14 An tsu dansai n eyi bawu tsu fuda yi, aku tsu padai bini, tsu danai, “Asaka Magono ma Zuba ma yain i'ya i gan yi.”

15 An nala u wurai, aku tsu foɔsoi tsu banai a Urishelima. 16 Atoni a roku aza da a wutai a Kasariya dem a soku tsu, a banka tsu a kuwa ku Nnasan uza da tsa cipā ara ne. Eyi vuma u Sayipuru u da, uza u te a asuvu a Atoni a kagita.

### *Bulus rawai a Urishelima*

17 An tsu rawai a Urishelima, atoku a ryabusa tsu n ipeli cika. 18 An kain ka wansai, aku Bulus n atsu dem tsu banai ara Yakubu, kpam gbā nkoshi n kuwa ku Atoni n da pini. 19 An Bulus damangbanai n ele, aku u tonusuko le ili i'ya Kashilā ka yankai Awulawa a akere a ne. 20 An a panai nala, aku a cikpalai Kashilā, a tonukoi Bulus, “Utoku u tsunu, wene na tyoku da ama azu ushani a aza a Yahuda a pityanangi. Gbā le gogo-na a'a ta n

---

◇ 21:10 Ask. 11:28.



maluwa ma a ka tonu Mele ma Musa. <sup>21</sup> Shegai a tonuko t̄a Atoni a savu yi alabari a vunu a da va wenishike t̄a aza a Yahuda a da a'ari a asuvu a Awulawa vu da a varangu Mele ma Musa. Wata, kotsu a kiḁa mmuku n le acombi wa, ko kpm a toni agadu a tsunu wa.

<sup>22</sup> “Gogo-na niḁa tsa yan? Kpaci u kaṇa t̄a a reve n utuw̄a u vunu. <sup>23</sup> Adama a nala, she vu yain ili i'ya tsa tonuko vu. Ts̄a t̄a n ama a nishi pini na aza ḁa a yain kazuwamgbani. <sup>24</sup> Bidya ama a nala yi i ba i wulukpe kaci ka ḁe kaḁolo, kpm vu tsupa ikebe i uwulukpe yi ts̄ara a kuruwa le. Nala wa zuwa t̄a a reve an gb̄a ili i'ya a tonuko le a kaci ka vunu ki kaḁan ka, kpm avu n kaci ka vunu va kirana t̄a n Mele mi. <sup>25</sup> Shegai ukuna u Awulawa a ḁa a wushuki, tsu koronku le t̄a ukanikorongi tsu da: kotsu a takuma ili i'ya a ḁaramkpai kameli wa, kotsu a takuma unyama u ḁa w̄ari n̄a mpasa wa, a takuma unyama u manama ma a piyanlai udyoku wa, kpm kotsu a yain tsishankala wa.”

### *A kaṇai Bulus a Kuwa ku Kashila*

<sup>26</sup> An kain ka wansai, Bulus bidyai ama yi a banai a wulukpei kaci ka le, aku a uwai a Kuwa ku Kashila. Pini nala, u tonukoi ama a'ayin a da uwulukpe vi wa shadangu, n kain ka a ka yanka ya dem uḁaraḁka.

<sup>27</sup> An a'ayin a shindere yi a yain evu n ushadangu, aku aza a Yahuda a roku aza a uyamba u Asiya a wenei Bulus a asuvu a Kuwa ku Kashila. Aku a 'yangasai atakasuvu a ama a kaṇa yi, <sup>28</sup> n a salasi n a dansi, “Atoku a tsunu aza a Isara'ila, ḁanga tsu! Vuma ḁa wa kyawunsa ko

nte wa n u wishisi ama a tsunu, n Mele ma tsunu, kpam n Kuwa ku Kashilā ku tsunu ki aya gai na vi. Hal gbam u tukoi aza a Heline† a roku a asuvu a Kuwa ku Kashilā ki a nangasai Asu u Uwulukpi u na vi.” <sup>29</sup> Ele n a dani ko u uwa pini n Tarafima Kawulawa ka Afisu asuvu a Kuwa ku Kashilā ki. Ili i'ya i zuwai a danai nala, kpaci a'ari a wene le ta kabolo a asuvu a ilyuci.

<sup>30</sup> Aku gba ilyuci yi a dambulai cika, a wuranai n ilyadi a kana Bulus. A rono yi ubana a ulanga u Kuwa ku Kashilā ki. Kute-kute a gidakusi itsutsu yi. <sup>31</sup> Pini nala, a kana yi malapa a ka ciga a wuna, aku alabari a rawai ara uzapige u kuvon u aza a Roma, a da gba ilyuci i Urishelima i'ya pini a ka 'yangasasa atakasuvu a ama. <sup>32</sup> Kute-kute u bidyai atigi a roku kabolo n asoje a banai de a asu u le. An ama yi a wenei uzapige vi utuwa n asoje, aku a asaka yi malapa.

<sup>33</sup> Uzapige vi u zuwai a kana Bulus, kpam u zuwai a sira yi n ikani i re. Aku u wecei ama yi ko ya Bulus vi n ili i'ya kpam u yain. <sup>34</sup> Aku aza roku pini a asuvu a kakuma ki a salai a danai ili i roku, aza roku kpam a danai ili i roku kau. Adama a kacan ka ama ki, hal gbam uzapige vi u fuda u reve ili i'ya i gitai wa. U zuwai a lazai n Bulus ubana a kuwa ku asoje. <sup>35</sup> An a rawai a asu u adeshikpetsu a u'uwa a kuwa ki, she na asoje yi a radagba yi a zuba adama a u'yangasa u atakasuvu u ama yi. <sup>36</sup> Kakuma ka ama ka ka tono le vi a'ari isali n a dansi, “Wuna ni.”

*Bulus dansai n kakuma ka ama ki*

<sup>37</sup> An a yain evu n u'uwa a kuwa ku asoje ki, aku Bulus wecei uzapige vi, “Ko va wushuku n yain kadyanshi n avu?”

Aku uzapige vi u wece yi, “Dana vu reve ta Tsiheline? <sup>38</sup> Ma wundyada da vuma u Masar u da ayen a da a wurai u 'yangasai atakasuvu a ama, hal gbam u tonoi n ama azu a nishi (4,000) a aza a magalaka a mete mi?”

<sup>39</sup> Bulus wushunku yi, “Mpa uza u Yahuda u da, u ilyuci i Tarsu a uyamba u Kilikiya. Mpa uza u ilyuci i'ya i'ari n tsupige tsu nala tsi da. Ma folo vu vu asaka mu n yain kadyanshi n ama a na yi.” <sup>40</sup> Aku u asaka yi u yain kadyanshi, u shamgbai a zuba u adeshikpetsu a u'uwa a kuwa ki, u 'yangasakai ama yi kukere a pada. An a padai bini, aku u yanka le kadyanshi n Tsi'arama.

## 22

<sup>1</sup> Bulus yain kadyanshi, u danai, “Atoku a va n isheku i va, panai mai n tonuko da ili i'ya i gitai, tsara n wenike an bawu mari n unyushi.” <sup>2</sup> An wa dansa n ele n kaletsu ka le, aku kakuma ka ama ka lapulai ka padai bini.\*

<sup>3</sup> Aku u danai, “Mpa uza u Yahuda u da, a matsa mu ta a Tarsu, a uyamba u Kilikiya, shegai nte n gbonguroi pini na. N yan ta kaneshi a kukere ku Gamaliya uza da u wenishike mu gba mele ma isheku i tsunu. Ma ta n uciga u ugbashika Kashila, tyoku da gba de i'ari uyan ara. <sup>4</sup> N foro ta ama da a ka tono Ure u Asheku, hal gbam n wunai aza

---

\* **22:2** Tsi'arama tsa aza a Urishelima a tsu dansa, kpana a yan ta majiyan an a wenei Bulus wa dansa n kaletsu ka le.

roku. N sirasai aka n a'ali n gbagirya le a asuvu a kuwa ku a'ali. <sup>5</sup> Magono ma Adarākpi n azapige a Asheshi a Pige a ka dana tā mayun dā. A naqā mu tā ukanikorongi ubana a asu u atoku a tsunu aza a Yahuda a dā a'ari a Damasuka. Ukanikorongi vi u wushunku mu tā n tuko Atoni a dā a'ari dē utuwa a Urishelima usiri n ikani tsarā a yan le mavura.

*Bulus danai tyoku dā u kpatalai*

<sup>6</sup> “Kain ka te, evu n ubana kaara a kaci, cina n yan dē evu n urawa a Damasuka, aku katyashi ka wutai a zuba ka wakana mu ukyawan. <sup>7</sup> Aku n rukpai a iyamba, n panai kalagatsu ka wece mu, ‘Shawulu, Shawulu, ndya i zuwai va yan mu mavura?’

<sup>8</sup> “Aku n wushuki, ‘Asheku, adā yai?’

“U wushuki, ‘Mpa Yesu uza u Nazara uza dā va yan mavura.’ <sup>9</sup> Aza dā tsari kaḅolo a wene tā katyashi ki, shegai a reve ili i'ya kalagatsu ki ka tonō wa.

<sup>10</sup> “Aku n wece yi, ‘Asheku, ndya va ciga n yain?’

“U wushunku mu, ‘Yanga vu uwa a Damasuka. Vu rawa baci dē a ka tonuko vu tā ili i'ya va yan.’

<sup>11</sup> Katyashi ki ka zuwa mu tā n rumbanai, aza dā tsari kaḅolo ki alya a rono mu ubana a Damasuka.

<sup>12</sup> “Aku vuma roku uza u kala Ananiya tuwai ara va. Eyi uza dā wa gbashika Kashila tyoku dā Mele ma tsunu ma danai dā, uza dā gbā aza a Yahuda a dā a'ari a Damasuka a ka cikpalasa. <sup>13</sup> U tuwai ara va, u shamgbai evu nā mpa, u danai, ‘Utoku u va Shawulu, wene asu.’ Pini a asu u nala vi dā n wene yi!

<sup>14</sup> “U tonuko mu, ‘Kashila ka isheku i tsunu ka dangasa vu tā vu reve ili i'ya wa ciga. Kpam vu

wene Uza u Uwulukpi u nala vi, vu pana kparam kadyanshi ka ne. <sup>15</sup> Aḁa va bidya kadyanshi ka ne ubana ko nte wa, n vu tonusuko le i'ya vu wenei n i'ya kparam vu panai. <sup>16</sup> Kotsu vu nangasa a'ayin wa. 'Yanga a lyuḁugu vu tsara a zai unyushi u cingi u vunu. Yan nala n vu isaḁi kala ka Asheku.'

*Bulus yain kuḁari a asu u Awulawa*

<sup>17</sup> “Kain ka te, an n gonoi a Urishelima, mpa a uyan kavasu a Kuwa ku Kashila, aku n wenei kuwene, <sup>18</sup> kparam n wenei Asheku a ka dansa, u danai, ‘Asaka Urishelima gogo, kpaci a ka wushuku n ili i'ya va tonuko le a kaci ka va wa.’

<sup>19</sup> “Aku n wushuki, ‘Asheku, ele n kaci ka le dem a reve ta an n kanasa aza da a wushuki n avu a agata a Kashila n sirasa le kparam n lapa le. <sup>20</sup> A'ayin a da a wunai Isitifanu,  $\diamond$  uza u uyan kadyanshi ka Kashila, mpa pini kushani kparam n wushuku ta n ili i'ya a yain. Hal gbam mpa n banai aminya a ama da a wuna yi vi.

<sup>21</sup> “Aku Asheku a tonuko mu, ‘Yanga vu wala, ma suku vu ta a mbari a asu u Awulawa.’ ”

<sup>22</sup> Kakuma ka ama ki ka rongo yi upanaka hal a asu u da u danai udani u ‘Awulawa,’ aku a salai unu u te, ‘Rawukai vuma u na vi! Wuna ni! U gan a asaka yi n uma wa!’ <sup>23</sup> Aku a rongoi iyoroli n a monduḁi aminya a le n maloko, a shadangusi akere a le n kayala a polusoi ka a uwule.

<sup>24</sup> Aku uzapige u kuvon u aza a Roma u zuwai a bidya yi ubana a kuwa ku asoje, tsara a bawan yi adama a da wa tonuko le ukuna u maci. <sup>25</sup> Tyoku da a sira yi tsara a bawin yi, aku u tonukoi katigi ka

---

$\diamond$  **22:20** Ask. 7:58.

kari pini vi, “U gan a bawin uza u Roma u da wari n ucira u uyan ili bawu a yanka yi afada?”

<sup>26</sup> An katigi ki ka panai nala, aku u banai a asu u uzapige vi, u danai, “Ndyā ya ciga n yain? Vuma u na vi uza u aza uyamba u Roma da.”

<sup>27</sup> Aku uzapige vi u banai ara Bulus, u wece yi, “Tonuko mu, avu uza u aza uyamba u Roma da?”

Aku u wushunku yi, “Nala wari.”

<sup>28</sup> Aku uzapige vi u danai, “She na n tsapai ikebe ushani kahu n tsara ucira u nala vi.”

Bulus danai, “Mpa kpam n u da a matsa mu.”

<sup>29</sup> An asoje a da a ka ciga a bawin yi vi kpam a yan yi keci ki a panai nala, aku a wozoi akere a le gogo. Uzapige u kuvon vi u pana ta uwonvo, kpaci u zuwa ta a sira yi.

### *Bulus dansai n Asheshi a Pige*

<sup>30</sup> An kain ka wansai, aku uzapige u kuvon vi wa ciga u reve ili i'ya i zuwai aza a Yahuda a tukoi ukuna u na a kaci ka Bulus. U zuwai a surukpa yi ikani yi, aku u zuwai adarakpi a pige n Asheshi a Pige yi gba a bolomgbonoi. U zuwai a ukai Bulus a asuvu, u zuwa yi u shamgbai a kapala ka le.

## 23

<sup>1</sup> Bulus wundyai azapige a Asheshi a Pige yi mai, aku u danai, “Aza a va, n rongo ta mai a kapala ka Kashila a a'ayin a va!” <sup>2</sup> Aku Ananiya\* Magono ma Adarakpi u zuwai aza da a'ari evu n Bulus vi a lapa

---

\* **23:2** Tagarada u Asuki u yan ta kadyanshi ka ama a tatsu aza da a'ari n kala “Ananiya.” 5:1 Ananiya uza da yankai asuki kaƙan, aku u kuwai. 9:10, 22:12 Ananiya uza da kukpai a'eshi a Bulus a Damasuka. 23:2 Ananiya uza da wari Magono ma Adarakpi.

yi a unā. <sup>3</sup> Aku Bulus danai, “Kashilā ka lapa vu t̄a avu uza u maci u kaḅan u gbani, dusuku ḁa vu dusuki tsarā vu yanka mu afada tyoku ḁa Mele ma danai, shegai avu gonoi vu kodoi Mele mi, kpaci vu zuwai a lapa mu.”

<sup>4</sup> Aza ḁa a'ari evu n Bulus vi a danai, “Magono ma Adarākpi ma Kashilā ma va wishisa!”

<sup>5</sup> Bulus wushunku le, “Yanka numu ahankuri atoku a va, n reve an Magono ma Adarākpi ma wa. Kpaci a korongu t̄a a ḁa ‘Kotsu uza u wisha uzapige uza ḁa wa tono n ama wa.’ ” ♦

<sup>6</sup> An Bulus wenei Asheshi a Pige yi aza roku aza a Sadusi a ḁa aza roku kpam Afarishi, aku u 'yangasai kalagatsu u danai, “Aje a va, mpa Kafarishi ka ilimaci i Kafarishi. An u wokoi n zuwai katakasuvu ka va a asu u u'yangā u ukpa, ḁa i zuwai a ka yanka mu afada.”

<sup>7</sup> An u danai nala, aku kananamgbani ka uwai a mere ma aza a Sadusi n Afarishi hal kaḅolo ki ka pecei kure. <sup>8</sup> Aza a Sadusi a wushuku n u'yangā u ukpa, n atsumate a eri, n a'ulu wa, shegai Afarishi a wushuku t̄a n ili i nala yi gbā. <sup>9</sup> Aku kacan ka 'yangai cika, awenishiki a Mele aza ḁa a'ari Afarishi a 'yangai a ka ḅangā Bulus a danai, “Tsu wene unyushi u vuma u na vi wa, ko kenu. Gaawan kulu ko kpam katsumate ka zuba ka roku ka ka yanka yi kadyanshi.”

<sup>10</sup> An kacan ki kari uyan ushani, aku ama yi a'ari uvingasa Bulus apashi a re gbā. Pini nala, uzapige u kuvon u aza a Roma u zuwai asoje a wushi Bulus a akere a le, kotsu a banka yi a kuwa ku asoje.

---

♦ 23:5 Uwt. 22:28.

<sup>11</sup> N kayin ka nala ki, Yesu Asheku u wenikei kaci ka ne ara Bulus, u danai, “Lya kapala n ugbami u asuvu. Tyoku *ḗ* vu yain kadyanshi ka *vā* pini naha a Urishelima, u *kaṅa* *tā* kpm vu yain ka a Roma.”

### *A sheshei a wuna Bulus*

<sup>12</sup> An kain ka wansai, aku aza a Yahuda a roku a fobusoi *tsarā* a wuna yi. A tsinai a da a ka lya ko a soi wa, she a wuna Bulus. <sup>13</sup> Aza *ḗ* a yain afobi a cingi a nala yi a la *tā* ama amangare. <sup>14</sup> Aku a banai a asu u *aḗarākpi* a pige n azapige a tonuko le, “Tsu tsina *tā*, tsu *ḗ* tsa lya ili ko tsu soi wa, she tsu wuna vuma u nala vi. <sup>15</sup> *Eḗ* n Asheshi a Pige, she i tonuko uzapige u kuvon u aza a Roma u tuko yi pini na a asu u Asheshi, aku i yain yavu ciga *ḗ* ya ciga i doku i veci ukuna vi sawu. *Atsu* kpm ufobusi u *ḗ* *tsari* tsu pite yi a ure *tsarā* tsu wuna yi.”

<sup>16</sup> Kalobo ka utaku u Bulus ka pana *tā* ukuna u *ḗ* a sheshei vi, aku u banai a kuwa ku asoje ki u tonuko yi ukuna vi. <sup>17</sup> Pini nala, Bulus *isai* katigi ka te u tonuko yi, “Banka kalobo ka na a asu u uzapige u kuvon, *Wā* *tā* n ukuna u *ḗ* wa tonuko yi.” <sup>18</sup> Aku vuma vi u wushuki u bankai kalobo ki ara uzapige u kuvon vi. Pini nala, katigi ki ka tonukoi uzapige u kuvon vi u danai, “Vuma *ḗ* *wari* a kuwa ku a'ali ku nala ki uza u kala Bulus vi, aya u zuwa mu n tuko kalobo ka na ara vunuu, u *ḗ* *tā* n ili i'ya wa ciga u tonuko vu.”

<sup>19</sup> Aku uzapige u kuvon vi u *kaṅai* kukere ku kalobo ki u banka yi paki, u wece yi, ‘Nɗya va ciga vu tonuko mu vi?’



<sup>20</sup> Kalobo ki ka danai, “Ama roku a ɗa pini a sheshei a ka ciga a banka le Bulus a asu u Asheshi a Pige a aza a Yahuda nakpan. A ka yan ta yavu a ka ciga a doku a veci ukuna vi mai. <sup>21</sup> Shegai kotsu vu yain nala wa! Kpaci ama ɗa pini a la ta ama amangare a ka pite yi tsara a wuna yi. A tsina ta a da a ka lya ko a soi wa, she a wuna yi. Gogo-na alya pini ufofusi, a ɗa a ka vana vu wushunku le.”

<sup>22</sup> Aku uzapige vi u tonuko yi, “Kotsu vu asaka uza u reve an vu tonuko mu ukuna u na vi wa.” Pini nala, u tonuko yi u wala.

### *A bankai Bulus a Kasariya*

<sup>23</sup> Uzapige u kuvon vi u isa atigi a re a tuwa, aku u tonuko le, “Tonukoi asoje amangatawanre (200) a fobuso a bana a Kasariya n ulapa u uwule u kuci u kayin ka ara, n asoje a adoki amangatatsunkupa n asoje a amangatawanre (200) a kuvon na nsari n le. <sup>24</sup> Eda kpam i zami kadoki ka Bulus wa yuwa. Kotsu i banka yi ara Feli gomuna, bawu ko i te i'ya ya gita n eyi.” <sup>25</sup> Aku uzapige vi u korongi ukanikorongi u na ubana ara gomuna vi. U danai,

<sup>26</sup> “Mpa Kaladiyu Lisiya, ma sukunku uzapige Feli gomuna idyani. <sup>27</sup> Aza a Yahuda a roku a ɗa a kana vuma u na, hal a ka ciga a wuna yi. Shegai an n vecei ukuna vi, n revei an vuma vi uza u uyamba u Roma u ɗa, aku mpa n asoje a va tsu wusa yi. <sup>28</sup> Aku n banka yi a asu u Asheshi a Pige, tsara a veci unyushi u ɗa u yain vi. <sup>29</sup> Pini nala, n cinai unyushi u ɗa a kana yi n u ɗa vi u Mele ma le u ɗa, u rawa gbam a ka sira ko a wuna yi wa. <sup>30</sup> Shegai an vuma roku u tonuko mu ukuna u cingi u ɗa a fobusoi a kaci ka ne, ɗa i zuwai n

sukunku yi ara vunu kute-kute. Aku n tonukoi aza a kadyanshi yi a tuwā a dana unyushi u ḏa a wenei u yain vi ara vunu.”

<sup>31</sup> Asoje yi a yain ili i'ya a danai a yain. N kayin ka nala ka a bidyai Bulus ubana a ilyuci i Antipatari. <sup>32</sup> An kain ka wansai, aku asoje a ḏa a ka wala a a'ene yi a gonoi a kuwa ku asoje ku le, a aṣakāi asoje a ḏa a ka walaka adoki yi a lazai n eyi ubana a Kasariya. <sup>33</sup> An a rawai a Kasariya, aku a naḳai gomuna vi Bulus n ukanikorongi vi. <sup>34</sup> Pini nala, Feli gomuna u yain kaṅeshi u ukanikorongi vi, u wecei Bulus eyi uza u uyamba u eni u ḏa. Aku u wushunku yi, “Kilikiya.”

<sup>35</sup> Pini nala, gomuna wushunku yi, “Ma panaḳa vu ta a'ayin a ḏa baci dem aza ḏa a sapula vu vi a rawai. An u danai nala, aku u zuwai a kpada yi a asuvu a kuwa ku tsugono ka Hiridu magono u mai.

## 24

### *Feli yankai Bulus afada*

<sup>1</sup> An a'ayin a tawun a wurai, aku ama roku a rawai a Kasariya, tsara a dana ili i'ya Bulus yain. Alya Ananiya Magono ma Adaraki kaḅolo n azapige a aza a Yahuda a roku n karevi ka mele ka roku uza u kala Taratulu. <sup>2</sup> An a isaḳi Bulus u uwa a asuvu, aku Taratulu gitai utonusuko gomuna vi ili i'ya Bulus yain, u danai, “Uzapige Feli, adama a ugboji u vunu, ḏa i zuwai ama a tsunu a'ari na ndishi n shinga tun ara wa. Adama a ḏa kpam vari n uwene u mbari, ḏa i zuwai ama a tsunu a ka pana kayanyan ka ndishi n ulya u kapala. <sup>3</sup> Ama ko nte wa a ka cikpa vu ta bawu utyoku. <sup>4</sup> Shegai adama

a ɗa bawu ma ciga n wowotongusu vu, ma folo vu adama a ugboji u ɗa ɓari n u ɗa, vu panaka tsu a asuvu a a'ayin a kenu a na yi tsu dana ili i'ya vuma u naha vi u yain.

<sup>5</sup> “Vuma u na vi kashilakani ka, tsu cina yi ta wa 'yangasa atakasuvu a aza a Yahuda a likimba gba, kpam aya wa tono n kabolo ka aza ɗa a ka isa Aza a Nazara. <sup>6</sup> Hal gbam wa ciga u nangasa Kuwa ku Kashila, aku tsu kana yi. [ <sup>7</sup> Tsa ciga tsu yanka yi afada n Mele ma tsunu, shegai Lisiya uzapige u kuvon u aza a Roma u wusa yi ara tsunu. Aku u zuwai tsu tuko kadyanshi ki a kunu ku afada ku vunu.]\*

<sup>8</sup> “Vu vece yi baci n kaci ka vunu ben, va fuda ta va reve an ukuna u ɗa tsu tukoi a kaci ka ne ki mayun ɗa.” <sup>9</sup> Aku aza a Yahuda a ɗa a buwai a wushuki n ili i'ya Taratulu danai.

### *Bulus wushunki Feli*

<sup>10</sup> Aku gomuna vi u yankai Bulus kukere u yain kadyanshi. Pini nala, u gitai u danai, “Uzapige, n reve ta vu yanka ta ama ushani aza a uyamba u na afada a ayen ushani, kpam n yan ta mazanga an ma wutukpa kaci ka va a kunu ku afada ku vunu. <sup>11</sup> Vu vece baci, va laza ta va reve an kotsu u lai a'ayin kupa n a re, an n banai a Urishelima ulya u kayala a Kuwa ku Kashila wa. <sup>12</sup> N yan kananamgbani n uza roku a Kuwa ku Kashila wa, ko kpam n 'yangasa atakasuvu a ama a agata a Kashila ko kpam a asu u roku wa. <sup>13</sup> Ama a naha a ka fuda a ka dana ili i'ya a ka dansa na vi mayun ɗa

---

\* **24:7** Akorongi a cau ushani aza ɗa a purai a tagarada u Manyan ma Asuki a kalatsa ta makpanda ma 7.

wa. <sup>14</sup> Ili i te i'ya n revei i'ya, an ma tonon Kashilā ka isheku i tsunu a ure u ḏa a danai kaḃan ka vi, kpam n wushuki an gba ili i'ya i'ari ukorongi a asuvu a tagarāda u Mele ma Musa na i Ntsumate. <sup>15</sup> N zuwa ta katakasuvu ka va a asu u Kashilā, tyoku ḏa aza ḏa a sapula mu na vi a zuwai, a ḏa a ka 'yangasa ta akushe aza a shinga n aza a cingi a ukpa. <sup>16</sup> Adama a nala a ḏa mari a ukirana kain dem tsara n yain ili i'ya i'ari i maci, kpam katakasuvu ka va ka rongo na ndishi n shinga a asu u Kashilā n ama.

<sup>17</sup> “N barakpa n ugono a Urishelima wa, mari ta a kateshe ayen ushani. N gonoi n ikebe tsara n naka ama a tsunu aza a unambi, kpam n naka kune a asu u Kashilā. <sup>18</sup> Mpa pini a uyan nala a Kuwa ku Kashilā ki, cina n kotso de uwulukpe kaci ka va, aku a cina mu pini, kpam kakuma ka ama ka pini wa. <sup>19</sup> Shegai aza a Yahuda a roku a ḏa pini aza a uyamba u Asiya, alya wari u gain a tuko kadyanshi ka va ara vunu a'a baci n ili i'ya a ka dana a kaci ka va. <sup>20</sup> Ko kpam asaka aza ḏa a sapula na vi, a dana unyushi u ḏa Asheshi a Pige a tsara mu n u ḏa a'ayin a ḏa a yanka mu afada a Urishelima. <sup>21</sup> Kadyanshi ka a ka fuda a dana a kaci ka va ka na koshi, an n salai n danai ukuna u na a kunu ku afada ku le; 'Adama a kadyanshi ka u'yangā u ukpa u ḏa a ka yanka mu afada a kapala ka de ara.' ”

<sup>22</sup> Feli gomuna tani u reve ta ili ushani a Ure u Asheku, aku u shamkpa le u danai, “Shamgbai she a'ayin a ḏa Lisiya Uzapige u Kuvon† u tuwai, aku n kidaga ḏa ugana.” <sup>23</sup> Aku u zuwai katigi ka roku ka wundi yi, u tonuko yi kotsu u gidaku yi wa, kpam

u 6ishinka aje a ne utuwā a 6aᅅga yi wa.

### *Bulus dansai n Feli gomuna*

<sup>24</sup> An a yain a'ayin, aku Feli tuwāi n uka u ne uza u kala Durusila, kpam uza u Yahuda u 6a. A suki vuma roku u tuko Bulus, pini nala, a zuwuka yi atsuvu a ka pana kadyanshi ka upityanangu n Yesu Kawauwi. <sup>25</sup> Aku Bulus tonuko le ukuna u uyan ili i shinga, n u kaᅅa kaci, kpam n kain ka afada ka ka tuwā. An u panai nala, aku uwonvo u kaᅅa yi cika, u tonukoi Bulus, “Gogo-na u rawa ta ve. Wala. Shegai n tsara baci kabala, ma isa vu ta vu tuwā.” <sup>26</sup> Feli tsu sukunku ta Bulus tuwā u dansa n eyi, kpaci u zuwa ta uma wa tsara ta ikebe ara ne.

<sup>27</sup> An ayen a re a wurai, aku a takpai Feli gomuna, a naᅅai Posiya Fesutu u wokoi gomuna. Shegai an Feli wa ciga kala ka shinga a asu u aza a Yahuda, aku u asaᅅai Bulus pini a kuwa ku a'ali.

## 25

### *Bulus yain kadyanshi ki ara Fesutu*

<sup>1</sup> An Fesutu kaᅅai manyan ma gomuna ma ne n a'ayin a tatsu, aku u 'yangaᅅi a Kasariya ubana a Urishelima. <sup>2</sup> Aku adaraᅅpi a pige n azapige a aza a Yahuda a tuwāi n kadyanshi ka Bulus ara ne. A folo yi <sup>3</sup> u zuwa a gono n Bulus a Urishelima, kpaci a foᅅuso ta ama a pite yi a ure a wuna yi. <sup>4</sup> Shegai Fesutu wushunku le, “A Kasariya 6a a ka wundya Bulus, kpam nte ma gono 6e gogo. <sup>5</sup> U yan baci ukuna u cingi, asaᅅa azapige a 6e a tono mu a ba a tuko kadyanshi ki 6e.”

<sup>6</sup> Fesutu shamgba ƚa n ele a'ayin kulla ubana a'ayin kupa, aku u lazai ugono a Kasariya. An kain ka wansai, u isaı aza a kunu ku afada ki, u tonuko le a tuko Bulus vi. <sup>7</sup> An Bulus tuwai, aza a Yahuda a da a wutaı a Urishelima vi a 'yangaı a'ari utukuso kadyanshi a kaci ka ne, ka gbam bawu a ka fuda a shamkpa.

<sup>8</sup> Shegai Bulus 'yuwain kadyanshi ki, u danai, “Mpa n nusuka Mele ma aza a Yahuda wa, ko Kuwa ku Kashila, ko kpam aza a tsugono tsu Roma wa.”

<sup>9</sup> Shegai an Fesutu wa ciga atakasuvu a aza a Yahuda a pana kayanyan, aku u wecei Bulus, “Ko va wushuku vu bana a Urishelima n ba n yanka vu afada a ukuna u na vi de?”

<sup>10</sup> Bulus wushunku yi, “Wa yan wa, a asuvu a kunu ku afada ku Kaisa ka mari, kpam nte u gain a yanka mu pini afada. Avu n kaci ka vunu dem vu reve ƚa mai, n nusuka aza a Yahuda wa. <sup>11</sup> N yan baci ili i roku i'ya i rawai ukpa, ma 'yuwan a wuna mu wa. Shegai ukuna u mayun wa baci pini a asuvu a kadyanshi ka na ki wa, uza u rasta u neke mu a akere a ama a na yi a wuna mu wa. Ma folo da a 'yangaıa kadyanshi ki ubana ara Kaisa magono ma pige.”

<sup>12</sup> Fesutu dansai kadyanshi ki n asheshi a ne, aku u danai, “Nala wari, vu folo ƚa ubana ara Kaisa, kpam nte va bana de.”

### *Fesutu n Agaripa magono*

<sup>13</sup> An a yain a'ayin kenu, aku Agaripa\* magono

---

\* **25:13** Vuma na maku ma Hiridu Agaripa ma, uza da a yain kadyanshi ka ne a 12:1-22. Kala ka te ka yi n tata u ne.

n uka u ne Baranisi† a tuwai a Kasariya tsara a ryabusa Fesutu. <sup>14</sup> An u wokoi a ka yan a'ayin de, aku Fesutu tonukoi Agaripa ukuna u kadyanshi ka Bulus. U danai, “Vuma roku u da pini a asuvu a kuwa ku a'ali uza da Feli asanka mu n yanka yi afada. <sup>15</sup> An mari a Urishelima, adarakpi a pige n azapige a aza a Yahuda a tuko mu kadyanshi ka vuma u nala vi, a folo mu n kidaga yi ugana.

<sup>16</sup> “Shegai n tonuko le, a mele ma tsunu atsu aza a Roma tsu tsu kidaga uza u ugana wa, she a tuwa n eyi a kapala ka aza da a tukoi kadyanshi ki, kpam a tsu asaka yi ta u dansa tsara u wutukpa kaci ka ne. <sup>17</sup> An a tuwai adama a kadyanshi ki, an kain ka wansai, n zuwai a tukoi Bulus, aku n gitai afada. <sup>18</sup> Shegai an ama yi a 'yangai a dansa kadyanshi ki, a tuko unyushi u da a da u yain u da n zuwai katakasuvu n pana vi wa. <sup>19</sup> Shegai ukuna u adini a le u da, kpam n ukuna u vuma roku uza da a ka isa Yesu uza da u kuwai, shegai Bulus matsai u da wa ta n uma. <sup>20</sup> Mpa tani mari n namba ta tyoku da ma vece ukuna u na vi, aku n wecei Bulus ko wa wushuku u bana a Urishelima tsara n ba n yanka yi afada yi de. <sup>21</sup> Shegai u foloi a asaka Kaisa magono ma pige ma pana ukuna vi, aku n zuwai a zuwa yi ve pini a kuwa ku a'ali ki, hal ubana a'ayin a da ma tutsuku yi ubana ara Kaisa vi.”

<sup>22</sup> Aku Agaripa tonukoi Fesutu, “Ma ciga ta n pana ili i'ya vuma na wa dana.”

Aku u wushunku yi, “Va panaka yi ta nakpan.”

---

† **25:13** Baranisi maku ma Hiridu Agaripa ma uza da a yain kadyanshi ka ne a 12:1-22. U bansa ta azapige a ama iyolo ushani, gogo-na kpam utaku u ne da wa wolo.

<sup>23</sup> An kain ka wansai, Agaripa n uka u ne Baranisi a ukai aminya a tsugono, a tuwai kaḅolo n azapige a asoje n azapige a aza a ilyuci yi. Fesutu zuwai a tuko Bulus pini a asuvu a kunu ki. <sup>24</sup> Aku Fesutu danai, “Agaripa magono, n gba azapige aza ḁa a'ari pini na kaḅolo n aṣu, wundyai vuma u na vi, aza a Yahuda a ḁa a'ari a Urishelima n Kasariya a tuwa ta ara va a ka ciga n wuna vuma u na vi. <sup>25</sup> Shegai mpa n wene u yan unyushi u ḁa u rawai a ka wuna yi wa. Kpam an u wokoi u foloi a banka kadyanshi ki a asu u magono ma pige, ḁa i zuwai n yawunsai n banka yi ara ne. <sup>26</sup> U kana ta n korongu ukuna u maci a kaci ka vuma u na ubana a asu u magono. Da i zuwai n tuko yi a kapala ka ḁe gba, hal gai avu Agaripa magono, tsara tsu kotso baci uvece ukuna vi, n tsara ili i'ya ma korongu. <sup>27</sup> Kpaci a uwene u va, utengeshi u ḁa a tutsuku vuma ḁa wari a kuwa ku a'ali ubana a asu u magono bawu a danai ili i'ya u yain.”

## 26

### *Agaripa dansai n Bulus*

<sup>1</sup> Agaripa tonukoi Bulus, “Gogo-na dansa n kaci ka vunu.” Aku Bulus 'yangasai kukere, u gitai kadyanshi:

<sup>2</sup> “Agaripa magono, n pana ta kayanyan an u wokoi a kapala ka vunu ka ma yan kadyanshi n wutukpa kaci ka va a kadyanshi ka ama a va a tukoi adama a va. <sup>3</sup> N revei avu vu reve ta Mele ma aza a Yahuda n gba ili i'ya a ka nanamgbana. Adama a nala, ma folo vu vu yain ahankuri vu panaka mu.



<sup>4</sup> “A wenishike mu t̄a uwenishike u aza a Yahuda tun mpa kenu. N rotsongusu t̄a a asu u ama a v̄a n a asu u aza a Urishelima. Azapige a aza a Yahuda a reve t̄a n u d̄a. <sup>5</sup> A reve t̄a n̄a mpa caupa, kpam a ka fud̄a t̄a a ka dana mpa Kafarishi ka mayun, a kabon ka k̄ari n mele ma awuya a asuvu a adini a tsunu. A ka dana t̄a mayun d̄a a ka ciga baci a dana.

<sup>6</sup> “Gogo-na ma t̄a a asu u afada an n wushuki n kazuwamgbani ka Kashil̄a ka yankai ama a tsunu caupa. <sup>7</sup> Kazuwamgbani ka nala ki ka agali kupa n a re a zuwai uma a wene ushadangu u ne, d̄a i zuwai a mats̄ai ugbashika Kashil̄a kaara n kayin. Magono, an u wokoi n zuwai uma u v̄a a kazuwamgbani ka nala, d̄a i zuwai aza a Yahuda a wenei unyushi u v̄a. <sup>8</sup> Ndya i zuwai i kp̄ad̄ai uwushuku an Kashil̄a ka 'yangas̄a akushe?

<sup>9</sup> “Mpa n kaci ka v̄a caupa m̄ari n wenei yavu mai d̄a n yain ili i'ya ya b̄ishinka ulya u kapala u kadyanshi ka Yesu uza u Nazara. <sup>10</sup> Adar̄akpi a pige† a wushunku mu t̄a n yain ili i na yi, kpam n canga t̄a Atoni ushani aza a Urishelima n uka le a kuwa ku a'ali. Hal gb̄am n u b̄olomgbono u kaci u v̄a u d̄a a wunusai aza roku. <sup>11</sup> N tonoi gb̄a agata a Kashil̄a n̄a bawin le, kotsu gai n zuwa a yanka kala ka Kawauwi un̄a u cingi. Adama a d̄a ma pana upan u le cika, aku ma tonuso le a ilyuci i m̄bari i tsumoci n̄a n foruso le d̄e.

### *Ugawunsa u Bulus n Kawauwi*

<sup>12</sup> “Magono ma v̄a, kain ka te, m̄ari a asuvu a nwalu ubana a Damasuka uyan manyan mi, n ucira u d̄a adar̄akpi a pige a nāka mu. <sup>13</sup> N kaara

a kaci, katyashi ka wutaɪ a zuba ka wakana mu n ama ɗa a soku mu. Katyashi ki ka la ta ka kaara. <sup>14</sup> An tsu rukpai a iyamba gba tsunu, aku n panai kalagatsu ka dansa n Tsi'arama, ka tonuko mu, 'Shawulu, Shawulu, ndya i zuwai va yan mu mavura? Utengeshi u ɗa kanaka ka shilakana n magutsu ma kalina.'

<sup>15</sup> "Aku n wece yi, 'Asheku, aɗa yai?"

"Asheku a wushunku mu, 'Mpa Yesu, uza ɗa va yan mavura. <sup>16</sup> Gogo-na 'yanga, ili i'ya i zuwai n tuwai i'ya n zuwa vu vu woko kagbashi ka va kpam vu dana ili i'ya vu wenei a kaci ka va. Va tonuko ta ama ukuna u ili i'ya i gitai, n ili i'ya kpam ya tuwa a'ayin a ɗa ma wenike kaci ka va ara vunu. <sup>17</sup> Ma suku vu ta a asu u aza a Yahuda, n Awulawa. Ma kirana ta n avu a'ayin a ɗa va bana a asu u ɗa n suku vu. <sup>18</sup> Ma ciga ta vu kukpa a'eshi a le, a kpatala a asaka karimbi ubana a katyashi. Kpam a kpatala a asaka ucira u Kanangasi\* ubana ucira u Kashila. Aku Kashila ka cimbusuka le unyushi u cingi u le. Pini nala, a ka tsara ta asu a asuvu a ama ɗa Kashila ka wulukpei an a zuwai upityanangu u le ara va.'

### *Bulus dansai ukuna u manyan ma ne*

<sup>19</sup> "Adama a nala, Agaripa magono, ma 'yuwan utono kuwene ka ku tuwai a zuba vi wa. <sup>20</sup> N gitai ta n yankai aza a Damasuka kuɓari, aku n banai a Urishelima a uyamba u aza a Yahuda gba. Pini nala, n yankai Awulawa n tonuko le a kpatala a

---

\* **26:18** Kanangasi; wata, "Shetan" kala ka dem ka Kalapani.

asaka tsicingi tsu le a gono a asu u Kashila, kpmam a yain ili i'ya ya wenike an a kpatalai.

<sup>21</sup> “Ili i'ya i zuwai aza a Yahuda a kana mu a Kuwa ku Kashila a ka ciga a wuna mu i'ya gai la vi.

<sup>22</sup> Shegai Kashila ka banga mu ta, da i zuwai mari udansa kadyanshi ka na ki a asu u aza a pige na mmuku. Ili i roku i'ya Musa na ntsumate n da n buwai a danai ya gita vi i'ya, <sup>23</sup> Kawauwi ka pana ta ikyamba, kpmam aya wa woko vuma u kagita u da wa 'yanga a ukpa. Kpmam wa woko ta katyashi a asu u aza a Yahuda n Awulawa.”

<sup>24</sup> Kute-kute Fesutu salai, u danai, “Bulus, ijan i'ya va suma? Uyan kaneshi ushani vi u zuwa vu vu woko kashimza da?”

<sup>25</sup> Shegai Bulus wushunku yi, “Uzapige Fesutu, ijan i'ya mu wa. Ili i'ya ma tono vi mai da i'ari, kpmam n ugboji. <sup>26</sup> Agaripa magono u reve ta n ili i na yi, kpmam n eyi da ma dansa bawu uwonvo. Kpaci ukuna u na u gita ukpawunsi wa. <sup>27</sup> Agaripa magono, vu wushuku na ntsumate? N revei vu wushuku ta.”

<sup>28</sup> Agaripa wushunku yi, “Va ciga vu gonuko mu Katoni a asuvu a a'ayin a kenu a na a da?”

<sup>29</sup> Bulus wushunku yi, “Ko a asuvu a a'ayin a kenu ko a ushani, ma yan ta kavasus tsara Kashila ka zuwa avu n aza da a'ari pini na a ka panaka mu gogo-na a woko tyoku u va. Shegai ma ciga i uka ikani i nala yi wa.”

<sup>30</sup> Aku Agaripa magono, n Fesutu gomuna, n Baranisi, n aza da a'ari kabolo n ele a 'yanga a asakai a asu vi. <sup>31</sup> An a wutai, aku a dansai n atoku a le, “Vuma nala u yan ili i'ya i rawai a ka wuna yi, ko a uka yi a kuwa ku a'ali wa.” <sup>32</sup> Agaripa tonukoi

Fesutu, “U woko baci vuma u na danai a banka kadyanshi ka ne ara Kaisa wa, she tsarā tsu asaka yi.”

## 27

### *A bidyai Bulus ubana a Roma*

<sup>1</sup> An tsu fobusoi tsarā tsu uwa a kpatsu ubana a uyamba u Italiya, aku a nakai Bulus n aza a kuwa ku a'ali a kukere ku katigi ka pige ka roku uza u kala Juliyo, uza u te a asuvu a asoje a Kaisa magono. <sup>2</sup> Aristaraku wa ta dem kabolo n atsu. Eyi uza u ilyuci i Tasaloniya u da, a ubongu u Masidaniya. Tsu uwai a kpatsu ku ka tsu rongo uyan manyan a ilyuci i Adaramitiya. Aza a kpatsu yi a fobuso ta a ka shamgbusa a ilyuci ilyuci i'ya i'ari a ikengi i kushiva i uyamba u Asiya.

<sup>3</sup> An kain ka wansai, aku tsu rawai a Sida. Juliyo katigi u yankai Bulus ukuna u shinga, u asaka yi u ba kondoi aje a ne tsarā a naka yi gba ili i'ya wa ciga. <sup>4</sup> An tsu asakai Sida, aku uwule wa lapana tsu cika, aku tsu tonoi evu n uyamba u mere ma mini u Sayipuru tsarā tsu pana shana n uwule vi. <sup>5</sup> Tsu lyai kapala na nwalu ubana a daka a ubongu u Kilikiya n Bamafliya, aku tsu rawai a ilyuci i Mira a uyamba u Likiya. <sup>6</sup> Pini nala, Juliyo katigi u tsarai kpatsu ku roku ka aza a uyamba u Alizandariya kpam ka bana a Italiya, aku u zuwai tsu uwai pini.

<sup>7</sup> An tsu yain a'ayin ushani n tsu wali sawu, she na tsu matsai cika, aku tsu fudai tsu rawai evu n Kinidu. An uwule u bishinka tsu ulya kapala, aku tsu kyawain a kapashi ka bawu uwule wari pini,

evu n asu u ɗa a ka isa Salamani a uyamba u mere ma mini u Kiriti. <sup>8</sup> Tsu modonoi tsu wurai asu vi n upana u ikyamba, aku tsu rawai a asu u roku u ɗa a ka isa Asu u Uwunvuga u Shinga evu n ilyuci i Lasiya.

<sup>9</sup> An u wokoi tsu ɓarɓkpaɪ cika, nwalu mi n ɗa n buwa kpam mai wa, kpaci a'ayin a aɓali a ɗa. Kpam a'ayin a Abiki a Cimbusuka Ama Unyushi u Leɗ a wura ɗe. <sup>10</sup> Bulus tonukoi atigi a asoje yi, “Azapige, n wenei tsu lya baci kapala na nwalu n na mi, n ɗa ma tuko ta ukuna u cingi u unangasa u kpatsu, n unamba u ucanga cika. Ama kpam a ka pana ta usan, hal gbam uma u tsunu wa ta a unu u ukpa.”

<sup>11</sup> Shegai katigi ka ka ɓana ama yi u wushuki n kadyanshi ka uza u kpatsu ki n uza ɗa wa walaka kpatsu ki, u 'yuwain uwushuku n kadyanshi ka Bulus. <sup>12</sup> Asu u Uwunvuga u Shinga vi ukupɪ u ɗa wari, kpam asu vi u lobono a lyai pini ilyushi wa, kpaci aɓali a tsu rongo ta ulapusa asu vi. Adama a nala, aku aza a kpatsu yi a ka ciga a bana a ilyuci i Finikiya, tsara a lyai ilyushi i le ɗe. Finikiya tani asu u ɗa a'atsu a tsu shamgbusa pini a uyamba u mere ma mini u Kiriti u ɗa, asu u shinga u ɗa u tsu kangu ta aɓali, kpaci u ɗa wa wundya ta daka u kalivi n gadi u kalivi.

### *A cinai uwule u pige u ulima*

<sup>13</sup> An uwule vi u gitai u'yangasa kenu-kenu a daka, aku aza a kpatsu yi a ka yawunsa yavu a'ayin a ɗa a yain a ɗa a ka yan ili i'ya a foɓusoi. Aku a takpai kashampatsu ka kpatsu ki, tsu tonoi a ikengi i uyamba u Kiriti. <sup>14</sup> A ɓarɓkpa wa,

aku uwule u pige u da a ka isa, “Uwule u Gafi u Kasana,” u wutaɪ a kagida u lapana tsu. <sup>15</sup>Uwule vi u lapai kpatsu ki, hal gbaɪm tsu fuda tsu wala pini a asuvu wa. Aku tsu asaƙai uwule vi u purai kpatsu ki.

<sup>16</sup>Tsu tonoi asu u roku u uyamba u mere ma mini u da a ka isa Kawuda, a asu u da uwule u jebei. She na tsu modonoi cika, aku tsu fudai tsu ronoi kpatsu ku kenu ki utuwa a asu u ku pige ki. <sup>17</sup>An tsu ronoi kpatsu ku kenu ki, aku aza a kpatsu yi a zamai aban a sirasai kpatsu ku pige ki, adama a da ka tasa. Kpaci a ka pana ta uwonvo u da a ka vutala le a kayala ka ka soƙugusu ili dem u da a ka isa Siriti, aku a cipukai kunya ka ka walaka kpatsu ki tsara ku jebe nwalu n kpatsu mi. Pini nala, a asaƙai ka wala ili i ne eyi u de, kpaci a fuda a walaka ka kpam wa.

<sup>18</sup>An kain ka wansai, aku a gitai upurusa ucanga u da wari pini a kpatsu ki n a vutalasi a mini, kpaci mini mi ma shilakana ta cika ma gada tsu. <sup>19</sup>Kain ka tatsu, ama yi n akere a le a da a vutalasi ucanga u manyan ma kpatsu mi pini a mini mi. <sup>20</sup>An tsu yain a'ayin ushani bawu tsu wenei kaara ko atala, kpam uwule u pige u ulima vi u asaka wa, aku tsu takpai uma u da tsa la.

<sup>21</sup>Uza wa la u lyai wa, gba a a'ayin a nala yi. Aku Bulus isaɪ aza a kpatsu yi, u danai, “Ama a va, a da baci i'ari i panaƙa mu tun a kagita, tsara tsa asaka Asu u Uwunvuga u Shinga u Kiriti u nala vi wa, tsari tsa tsara usan u na n unamba u ucanga u na vi wa. <sup>22</sup>Gbamaɪ asuvu, uza wa la wa namba uma u ne wa, shegai kpatsu ki ka shumbugu ta. <sup>23</sup>I revei gai mpa vuma u Kashila da kpam aya ma

gbashika. N kayin ka nayain, u suku t̄a katsumate ka zuba ka ne. <sup>24</sup> Katsumate ki ka shamgbai evu n̄a mpa, ka danai, ‘Bulus, kotsu vu pana uwonvo wa! Va shamgba t̄a a asu u afada a kapala ka Kaisa magono ma pige. Kpam adama a tsishinga tsu Kashila, wa wauwa t̄a aza d̄a ya walaka kabolo adama a vunū.’ <sup>25</sup> Adama a nala, gbamai asuvu a d̄e. N wushuku t̄a n Kashila. Wa woko t̄a dere tyoku d̄a u tonuko mu. <sup>26</sup> Shegai u kana t̄a uwule u vutala tsu a kayala ka uyamba u mere ma mini, kpam kpatsu ku tsunu ku namgba gba.”

<sup>27</sup> A'ayin kupa n a nishi uwule vi wari ugama kpatsu ki a upashi u na ubana a upashi u nide a kushiva a daka u uyamba u Italiya. Shegai a kain ka kupa n ka nishi ki, aza a kpatsu yi a wenei tsa rawa evu n iyamba. <sup>28</sup> A kondoi akumgbi a kadaka ka mini ki, a cinai ka rawa t̄a udeshe amangatawun n kamanga (120). An a tsarai a barakpai kenu, aku a doku a kondoi mini mi, a cinai ma gono d̄e udeshe amanganishinkupa koshi. <sup>29</sup> Aku a gitai upana uwonvo kotsu kpatsu ki ku gama atali wa. Aku a vutalai ashampatsu a kpatsu a nishi a d̄a a'ari n araji a kucina ku kpatsu ki, tsara a fishinka kpatsu ki nwalu. A yain kvasu tsara kayin ka wansa gogo.

<sup>30</sup> Aku aza a manyan ma kpatsu yi a ka ciga a asaka kpatsu ki. A cipukai kpatsu ku kenu ki. A yain yavu a ka cipuka kashampatsu ka araji ka kari a kapala ka kpatsu ki. <sup>31</sup> Shegai Bulus tonukoi katigi ki n asoje yi, “Ama a na a shamgba baci a kpatsu ku pige ki wa, ya kuwa t̄a gba d̄e.” <sup>32</sup> Aku asoje yi a kidasai aban a kpatsu ku kenu ki a asakai ka ku tonoi mini.

<sup>33</sup> N kpasani, aku Bulus foloi ama yi a lyai ilikulya kenu. U tonuko le, “A'ayin kupa n a nishi a da pa vi i'ari a kadambula bawu i lyai ilikulya. <sup>34</sup> Ma folo da i lyai ili i roku adama a alafiya a de. I yan baci nala, ko kenji ka kaci ka de ka te ka puwan wa.” <sup>35</sup> U shamgbai a kapala ka le, u bidyai burodi u cikpai Kashila, aku u jibai u da u gitai utakuma. <sup>36</sup> A tsarai ugbami u asuvu, ele dem a lyai ilikulya. <sup>37</sup> Atsu ama amangatawanre n amangatatsunkupa n a teli (276) a da tsari pini a kpatsu ki. <sup>38</sup> An a lyai a cuwai, aku a jebigei kpatsu ki araji a varangusi icanga i ilya a mini mi.

### *Kpatsu ki ku tasasai*

<sup>39</sup> An kain ka wansai, aza a manyan a kpatsu yi a wene ta uyamba, shegai a fuda kpam a reve asu u da a'ari wa. A wene ta kpam asu u shinga u da wari n kayala, aku a ka ciga a banka kpatsu ki de. <sup>40</sup> Aku a kidasai aban a da a ka banā ashampatsu yi, a asakai a da a asuvu a mini. A tatsukpai ili i'ya ya yiralakpusa kpatsu ki. Pini nala, a 'yangasai kunya ku uwalaka kpatsu ki ka kari a kapala ka kpatsu ki dere tyoku da uwule wa pura ka ubana a asu u kayala vi. <sup>41</sup> Kpatsu ki ku tsara urawa a asu u da wari n kayala ki wa, aku a gbashai kayala ka roku ka kari a kere ka mini. Kaci ka kpatsu ki ka uwai a asuvu a kayala ka kpadai nwalu. Kucina ku kpatsu ki ku gitai utasasa adama a abali.

<sup>42</sup> Aku asoje yi a ka ciga a wunusa aza a kuwa ku a'ali yi, tsara a yain tsuwoki a suma wa. <sup>43</sup> Shegai an katigi ki ka ciga ka wauwa Bulus, u bishinka le. Aku u zuwai aza da a revei tsuwoki a radugusu pini a mini mi a yain tsuwoki ubana a kagida.



44 Aza ɗa a buwai kpam a yuwusai agbagala a upeti, aza roku kpam a yuwusai abaci a kpatsu yi. Nala a yain a rawai a kagida gba le.

## 28

### *Bulus a uyamba u Malita*

<sup>1</sup> An tsu lai, aku tsu revei an a uyamba u da wari a mere ma mini u da tsari, kpam kala ka asu ki ka Malita. <sup>2</sup> Aza a uyamba vi a ryabusa tsu ta mai, hal a zuwuka tsu akina tsara tsu lyashuku, kpaci a ka ro ta kpam kutanu ka pini. <sup>3</sup> Bulus cirangi ncaka, a'ayin a da wa zuwa n da a akina, aku kasudugbate ka akina ki ka wutukpai kali ka roku ka tsukonu, cina eyi pini ukani na ncaka mi. Pini nala, kali ki ka kapa yi a kukere bawu ka takpai. <sup>4</sup> An ama a ilyuci yi a wenei nala, aku a dansai utyoku u le, "Gaawan vuma u na kawuni ka ama ka. Ko an u lai a asuvu a abali yi, hal n gogo-na kameli ka kari uka ka afada a da a'ari dere ka buwa yi ta utono ka ciga ka wuna yi." <sup>5</sup> Bulus vishanai kukere ku ne, aku kali ki ka rukpai pini a akina yi, kpam ko i te ka yanka yi wa. <sup>6</sup> Ama yi n a wundi kukere ki ka shita ko kpam wa rukpa kute-kute u kuwa. Shegai an a barakpai a wenei ili i yan yi wa, aku a savadai kadyanshi a da, "Vuma u na, kashila ka roku ka."

<sup>7</sup> Evu n asu vi, uyamba u da pini u da wari u uzapige u uyamba u mere ma mini mi, uza da a ka isa Pubilu. Aya u wusha tsu u zuwa tsu a kuwa ku ne hal a'ayin a tatsu. <sup>8</sup> Dana tata u ne da pini nvain n usudugbi u ikyamba n kucaru. Pini nala, Bulus ba u danasa yi, u tafanku yi akere u yanka yi kavas u tanasa yi. <sup>9</sup> An vuma u tana, aku gba

aza dā a a'ari a uyamba vi a tukusoi aza a m̄bala ara Bulus, kpam u tanasa le.

<sup>10</sup> Ama yi a naka tsu ta karinga, kpam an tsa laza a kpatsu, a nakasa tsu ta ili i'ya tsa ciga.

### *A rawai a Roma*

<sup>11</sup> Tsu rongo ta a Malita hal uwoto u tatsu, pini nala, tsu lyai kapala na nwalu mi. Tsu uwai a kpatsu ka ku wutai a ilyuci i Alizandariya ka kari n iryoci i a'ulu a mpeshe ma amelia a da a ka isa Kasata n Pololu\* a da a shei na ndanga. Nte dem ku lyai pini ilyushi a ilyuci yi. <sup>12</sup> An tsu rawai a ilyuci i Sirakusa, tsu rongo ta pini a'ayin a tatsu. <sup>13</sup> Pini nala, tsu uwai kpatsu she a Rigiyyun. An kain ka wansai, uwule u 'yangai a daka, aku tsu lazai she a Putiyoli. <sup>14</sup> Tsu cina ta pini Atoni, aku a folo tsu tsu shamgba n ele. An a'ayin a shindere a wurai, aku tsu lazai she a Roma. <sup>15</sup> Aza a tsunu aza da a a'ari a Roma a reve ta an tsa tuwa, aku a tuwai a kangu tsu a Kuden ku Apiyu n asu u da a ka isa A'uwa a Amoci a Tatsu.† An Bulus gawunsai n ele, u cikpai Kashila kpam ikyamba i ne i doki ucira.

### *Bulus yain kuɓari a Roma*

<sup>16</sup> An tsu rawai a Roma, aku a zuwai Bulus rongo utyoku u ne, kpam kasoje n ka wundi yi.

<sup>17</sup> An tsu yain a'ayin a tatsu, Bulus isai azapige aza a Yahuda, u tonuko le, "Aza a va, n nusuka ama a va wa, ko kpam ukuna u isheku i tsunu wa. Shegai gba n nala a neke mu a akere a aza a Roma

\* **28:11** Nheline n bidya ta an Kasata n utoku u mapeshe u ne Pololu ashila a da a ka kirana n aza a nwalu a kpatsu ku mini.

† **28:15** Asu u re u na vi, m̄b̄ari n le n Roma n rawa ta mel kamankupa.

a Urishelima a kaṅa mu. <sup>18</sup> Alya n kunu ku afada ki, an a vecei ukuna u va vi, aku a ka ciga a asaḱa mu, kpaci a kaṅa mu n unyushi u da u rawai a wuna mu wa. <sup>19</sup> Shegai an aza a Yahuda a 'yuwain uwushuku, aku u kaṅai n foli a gonuko kadyanshi ki ara Kaisa. Shegai ciga da ma ciga n banka ama a tsunu a asu u afada wa. <sup>20</sup> Isa da n isa da tsara tsu dansa. A sira mu ta n ikani, kpaci n wushuku ta n uzuwa u uma u aza a Isara'ila; wata, Kawauwi uza da tuwai.”

<sup>21</sup> Aku a danai, “Tsu pana ili i roku a kaci ka vunu wa. Tsu wene ukanikorongi u da u wutaḱi asu u aza a Yahuda wa, ko uza u tuwa u tonuko tsu ukuna vi wa. <sup>22</sup> Shegai tsa ciga ta tsu pana ili i'ya i'ari a katakasuvu ka vunu, kpaci ili i'ya tsu revei a kaci ka kaḱolo ka savu ka na ki i'ya ko nte wa a ka dana ta ukuna u cingi a kaci ka ne.”

<sup>23</sup> A zuwai kain ka a ka tuwa a gawunsa n eyi a asu u da u cipai vi. Kain ki a tuwa ta ushani. Ili i'ya i bidyai usana hal ubana kuvuli, Bulus wari udansa n ele ukuna u tsugono tsu Kashila. U yan ta manyan n Mele ma Musa n Itagarada i Ntsumate. Wa modono tsara u rono le utuwa a asu u Yesu. <sup>24</sup> Aza roku a wushuku ta n ili i'ya u danai, aza roku tani wa. <sup>25</sup> Aku a'ari kananamgbani ubana n ugono utyoku u le, aku a gitai ulazasa. A makorishi, Bulus danai, “Kulu Keri ku dana ta mai an ku yain kadyanshi a unu u Ishaya matsumate, an u tonukoi isheku i tsunu,

<sup>26</sup> “ ‘Ba vu tonuko ama a va,  
Ya pana ta kadyanshi ka va,  
shagai ya reve wa.

Ya wene ta,

shegai ya reve kalen ka ne wa.

<sup>27</sup> Kpaci atakasuvu a de a gbama de,

a votsuku de atsuvu a de,

a kimba de a'eshi a de.

Tsara i wene n a'eshi a de wa,

i pana n atsuvu a de wa,

kpam i reve n atakasuvu a de wa.

A da baci nala wa, i'ari ya kpatala ta utuwa ara va  
aku n tansa da.' <sup>◇</sup>

<sup>28</sup> “Adama a nala, ma ciga i reve, alabari a iwauwi a nala yi a asu u Kashila u da a wutai hal utuwa a asu u Awulawa, kpam alya a ka wusha a da.” [ <sup>29</sup> An u danai nala, aku aza a Yahuda a 'yangai a'ari uyan kananamgbani utyoku u le.]<sup>‡</sup>

<sup>30</sup> Bulus dusuku ta a kuwa ka wa tsupusa ikebe hal ayen a re n u wushi gba uza da baci dem u tuwa yi uwene. <sup>31</sup> U yain kuɓari ku tsugono tsu Kashila bawu uwonvo, n u wenishiki ama ukuna u Yesu Kawauwi Asheku, kpam uza u fishinka yi wa.

---

<sup>◇</sup> **28:27** Isha. 6:9-10. <sup>‡</sup> **28:29** Akorongi a cau ushani aza da a purai a tagarada u Manyan ma Asuki a kalatsa ta makpanda ma 29.

**Kazuwamgbani ka savu n Tsikimba n a6on a  
da a dangasai a kazuwamgbani ka cau  
New Testament in Tsikimba (NI:kdl:Tsikimba)**

copyright © 2010 Wycliffe Bible Translators, Inc.

Language: Tsikimba

Translation by: Wycliffe Bible Translators, Inc.

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Tsikimba

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 11 Nov 2022 from source files  
dated 29 Jan 2022

a4f6a28b-3d6d-50b4-a81b-06ae05a66010